

36148/A

Axxxi Mea





MONITA
ET
PRÆCEPTA
MEDICA

AUCTORE
RICHARDO MEAD,
COLLEG. MEDICOR. LONDIN. ET
EDINBURG. SOCIO, REG. SO-
CIETAT. SODALI, ET
MEDICO REGIO.


HIPPOCR. EPIDEM. I.

Ἀσκεῖν περὶ τὰ νοσήματα δύο* ὠφελέειν, ἢ μὴ
βλάπτειν.



LOVANIÏ,
Typis JOAN. FRANC. VANOVERBEKE
Sub Signo Lampadis Aureæ. 1755.


Cum Approbatione.



APPROBATIO.

Imprimi poterit. Datum
Lovanii 24. Januarii 1755.
F. SCHEPPERS
Lib. C. R. & Apost.





LECTORI BENEVOLO

T Y P O G R A P H U S

P *Rodiit Parisiis 1751. Collectio variorum Operum quæ tum temporis ediderat Celeberrimus Vir RICHARDUS MEAD M. D. Collegii Medici & Regiæ Societatis Londinensis ac Edinburgensis Socius, Medicus Regius, quæ eo fuit Medicinæ Cultoribus gratior, quod non solum quæ Anglicè ediderat Celeberrimus Author, in illa latinè interpretata dederit Clarissimus Vir A. C. Lorry M. D., sed & quod exemplarium in Anglia editorum omninò desideraretur copia. Factum interim est quòd eodem anno 1751. prodierit Londini novum Opus quo præfatus Celeberrimus Vir Rempublicam ditavit Medicam titulo Monita & Præcepta Medica, in quo selecta adversus plerosque morbos remedia longâ experientiâ probata, & se-*

TYPOGRAHUS LECTORI

*verâ ratiocinatione ponderata prô-
mit, candidè æquè ac liberaliter. Ego
cùm hoc Opus in collectione Parisiensi
scirem desiderari, uti & ejusdem Ce-
leberrimi Authoris aliud de Morbis
Biblicis edidit opus (indubiè quòd ad
Editoris manus hæc non pervenissent
etiãsi hoc ultimum 1749. Amstelo-
dami foret recusum) cogitavi me om-
nibus quibus ars salutaris cordi est
rem præstaturum gratam si Monita
& Præcepta Medica Celeberrimi Viri
Typis mandarem, cùm illa in hac re-
gione sint quàm rarissima, & tamen
si utilitatem Medicam spectes nulli eo-
rum quæ edidit cedat, imò reliquis
omnibus Palmam præripiat. Illo jam
facilè & commodè frueri Lector Bene-
vole, sique tibi non displiciat curabo ut
pari facilitate gaudere possis Opere
quod de Morbis Biblicis eodem habetur
Authore, hîc æquè ac id quod jam sisto
rarò. Vale.*



PRÆFATIO.



EM neque inutilem , neque ab officio & vitæ meæ instituto alienam , me facturum existimavi ; si præcipua adversus ple-rosque morbos auxilia , quæ aut longa experientia didici , aut legitima ratiocinatione excogitavi , in publicum ederem. Artis autem præcepta & viam mendi potius , quàm morborum definitiones aut descriptiones tradere ; & medicamenta usu comprobata , non conjecturas ingenio fictas , proponere statuo. Et quoniam consilium non est de universa medicina commentarios scribere , usitatum in libris medicorum ordinem non servabo ; horis enim subsecivis ex *Adversariis* meis ea , quæ usui fore opinabar , transcripsi ; in mentem simul , quantum potui , revocans quæcunque in singulis morbis profuisse aut nocuisse memineram. *Sic enim or-*

ta

P R Æ F A T I O.

ta est medicina, subindè aliorum salute, aliorum interitu, pernicioſa discernens à ſalutaribus. (1) Quapropter neque de ipſa ſcientiæ medicæ conſtitutione, ut ita dicam, verba fa-
cturus ſum; nec quantum illa vel *rationalis*, vel *empirica* ſit, diſceptaturus. Operæ potiùs erit, quæ in utramque partem diſputant medici, qui aut artem rationalem, aut uſum tantum ſibi vindicant, apud *Celſum* legere, qui ſententiam ſuam ſuper tota hac re dilucide & ſapienter expoſuit. (2) Nullam autem ex his, quæ opera ſæpe tumultuaria feci, gloriolam aucupor. Animadvertit enim jam olim medicinæ pater *Hippocrates*, *majorem conqueſtionem, quàm honorem, ſortitam eſſe artem noſtram.* (3) Ita nimirum fert hominum natura, in aliorum reprehenſionibus nimia plerumque & prodiga, in laudationibus verò parca & avara. At hæc forſan de medicina querela levis videatur; gravior autem illa, quam alibi affert: *videre medicum terribilia,*
con-

(1) *Celſus in Præfat.*

(2) *Ibidem.*

(3) Ἐγωγε δοκέω πλείονα μεμψιμοιεῖαν, ἢ τιμὴν κικλησθῆναι τὴν τέχνην. *In Epiſt. ad Democritum.*

P R Æ F A T I O.

contrectare acerba, & ex alienis calamitatibus proprias sibi capere molestias. Quid autem humaniùs, vel homine etiam Christiano digniùs, proferri potest; quàm aliorum malis commoveri, perinde ac si sua essent. (1)

POSTULABAT quidem instituti hujus ratio, ut aliorum medicorum errores interdum monstrarem; id autem ea semper æquitate feci, quâ ipse meos emendari velim. Conjecturis sæpe ars nostra nititur; neque id sperandum, ut perpetuo quis colliniet. Quocirca nec me puduit, quæ quandoque ipse si-ve ignorantia, si-ve negligentia, perperam fecerim, monere & agnoscere. *Convenit enim, ut ait Celsus, simplex veri erroris confessio, præcipueque in eo ministerio, quod utilitatis causâ posteris traditur. (2)* Illud autem facile percipiet lector, me non sensa tantum, sed & ipsissima verba *Celsi*, ut res tulit, imitando exprimere voluisse; quod utinam sanè facere mihi sæpius licuisset. Quo enim auctore potius

ute-

(1) Ὁ μὲν γὰρ ἰητὴρὸς ὁρᾷ τὰ θανά, διγγάνει τε αἶσαν, καὶ π' ἀλλοτρίῃ τι ζυμφορῇ τιν ἰδίας καρπῶται λύπας. *Lib. De flatibus.*

(2) *Lib. VIII. cap. 4.*

P R Æ F A T I O.

uterer, quàm eo, qui ex Græcis tam medicis quàm chirurgis præcipua, quæ ad artem nostram pertinent, in linguam Latinam elegantissimè transtulit? Denique monendum est, medicamentorum compositiones, quibus utor, nisi aliter significatum fuerit, illas me intelligere, quæ in novissima *Pharmacopœia Londinensi* exhibentur. Utcunque sit, gratum & acceptum habeant à me cives nostri hoc qualecunque legatum, bono suo destinatum; & valeant.





MONITA ET
PRÆCEPTA MEDICA.
INTRODUCTIO.

D E

CORPORE HUMANO.

PRIUSQUAM morbos , quibus corpus nostrum est obnoxium , explicare aggredior ; opere pretium erit de illo , quale sit in statu integro & sano , quædam breviter præfari.

Si quis igitur veram corporis humani imaginem sibi fingere velit , is machinam quandam hydraulicam summo artificio constructam , in qua sint innumeri canales humoribus diversi generis ferendis apti & accommodati , animo concipere debet. Horum præcipuus est sanguis , ex quo liquores derivantur variis vitæ nostræ usibus & officiis in-

A

fer.

2 DE CORPORE HUMANO.

fervientes ; in primis autem illi , quos *spiritus animales* vocant , qui in cerebro generati , & vi insigniter elasticâ præditi , motûs omnis ac sensûs sunt instrumenta ; quorum neutrum efficere possent , nisi materiæ accommodæ inhaerent. Idcirco fibras duplicis generis , cum carneas , tum nervosas , actuoſi hujus principii receptacula , formavit Divinus rerum Conditor ; quarum utræque partim membranis corporis intertextæ sunt , partim in funiculos colligatæ membris adhærent , ad horum motiones ossium adjumento peragendas.

ADMIRANDA autem ista compages primum motorem adhuc desiderat , cùm sese movere nequeat. Mens igitur ut dux & moderatrix præficitur , quæ motus omnis & sensus in corpore est effectrix. Illa enim , sive in capite , tanquam in arce sua , habitat ; sive *ejus locus nullus est , sed per totum corpus sparsa discurrit* , quod à Xenocrate , Platonis discipulo , disputatum est ; (1) dominatur in nobis , & res administrat. Motus autem nostri , pariter ac sensus ,
tam

(1) Vid. Lactant. *De opificio Dei* , cap. 16.

DE CORPORE HUMANO. 3

tam interni sunt , quàm externi : illi non tantùm partes vitales , quales sunt cor , pulmones , & ventriculus cum intestinis , subjectas sibi tenent ; sed & membranas quascunque nervosas.

CÆTERUM insigne quoddam discrimen vulgò ponunt auctores medici inter motus , quibus aguntur vitalia ; & eos , qui cæteras partes agitant : illos , postquam à prima nativitate semel cœperint , perstare , & etiam nobis non volentibus necessariò permanere ; hos verò ad mentis arbitrium , prout res incidunt , fieri autumantes. At hoc male judicant , eo decepti , quòd naturales illas actiones , licèt nobis parùm conscias , per omnem vitam continenter persistere vident , nec quantum sentimus interrumpi : cùm tamen , si ea res rectè perpendatur , liquido patebit , non aliâ ratione vitales istos motus ab animo minimè regi videri ; quam quod illis nunquam non assuefacti tam promptè & sine attentione eos perficimus , ut volentes etiam cohibere & impedire , quo minus inceptum munus exequi pergant , haud facile possimus. Tale quid experimur , quoties ad solis radios ,

A 2

4 DE CORPORE HUMANO.

dios, vel aliud quiddam, quod oculos perstringit, connivemus etiam nolentes; & tamen, mente sic jubente, illas motiones fieri nemo dubitat. Possem id multis aliis documentis probare & illustrare, sed nimis longum esset; malim igitur lectori commendare tractatum à doctissimo medico Porterfieldio editum, qui hanc rem satis dilucidè extra dubium posuit (1).

NULLIS autem in casibus magis elucet talis animi virtus, quàm in iis præsertim febribus, quæ *pestilentes* dicuntur. In his enim observare licet, mentem festinanter fabricæ laboranti succurrere, contra hostem pugnare, & spirituum animalium ope, nobis id non sentientibus, novos in corpore motus excitare, quibus venenum, quod humoribus insedit, per omnes meatus foras expellatur. Hinc morbum naturæ certamen, propriam salutem propugnantis, medici sapientiores definierunt.

ET isto quidem modo universæ machinæ periclitanti prospicitur. Sed &
par-

1 Vid. *Medicinal Essays*, published at Edinburgh, Vol. III. Essay 12. & Vol. IV. Essay 14.

parti alicui singulari aliquando consule-
re oportet , neque tum deest officio
suo animus. Etenim si in locum quem-
vis fortuito inciderit vitium , ne is one-
re nimio gravetur & doleat , à natura
provisum est , ut sanguini & humori-
bus per canales vicinos detur transitus.
Id autem fit mirabili istâ corporis dispo-
sitione , quâ liquorum tubuli sibi impli-
citi atque intertexti quaquâversum spar-
guntur ; ita ut non tantùm ex venis in
venas , sed ex arteriis etiam exilibus in
alias , transeat sanguis. Idcirco illic
præcipuè comparet hoc artificium , ubi
obstructionum maximus est metus ; ut
in capite , abdomine , & longis illis du-
ctuum , qui ad genitalia pertingunt ,
anfractibus videmus.

ATQUE eo quidem magis necessaria
est talis fabricæ nostræ constructio ;
quod , etiamsi non interveniat morbus ,
ipsæ interdùm corporis actiones & con-
suetudines per has vias liberiùs , quàm
illas , humores circumferri postulant.
Hinc iidem sanguinis canales in aliis at-
que aliis hominibus , ut usus exegerit ,
largiores aut angustiores fiunt , prout
plus minùsve à perpetuis fluidorum

6 DE CORPORE HUMANO.

motionibus dilatentur. Ita vinolentis arteriæ in capite, libidinosis in genitalibus plùs turgent, quàm in sobriis, & rebus venereis minùs deditis.

POSSEM his & illud adjicere, quod vix fieri potest, quin ipsa partium animalium textura, licèt vitæ nostræ convenientissima sit, in casibus tamen nonnullis aliqua ferat incommoda; haud aliter fanè, ac in universa mundi compage necessariò in locis quibusdam fulmina, ventorum turbines, terrarum inundationes, pestes, & confimiles calamitates nonnunquam eveniunt. Ut his autem malis occurrit atque obstitit, prout rerum fert natura, Supremus orbis Conditor; ita & illis, quæ parvus noster patitur mundus, idonea adjumenta opposuit.

IN eo autem diu laborarunt geometræ, ut machinam effingerent, quæ in motu suo indefinenter persisteret, quam *mobile perpetuum* appellant; sed votis semper excidentes operam luferunt. In istiusmodi enim operibus unoquoque temporis puncto aliquid de vi motûs effectrice perit, cedente nimirum, sensimque necessariò ab ipsis partium
fri-

fricationibus imminuta , virtute movente ; undè perpetuo renovari opus est. Ob hanc igitur causam solius est Omnipotentis rerum Conditoris tale machinamentum perficere ; qui corpus nostrum fabricam ejusmodi esse voluit , potentias quasque ita disponens , ut esset harum quasi orbis , quo semper ac simul munus suum exequentes sese mutuo reficerent.

Ex his manifestum est non per partes , sed totam simul formari compagem animalem ; cùm fieri nequeat , ut motionum circulus peragatur , quarum aliæ ab aliis pendent , nisi adsint omnia illarum instrumenta. Nam , ut exempli causa dicam , quâ ratione cor poterit se contrahere , ut sanguinem propellat , sine spirituum animalium adjumento , qui nec ipsi sine cerebro confici possunt ? Par ratio est aliarum partium principalium. Quæ igitur microscopiorum ope animalcula in femine masculino innatantia conspiciamus , sunt reverâ homunculi , qui in uterum muliebrem recepti , tanquam in nido foventur & crescunt , justo tempore excludendi. Rectissimè ergò dixit olim

8 DE CORPORE HUMANO.

Hippocrates : *Nullum quidem corporis est principium , sed omnes partes æquè principium & finis sunt.* (1)

HACTENUS dictis unicum illud adjiciam , ejus esse naturæ machinam omnem animalem , ut partium eam constituentium quædam sit quasi infinitas ; ita ut ultra quàm nos sensibus , etiam microscopiorum , ut vocant , ope adjutis , assequi possimus , in fila tenuissima abeant. Si fecus esset , neque in corpus universum distribueretur alimentum , neque vitæ officia peragi possent.

IN summa igitur , motiones humorum ad normam peractæ , simul cum apto partium solidarum statu , sanitatem constituunt ; harum autem aberrationes sunt morbi , quæ cùm innumerae sint , & altera sæpe alteram progignat , miraculum ferè videtur , si corpus animale ad longævitatem unquam perducì possit. Atque hinc profecto , quam latè pateat medicinæ usus , quantumque illa aliis omnibus artibus præcellat , perspicuum est. MA-

(1) Ἀρχὴ μὲν ἑδεμία ἐστὶν τῷ σώματι , ἀλλὰ πάντα ὁμοίως ἀρχὴ καὶ τελευτή. *Lib. De locis in homine.*

MACHINAM autem hanc, quæ unica motum perpetuum habet, pro varia viventium ratione ad longius aut brevius tempus duraturam finxit Geometra ter Optimus Maximus. Nam perpetuo in vita durare, quale nos gerimus, corpus omninò nequit; cujus rei causam haud difficile est explicare. Fibræ enim membranosæ canalium, qui sanguinem vehunt, quas virtute elasticâ ad liquorem inclusum protrudendum præditas esse diximus, rigidæ fiunt & duriores; undè usibus suis ineptæ evadunt, & humorum secretiones in singulas partes sensim diminuuntur. Porro, quod ad vitam summè necessarium est, inutilem vaporem per angustissimos cutis meatus in senio haud satis perspirare, cadaverum eorum, qui ætate sunt confecti, incisiones demonstrant; quæ interiores arteriarum partes ossea materia hic illic obductas, adeò ut resiliendi vim ferè amiserint, interdum ostendunt. Quin & ora ductuum naturalium, ad cartilaginis duritiem confirmata, in hujusmodi casibus sæpe reperiuntur.

Duo proferam, quæ ad hanc rem

A 5 per-

pertinent, illustria exempla, quorum alterum suppeditant nostri *Annales*. Pauper quidam agricola, nomine *Thomas Parr*, in agro saluberrimo Salopienfi natus est, ubi ad annum usque centesimum & trigesimum opere rustico se strenuè exercuit; deindè oculis captus, Londinum tandem adductus est, ubi aliquamdiu commoratus, postquam centum & quinquaginta duos annos cum novem mensibus vixerat, anno MDCXXXV decessit. Mortui corpus cultri sui anatomici honore dignatus est immortalis ille sanguinis circuitus detector, *Guilielmus Harveius*; qui cætera quidem omnia sana, cerebrum verò *firmissimum & ad tactum solidissimum* observavit. (1) Ita liquorum canales in illa parte longa dies induraverat.

ALTERUM, quod dixi, exemplum in *Actis* nostris *Philosophicis* memoratur. Narratio est de fene quodam decrepito Rhæto, metalli fossore, qui cum centum & novem annos cum tribus mensibus compleverat, anno MDC CXXIII obiit, à doctissimo medico, *Jo-*
han-

(1) Vid. *Anatomiam Thomæ Parri, ad finem Libri Johannis Betti, de ortu & natura sanguinis, adjunctam.*

hanne Jacobo Scheuchzero Tigurino, huc transmissa. In secto ejus cadavere *liënis exterior membrana maculis nivei candoris, primo intuitu variolarum pustulas referentibus, obsessa reperiiebatur; quæ cartilagineæ prorsus erant duritiëi, & ultra superficiem reliquæ membranæ aliquantulum elevata: sterni prominentiæ cum ipsis costis continuæ, & planè ossæ erant: tendo ille, quo cordi inseruntur arteriæ, vel osseus planè, vel saltem cartilagineus: valvulæ semilunares, præprimis arteriæ aortæ, planè cartilagineæ: dura autem cerebri meninx triplo ferè solito crassior, & coriacea deprehendebatur. (2)*

SED ad machinæ hujus vitia, quæ motus illius turbant & pervertunt, jam progrediendum est.

(2) *Philosophical Transactions, Numb. 376.*





CAPUT I.


DE

FEBRIBUS.

SECTIO I.

DE

FEBRIBUS GENERATIM.


FEBRIS omnis , licèt variæ
 sint ejus species , conjun-
 ctum habet sanguinis & hu-
 morum calorem præter na-
 turam. Is vires corporis , actionesque
 vitales lædit. Idcirco morbum , quasi
 infensum hostem , inito quodam certa-
 mine , oppugnat natura ; quæ , si victrix
 evadat , per quascunque potest vias id ,
 quod nocet , expellit. Hoc morbi solu-
 tionem vocant medici. Quid autem per
 vocem *naturæ* hic intelligi debeat , uti
 etiam nonnulla , quæ ad febrium distin-
 ctio-

ctionem pertinent, alias exposui; (1) simulque indicavi, quo sensu medici, & in primis Sydenhamus, dixerint, *Morbum nihil esse aliud, quàm naturæ conamen, materiæ morbificæ exterminationem in ægri salutem omni ope molientis.* (2) Quædam igitur de febris solutionibus in antecessum dicam.



S E C T I O II.

D E

FEBRIS SOLUTIONIBUS.

CUM nulla febris sine insigni aliqua exinanitione, aut sponte natura, aut arte facta, fanetur; prospicere debet medicus, quânam viâ materiæ morbidiæ expulsionem natura moliri videatur, & hanc omnibus modis adjuvare. Illa verò sæpissimè per plures simul corporis meatus peragitur, & altera alteri plus minus obstat, ita fluxus alvi sudores reprimat, & contra. Hinc attendere oportet, qualis humoris emissio plurimum profutura sit, & hanc ita promoverè, ut alia quæcunque quam minimum

mum

(1) Vid. *Lib. De var. C. II.*

(2) *Observat. medicæ circa morbor. acutor. historiam,*
in principio.

14 DE FEBRIS SOLUTIONIBUS.

mum interrumpatur ; non enim omnibus eadem convenit , tum propter diversum laborantis temperamentum , tum ob varium morbi genus : quamquam & per omnes exitus expurgatio interdum sit necessaria ; ut in febribus , quæ malignæ dicuntur , usu comperimus.

OMNIUM autem maximè optabilem morbi solutionem efficiunt sudores : secundum illos alvi & urinæ fluxus : pessima est hæmorrhagia , sive ex naribus , sive ex alia quavis parte proveniat ; ostendit enim ita vitiatum esse sanguinem , ut nulla idonea humoris separatio ex illo fieri possit.

IN febribus denique nonnullis suppurationes in glandulis factæ , modò sub exitum morbi eveniant , & perfectæ sint , corpus in integrum restituant. In his igitur id agendum est , ut per cataplasinata aut emplastra , nonnunquam & cucurbitulas tumori accommodatas , materia morbi primùm maturescat ; deinde verò , nisi spontè proruperit , scalpello aut medicamento caustico emittatur.

RECTE interim plerumque præcipitur ,

tur, ut ne ullis tunc temporis exinanitionibus exhauriantur vires. At nihilominus ita res interdum fert, ut modicâ saltem sanguinis missione opus sit; nimirum si fortè materia ultra modum turgeat, & nimius urgeat calor: hoc enim prudenter factò, abscessus ad maturitatem perducitur, ideò quòd natura à turbulento rerum statu semper abhorret.



S E C T I O III.

D E

FEBRIBUS CONTINUIS.

NULLI morbo magis convenit utile illud præceptum, *Principiis obsta*, quàm febribus. Inter initia enim juvare plerumque facile est; at cùm malum jam invaluit, difficiliùs ægrotanti succurritur. Præceps enim occasio est (1); & frustra sæpe ea medicina est, occupato jam vi morbi corpore, fractisque viribus, quæ in principio à periculo expedire hominem potuisset. Neque tamen fato suo permittendus est, qui auxilium ferò petit: quandoquidem morbos, antiquissimis temporibus ad iram divinam relatos, (2) ars nostra, quæ

(1) Ὁ κατὰς ὄντος. Hippocr. Aphor. I.

(2) Vid. Celsum in Præfatione.


16 DE FEBRIBUS CONTINUIS.

quæ Dei ipsius donum est, etiam cum res jam desperatæ videntur, non rarò depellat. Circumspicere igitur oportet medicum, neque officio suo unquam deesse.

ET primò quidem, quoniam præstantissimum in febribus omnibus incipientibus remedium est sanguinis detractio; si culpa quavis illa prætermissa fuerit per aliquot dies, num adhuc ea fieri debeat, dispiciendum erit.

SI intolerabilis igitur in quacunque parte corporis dolor urget, si spiritus ægrè trahitur, vel si delirium accessit, sanguis pro ratione virium mittendus erit; scalpello, si illæ fatis consent; aut per cucurbitulas; si fuerint imbecilliores; aut deniquè per hirudines, si infirmissimæ videantur. Atque hæc, si consistente jam morbo fieri possunt, multò magis in principio locum habent. Et hirudines quidem, ut illud in transcurso moneam, premente delirio, sæpe insigniter juvant. Nonnunquam etiam in furibundis pulmonis aliquas portiones, ex agno recens mactato calentes, capiti impositas furores compe-scuisse comperi, exsudante nimirum è capite inutili humore. Quo

Quo manifestiùs autem percipiantur ea, quæ de hoc morbo proponenda habeo, præcipua ejus genera summatim exponam; quæ ad ægri gubernationem, victum, similiaque pertinent, ex auctoribus, *Celfo* in primis, & *Lomnio* ejus amulo, qui hæc dedita opera tractarunt, haurienda relinquens.



S E C T I O IV.

D E

FEBRI CUM EXANTHE-
MATIBUS

C O N J U N C T A.

PROPRIAM animadversionem desiderant febres, quæ exanthemata secum ferunt. Ad variolas autem & morbillos, quin & ad pestem, quæ spectant; ea jam olim à nobis in libris singularibus sunt exposita. Aliarum præcipua est.

FEBRIS MILIARIS.

HAC nulla faciem magis, variam ostendit, Pustulæ nimirum asperæ per totum corpus, citiùs aut tardiùs, pro-

B rum

rumpunt ; nunc rubræ , nunc albidæ , interdum illæ his commistæ ; nunc minores , nunc elatiores , malè olentes : suspiria , & præcordiorum anxietates , frequentissimè premunt : accedunt non rarò delirium , nervorumque distensiones. In longum trahit morbus ; quod si fortè , non satis perfectâ solutione , citius desinat , malo corporis habitu sæpè plectitur æger. Exanthemata rubra minus periculum afferunt , quàm albidâ ; illaque , quo vividiora persistent , eo sunt tutiora. Ex hisce liquet , ab humorum vitio magis quàm aëris , adjunctâ spirituum animalium labe , febrem hanc oriri ; quam non uno & eodem modo , sed cura alia atque alia , depellere oportet.

CUJUSCUNQUE autem generis fuerint pustulæ , sanguis in principio , modo vires finant , mittendus est ; si corpus sudoribus diffluat , aut detractione abstinendum , aut ea in diem unum aut alterum , vel in tempus opportunius , differenda est. Longè verò meliùs ferunt sanguinis imminutionem exanthemata rubra , quàm albidâ ; cumque in utrisque vesicatoria ex usu sint , magis sunt in his necessaria , & tum
cer-

cervici, tum capiti, membrisque omnibus, temporis intervallis, imponi debent. Illud autem animadvertere oportet, quo minori copiâ missus fuerit sanguis, eo tutius ut plurimum finiri morbum; deficientibus enim extremis diebus viribus, pustulæ retrocedunt, & æger moritur.

MATERIÆ expulsiōnem adjuvare oportet medicamentis, quæ vim habent humores è sanguine propellendi. Horum convenientissimum erit *pulvis bezoardicus*, vel *pulvis contrayeræ compositus*, aut *confectio cardiaca*; adjuncto, si inflammatio urgeat, *nitro*: quod quidem in omnibus ferè febribus malignis, cardiacis dictis remediis, saltem in principio, admiscere utile erit. Interdùm etiam convenit, inclinato jam morbo, balneo tepido lavari, quo pustularum reliquiæ, foras exeant.

SIN autem vesiculæ tantùm exiguæ, pellucidæ, quæ vix cerni possunt, & innumeræ, consistente morbo, aut sub ejus finem, in cuticula se ostenderint; non nimis diu internis ejus generis remediis insistere oportet, nisi fortè etiam valentiora ægri vires longâ valetudine

exhaustæ requirant. Vim enim febrem solvendi non habent humidæ istiusmodi summæ cutis asperitudines, at difficilem & longam plerùmque ægritudinem indicant : idcirco, nondum intermissio vesicatoriorum usu, per alias vias, maximè autem per intestina, expurgandus erit morbi fomis; quæ *rhabbaro*, vel *manna*, adjecto *sale Glauberi*, commodè laxabuntur.

ILLUD in hoc morbo interdum usu venit, ut non uno solutionis genere, sed alio atque alio finiatur; est ubi pluribus simul, quod & in aliis, ut dixi, quæ malignæ dicuntur, febribus sæpissimè contingit. Ita nonnunquam, ejectâ eodem tempore per alias vias morbi materiâ, aphthæ palatum atque os totum occupant, & ad uvam faucesque descendunt. Hæ cum singultu plerùmque incipiunt : & si albidæ cum humore copioso prorumpant, multumque salivæ exspuatur, non magnum periculum sed salutem potius ostendunt, morbumque solvunt; sin contra nigrae exoriantur, & ægrè materia exeat, id plerùmque pestiferum est, strangulatis nimirum faucibus vi pituitæ obfessis. In
his


his omnibus gargarizationes fieri debent *decocto hordei*, addito *syrupo mororum*, aut alio consimili; vel etiam *decocto pectorali* dicto. Neque enim reprimentia quocunque modo adhibenda sunt.

MIRABITUR fortassè quis Sydenhamum, tum ad ipsam hanc febrem, tum ad ulcuscula ista, *corticis Peruviani* usum præcipere; quem sibi semper benè cessisse dicit. (1) Id autem non temerè fecit sagax ille medicus: haud rarò enim intermittit ista febris, non apparentibus aphthis; sæpius verò, his decedentibus, definit. In utroque casu insigne hoc antidotum quam maximè prodest. Summus autem ille vir morborum vulgarium recursus Hippocratis exemplo observare solitus, quos pro vario cœli more iisdem anni temporibus variare plerùmque competit, primus apud nos febrem hanc descripsit; quam anno MDCLXXXIV, postquam frigore gravissimo longoque sævierat hiems, mense Februario anni insequentis ortam fuisse animadvertit. Hinc credere par est gelu nimio constrictas summi

B 3 *cor-*

1 Vid. *Schedulam ejus monitoriam*.

corporis fibras , indeque humores , imminutâ perspiratione , acriores factos illam genuisse.



S E C T I O V.

FEBRIS PETECHIALIS.

PETECHIÆ , undè hæc nomen habet febris , sunt maculæ latæ , rubræ , pulicum morsibus similes , non ultra cutim summam eminentes. Maximum autem vitæ periculum ostendunt , cum , ut interdum fit , lividæ vel nigræ evadunt ; hæ enim reverâ sunt gangrænulæ , ideòque quo plures numero comparent , eo gravior subest metus.

ERRANT plerùmque in hoc casu medici , statim in principio medicamentis , quæ sanguinem & humores calefaciunt , sudores movendo. Tutius longè est , ut modo proposui , *pulvere bezoardico* , vel potiùs *contrayervæ composito* , adjecto *nitro* , serpentem gangrænam prohibere ; aut *confectione cardiacâ* , *aquâ alexeteriâ simplici* soluta , adjecto *aceto vini* , naturam adjuvare : *spiritum* etiam *vitrioli dulcem* potulentis instillare ; *vino Rhenano* vires refice-

ficere : deniquè *hordei decoctum* , adjecto *succo limoniorum* , potui dare , convenientissimum erit. Omnes autem istiusmodi liquores affatim bibendi sunt. Ad sudores etiam movendos *calcem antimonii* , adjuncto *pulvere bezoardico* , per intervalla exhibere interdum ex usu erit ; *calcem* verò non nimis lotam esse volo. Illud tamen opus est monere ; quod non rarò fit , præsertim sub morbi finem , ut oppressæ ægri vires medicamenta calidiora , cordi utilia desiderent ; qualia sunt *radix serpentariæ Virginianæ* , *contrayervæ* , *valerianæ sylvestris* , *crocus* , & similia. Horum autem infusiones ex aqua ipsis pulveribus erunt longè commodiores , præsertim si *aceti destillati* portio aliqua admisceatur.

S E C T I O VI. E R Y S I P E L A S.

NON levem attentionem requirit illa febris , quæ secum erysipelas conjunctum habet. In hac enim non tantùm dolor , sitis , & inquietudo vexant ; sed & pustulæ in variis corporis partibus in gangrænam interdum abeunt.

SANGUIS igitur copia fatis larga quam primum mittendis erit , deinde potionibus catharticis alvus iterum atque iterum movenda. Hæ autem , quales febribus conveniunt , lenes esse debent ; infusiones nimirum *senæ* , adjuncta *manna*. Neque sanè alius quivis morbus acutus faciliùs iteratam purgationem fert , præsertim ubi cum tumore inflammatio caput obsidet ; serpit enim in horas humor , & partes vicinas trahit.

ATTAMEN periculosum est fomentis calidis ac materiam peccantem discutiendam uti ; multoque magis , unguentis , vel linimentis frigidis eam reprimere. Sin autem quacunque in parte cutis gangræna vitiata sit , decocto *herbarum amararum* , adjecto *spiritu vini camphorato* , pars fovenda erit ; deinde cataplasma ex *farina avenacea* , in *cerevisia* , quæ *fortis* dicitur , cocta , dum calet , imponi , & , quoties opus sit , renovari debet.

ET ut id quidem semel admoneam ; non in morbis tantum acutis , sed chronicis etiam multis , in quibus pustulæ cum suppuratione oriuntur , tutius & salubrius est , nisi malum in cute tantum-

tummodò hæreat, leniter propellere, aut saltem aliquamdiu finire ut erumpant (quantùm scilicet molestiam hanc ferre possit æger) quam repellere, aut per alias vias foras expurgare. Habent enim humores vitiosi suam quique indolem, cumque per modum crisis plerumque prorumpant, quantumvis minui possint; vix tamen cum bonis ægri rebus per alios meatus, quàm quos natura monstrat, è corpore prorsus exeunt.

INTERNA remedia non alia, quàm quæ in *exanthematibus* modo proposita fuere, hic usui erunt.

FINEM de febribus malignis differendi faciam, postquam de duobus tribusve remediis præter ea, quæ supra memoravi, aliquid dixero. Observatu autem dignum est, illa omnia maxima sudores movendi virtute pollere.

CAMPHORAM in primis laudant multi. Et quidem, ut de aliis auctoribus nihil dicam, extat apud *Riverium*, medicum experientissimum, narratio una & altera de insigni ab illa præstito juvamine. (1)

B 5

fo-

(1) Vid. *Observ. Medic. Centur. II. Observat. 18.*

folam, sed medicamentis refrigerantibus conjunctam (id quod in *febris petechialibus* faciendum monui, ubi calida remedia exhibentur) profuisse; maximo enim calore illa prædita est. Ideòque commodissimum erit forma hujusmodi adsumi: Drachmæ ejus una, cum paulò *spiritus vinosi* trita, *sacchari purissimi*, uncia dimidiæ perfectè admisceatur; tum *aceti calefacti* libra una sensim affundatur. Hoc modo remedium illud, quod alioquin ad nauseam concitandam aptum est, ventriculo gratiùs fit, & morbo etiam accommodatiùs.

EADEM ratione etiam *spiritus Mindereri* in febribus putridis quibuscunque usus est eximii. (I)

MOSCHI denique vires, urgentibus præsertim convulsionibus non semel expertus sum. Dedi autem, iteratis vicibus devorandum, bolum ex *hujus, confectiōis cardiacæ, & cinnabaris antimonii*, singulorum scrupulo semis, confectum.

(I) *Pharmacop. Edinburg.*

SECTIO



S E C T I O VII.

D E

FEBRIBUS SINGULARIBUS.

QUÆ cum partium aliquarum inflammatione conjunguntur febres, partibus illis congruentem curationem desiderant, Exemplo erit.

P L E U R I T I S.

IN hac enim detracto primum, quantum opus est, sanguine; ad tussim levandam, *olei ex seminibus lini recens expressi* potiones; ad refrigerandum, *nitrum*; ad sanguinem in canaliculis suis hærentem solvendum, *sanguis hirci sylvestris*, *saliaque volatilia*; denique ad foras extrahendum peccantem humorem, emplastrum vesicatorium lateri affecto impositum, insigniter profunt. Et externi quidem hujus remedii commodum, quod à sagacissimo *Mayernio* primum edoctus fui, (1) multis jam annis compertum habeo. Sub finem autem morbi, remittente jam inflammatione, alvum laxare oportet.

IL-

(1) *De morbis internis Syntagma primum, Cap. V. De pleuritide.*

ILLUD autem non est prætermittendum ; fieri nimirum interdum , ut in hoc morbo , & magis etiam in peripneumonia , inflammata primum , inde & pleuræ adhærente , extima pulmonis membrana , eveniat abscessus perulentus , quem *empyema* vocant. Hoc in casu , si foras se ostenderit humor , imponendum est medicamentum causticum , quo emittatur. Ulcus autem per totam vitam apertum servare oportet. Vidi enim cum , eo sanato , & materiæ purulentæ effluxu prohibito , brevi moreretur æger.



SECTIO VIII.

DE

FEBRIBUS INTERMITTENTIBUS.

FEBREM intermittentem non satis tuto *cortice Peruviano* discuti posse , nisi primum eliciatur vomitus , & alvi etiam dejectiones ciëantur , haud ignotum est ; at huic remedio lene aliquod catharticum adjungi novum fortasse videbitur. Minui enim , quinimò frustra esse , hujus pharmaci vires vulgò putant medici nostri ; nisi intereà ,
dum

dum id assumitur, venter sit adstrictus. Longa autem me docuit experientia necesse planè esse, exiguam portionem *rhabarbari* remedio huic admiscere; eâ scilicet ratione; ut alvus bis saltem quotidie deiciat. Neque unquam virtutem illius hoc modo fractam, sed feliciter potiùs auctam fuisse, animadverti. Licèt enim ea, quæ valentiùs irritant, sanguinem & humores perturbando irrita reddant omnia: moderatâ tamen purgatione id consequimur, ut ingesta quæcunque, sive medicamenta sive cibos, faciliùs concoquat ventriculus; & ex his, quod tenue & corpori est utile, in venas emittat.

CONSILIUM cepi *corticem* hunc febribus accommodatissimum sic exhibendi, postquam annis abhinc ferè viginti febres intermittentes, quæ tunc per populum solito sæviùs grassabantur, in malum corporis habitum, imò & hydropem, frequenter desinere percepi; cui malo occurri posse credebam istiusmodi curatione. Nec me spes mea fefellit. Quod ut statim comperi, quotiescunque humoribus crassioribus gravatum corpus offenderem, eandem tenui

nui medendi viam. At cautio tamen erat, ne ultra modum purgare pergerem. Idcirco, cum jam drachma una aut altera *rhobarbari* assumpta fuerit, ab exinanitione desistere soleo, & celebris hujus antidoti usui per se insistere. Et præter memorata jam commoda illud etiam observavi; quod, depulso hæc medendi ratione morbo, iterati in eundem lapsus minor semper est metus.

SUPER insigni autem hoc medicamento illud porro monendum habeo, quod non aliis, quàm intermittentibus febribus congruit. In continuis enim adeò non prodest, ut multum obsit; atque in hæcticis illis, quæ cum exulceratione partium aliquarum internarum sunt conjunctæ, perniciosum est; licet circuitus suos hæc frequenter habeant, & intermittens aut quotidianæ, aut tertianæ, speciem præbeant. Unde fortassis conjicere licet, in bilem solummodò hoc remedium vires suas exercere; hunc enim humorem in intermittentibus maximè peccare mihi minimè dubium videtur.

EVENIT autem non rarò, ut etiam in febre reverâ intermittente effectum non


non fortiatur magnum hoc Dei donum ; quod ob malum corporis temperamentum plerumque accidit. Dispicere igitur oportet, qua in parte sit vitium ; quod in visceribus, & glandulis abdominis, ut plurimum hæere deprehenditur. Purgationibus itaque, interdum & vomitionibus, opus est ; quibus interponenda sunt ea medicamenta, quæ obstructions referant, & ventriculi concoctionem juvant ; inter quæ amara, quæ simul aromatica sunt, & è ferro parata, principem locum tenent. Et hanc sanè ob causam febres quartanæ aliis quibuscunque intermittentibus curatu sunt difficiliiores : in his enim inertes sunt, & ultra modum viscidi, sanguis & humores omnes ; ita ut duplici morbo occurrendum sit, tum malo corporis temperamento, tum etiam feбри. Idcirco, adjunctis *cortici Peruviano radice serpentariæ Virginianæ & chalybe*, res plerumque benè agitur. Quanquam nec illud hîc observare alienum erit, me pluries, *cortice* ipso votis non respondente, pulvere ex *floribus chamæmeli, myrrha, saleque absinthii*, abjecto paulò *aluminis*, compos-

posito febres intermittentes depulisse.

PLUS autem periculi habet illud febris intermittens genus, quàm *ἡμικεῖταιον*, hoc est, *semitertianam*, Græci appellarunt. Hæc tertio quidem die revertitur, atque ex octo & quadraginta horis sex & triginta ferè per accessionem occupat; interdum verò plus vel minus, neque ex toto in remissione desistit, sed tantum fit levior. Hinc rectè *Galenus* ex quotidiana continua & tertiana intermittente illam confusam esse dixit. (I)

PROPRIAM igitur animadversionem desiderat hic morbus; qui quidem ex inflammatione partium internarum, quæ adjunctam habet obstructionem ab humoribus biliosis, & lymphâ nimium tenaci, exoriri videtur. Mittendus ergo erit semel aut iterum, pro ratione virium, sanguis. Alvus etiam per vires laxari debet, medicamentis verò lenissimis, qualia sunt *sal diureticus*, *manna*, *sale cathartico Glauberi* addito, & consimilia. Neque *corticis Peruviani* usum festinare oportet; metus enim est, ne viscerum meatibus magis adhuc

adhuc ab illo oppilatis, augeatur inflammatio, aut febris hectica succedat. Longè tutius erit potiones primum ex *succo limoniorum*, commisto *sale absinthii*, adjectâ etiam *aquâ cinnamomi simplici*, frequenter hauriendas ægroto præbere.



S E C T I O IX.

D E

FEBRIBUS VULGARIBUS, SIVE
PUBLICE GRASSANTIBUS.

FEBRES vulgares ex vitio aëris nobis circumflui oriuntur. Id autem à cœli temperamentis, calore, frigore, siccitate, & humiditate maximè fit; ubi nimirum horum quodvis aut exsuperat, aut intempestivè alterum ab altero excipitur.

IN Græcia & Asia tota, ubi sibi æqualia ut plurimum sunt anni tempora, & venti à diversis plagis statim ferè mensibus spirant, vires sapientibus promptum erat tempestatum varietates, commodaque & incommoda, quæ secum ferebant, observare. Atque hæc observatio artem morbos præfagiendi

C

usu

34 DE FEBRIBUS VULGARIBUS,

usu diuturno fecit; in qua medicinæ parens, *Hippocrates*, primus excelluit.

IN nostris autem regionibus tanta est cœli inconstantia, & tot causæ ventos, incertis vicibus secum pugnantes, concitant, ut nulla de his certa ratio iniri possit. Idcirco *Sydenhamus* noster, qui *Hippocraticæ* doctrinæ æmulis febres anniverfarias, harumque pro variis tempestatum generibus diversas species describere aggressus est, didicit tandem, „ Se nihil promovisse in causis morborum epidemicorum expiscandis manifestas aëris qualitates notando : quippè qui animadverterit annos, quoad manifestam aëris temperiem sibi planè consentientes, dispari admodum morborum agmine infestari; & vice versâ : item varias esse annorum constitutiones, quæ neque calori neque frigori, non sicco humidove, ortum suum debent; sed ab occulta potiùs & inexplicabili quadam alteratione in ipsis terræ visceribus pendent. (1) ”

RES hæc, meo saltem iudicio, ita se habet : Multum valere in morbis vulga-

(1) *De morbis epidem. Cap. II.*

garibus gignendis manifestas aëris qualitates extra dubium est; quibus & aliæ accedunt causæ, quæ vim illarum multis modis, nunc augendo, nunc minuendo, immutant. Hæ ex terra in primis oriuntur, ubi nimirum, ut sapienter dixit *Lucretius*,

*Putrorem humida nacta est,
Intempestivis pluviisque & solibus
icta. (I)*

Ut terrestris autem ille putror plurimum nascitur ex corruptis varii generis herbis, interdum etiam ex animalium cadaveribus, atque mineralibus; ita aquæ, stagna præsertim & paludes, quæ suas herbas, suaque animalia alunt, eodem modo pestiferos sæpè exhalant spiritus, circumfusi aëris inquinamenta. In hunc censum denique veniunt, rariùs tamen in nostris plagis, maris fluminumque inundationes, terræ motus, montium eruptiones, & quæcunque aliæ insignes rerum naturalium mutationes, æthera, quem spiramus, corpusculis vitæ nostræ minùs idoneis replere possunt. Hæc enim corpora nostra afficiunt, & morbis oportuna reddunt.

C 2 SECTIO

S E C T I O X.

DE FEBRIBUS LENTIS, SIVE
HECTICIS.

TOT habent causas, easque multum diversas, febres lentæ, quæ *hecticæ* vulgò dicuntur; ut non idem morbus, sed alius atque alius esse videantur. Omnium autem perniciosissimæ sunt, quæ ex partis alicujus in corpore præcipuæ, pulmonis in primis, exulceratione originem trahunt, materia nempe purulenta sanguini commista, quæ motum ejus inordinatè turbat.

Id autem animadvertendum est; illos maximè his pulmonis exulcerationibus obnoxios esse, quos pueros aut juvenes strumæ vexaverant. Quocirca, memini olim experientissimum medicum, *Radclivium*, dicere solitum, phthises in nostris & frigidioribus regionibus esse plerùmque strumosas. Sæpissimè itaque videmus in tabidis, post mortem incisis, pulmonem tuberculis seu glandulis induratis obsitum, quæ suppurantia pus exspuerant.

VARIOS hujus morbi gradus, eorumque invicem successiones, accuratè descripserunt medici; nonnullas tamen

men ex primis illius causis suas habere periodos haud satis animadverterunt. Hisce autem circuitibus, quantum id fieri possit, occurrere quam maximè proderit. Ita non paucos certis temporibus, aut sanguinis spūto, aut pituitæ tenuis in pectus fluxione, interdum & bilis flavæ rejectione tentari videmus. His omnibus nobile illud antidotum, *cortex Peruvianus*, adjunctis illis, quæ pulmoni conveniunt, opitulabitur; ante tempus nimirum datus, quo malum recurrere solet: quod & in aliis pariter hæmorrhagiis obtinet. Hoc verò medicamentum, cum jam exulceratus est pulmo, plurimum nocet; uti mox dicetur.

IN pulmonis autem ulceribus *lactis* usum in primis commendant medici, ut duplici commodo in medicinam pariter ac nutrimentum cedat. Cautione tamen hic opus est, quoniam nonnulli naturâ lac averfantur. Quinetiam in capitis doloribus, ac febribus acutis, factâque hinc nimîa siti; item si præcordia tumeant, seu biliosæ sint alvi dejectiones, aut multum sanguinis cum iis fluxerit; pro veneno lac semper repu-

38 DE FEBRIBUS LENTIS,

tari debet. (1) *Asinimum* autem apud nos maximè eligitur, quod aliis licèt minùs nutriat, magis tamen calorem temperat, & deterget. Sed ubi illud non in promptu est, *serum lactis vaccini*, vel etiam *caprini*, præsertim si herbis suave olentibus pasta fuerint capræ, in ejus locum commodè substitui potest; ipsum verò *lac vaccinum*, quantumvis *decocto bordei*, ut moris est, diluatur, sæpissimè non convenit. Neque alienum erit *serum* illud, infusis herbis quibusdam, quæ stomacho gratae sint, & flatus discutiant, morbo accommodatiùs parare. At infeliciter interdùm evenit, ut, cùm lactis usum maximè desiderat corpus, tanta sit intestinorum lævitas, ut illud ferre non possint. Cùm in tali igitur loco res sit, illud hoc modo componendum est: *Flores rosarum rubrarum siccatarum, balaustia, cortex malorum granatorum, cinnamomum*, singulorum drachma una, coquuntur in *lactis vaccini* libra una. Cùm ebullire incipit, *frigida aqua* affunditur parva portione, ut restinguatur & subsidat; finitur
ite-

(1) *Hippocr. Aphor. Sect. v. 64.*

iterum ebullire, & eodem modo restinguitur; idque toties faciendum est, donec libra una absumpta, lactis simul & aquæ quod restat, libræ unius mensuram adæquet. Tum colandus est liquor, quem totum, commisso *saccharo*, partitis, uti commodum erit, haustibus, ægrotus ebibet quotidie. Hac viâ nutritur simul corpus, & venter comprimitur; nec quicquam obstat aliorum ciborum, vel medicamentorum, usui hujusmodi diata.

MOMENTI autem longè maximi est, ut incipienti diro huic morbo occurratur; cùmque ab inflammatione oriatur, missio sanguinis in primis necessaria est, non semel tantum, sed vicibus iteratis. Is, si crassus & niger, aut glutinosus profluxerit, vitiosus dicitur, & utiliter effundi putatur; contrà verò, si ruber sit & pelluceat, integer habetur, neque ultra detrahitur. At facilis est hac in re in errorem lapsus. Non rarò enim, cùm sanguis maximè effervesceat, missus è vena summo cum rubore crassus & glutinosus est; in quo statu eo usque emitti debet, dum minùs ruber minùsque glutinosus evaserit, quod sine

periculo fiat. Consilium autem temerarium fortassè videbitur, marcescente jam corpore, & fractis viribus, hoc auxilii genus tentare. At præstat certè anceps remedium experiri, quàm nulum; & cum emolumento minuuntur vires, ubi succurritur in vitio, quod robur corporis assiduè plus labefactabit. Idcirco si, exulcerato pulmone, vehemens febris urgeat, detractio, quantam sustinere potest æger, juvabit; divisa nimirum in ea temporis spatia, quæ ad corpus alendum necessaria sunt, ista medicina. Novi fanè, rebus nondum planè desperatis, benè cessisse hanc medendi rationem; sin secus acciderit, eum medicus occidisse minimè censerì debet, qui, corruptis jam visceribus, nequaquam servari potuit.

FINEM his imponam, postquam monuerim in casibus nonnullis utilissimum esse balsamicis, qualia sunt *thus*, *styrax*, *succinum benzoinum*, humores acres & falsos delenire ac temperare; quæ in prunas injecta vaporare debent, ut fumus eorum per tubum aptum in asperam arteriam & pulmonem recipiatur.

tur. (I) Scio vix in usu esse hanc medicinam, & tanquam inutilem à plerisque negligi. Quisquis autem secum reputaverit, quàm longo itinere, per canales scilicet sanguinis, res hujusmodi ad pulmonem ferantur, & quàm exigua illarum pars ad locum destinatum perveniat; is sanè facilè videbit, si quâ in illis sit virtus, hâc potissimùm viâ impertiri posse.

OB eandem quoque rationem novi fumum ex *balsamo Tolutano*, more *tabaci*, per tubum commodum in pulmones inspiratum usûs fuisse eximii, præcipuè in sanguinis sputo.

EXIGUIS autem his suppurationibus subjungendus videtur largior, qui hoc in viscere quandoque fit, abscessus, quæ *vomica* nuncupatur. Is morbus, etsi gravis sit, & in tabem sæpè desinat, haud tantùm periculi affert, quàm minores illæ exulcerationes. Vidi enim, cùm materiæ purulentæ usque adeò graveolentis & foetidæ, ut adstantes cubiculum ferre non possent, libra una aut altera, admisto sanguine, tussi re-

C 5

(I) Vid. *Christophori Benedicti Theatrum tabidorum, sub finem. Londini MDCLVI.*

jiceretur; & tamen lacteæ diætæ & balsamicorum usu, interpositis pro re nata anodynis, in integram sanitatem æger restitutus est.

HÆC de *phthisi* dicta sunt.

DUÆ autem sunt aliæ *tabis* species, quæ diversis modis hominem confundunt. In una corpus non alitur, & naturaliter semper aliquibus decedentibus, nullisque in locum eorum subeuntibus, summa macies oritur, quam *atrophiā* nominant. Hæc liquoris, qui in nervis est, vitio sæpissimè debetur; & *cachexiam*, quæ est altera species, conjunctam habet, aut gradatim infert. In utraque propter malum corporis habitum alimenta corrumpuntur, & partes refectionem non accipiunt; ideòque vitæ genus rectè ordinatum, & medicamenta ex *chalybe*, quæ stomachum confirment, laxatâ subindè alvo, apprimè sunt necessaria.

IN omni denique tabe exercitationibus, & fricationibus, pro virium ratione constanter uti oportet; cœli mutatio plerùmque convenit; quin & interdum longa navigatio. Ex nostra regione, malè affecto pulmone, aptissimè
Ulyssi-

Ulyssiponem aut amœnissimam Neapolim itur. Equo autem vehi, dum imbecillitas id non prohibet, vel saltem curru, lecticâ, aut alio modo corpus movere, nunquam non expedit.





CAPUT II.

DE

MORBIS CAPITIS.

SECTIO I.

APOPLEXIA.

CONGENERES sunt plerique capitis morbi, & à repletione ut plurimum ortum trahunt, quorum præcipuus est apoplexia. Hæc à sanguine nimis viscido, per arterias capitis tardiùs fluente, & ferè stagnante, interdum oritur; qui perpetuo vi cordis propulsus exiles suos canales dirumpit, & in cerebrum effusus, nervorumque motibus corporis inservientium tubulos comprimens, humoris sui in eos illapsum prohibet. Sæpiùs autem illam progignit, sine insigni canalium diruptione, liquor aquosus & rubicundus ex sanguine profusus; aut etiam glandularum
cir-

circumjacentium exsudans succus, qui tum cerebri membranas obruit, tum ventriculos ejus opplet, & spirituum animalium iter intercludit. Illam *sanguineam*, hanc *pituitosam*, appellare licebit. Priorem autem *fortem* vocavit *Hippocrates*, atque insanabilem esse dixit; alteram *levem*, curatu tamen difficilem esse monuit. (1) Utriusque generis casuum quàm plurimæ narrationes ex libro doctissimi *Wepferi*, medici Scafhusani, peti possunt. (2) Rationes verò omnium, quæ in hoc & consimilibus morbis contingunt, dilucidè exposuit magnus ille rationalis medicinæ auctor, *Laurentius Bellini*. (3)

DE causis externis, quales sunt ictus, lapsus ab alto, & hinc fractum calvariae os, nihil hic dicam; quoniam illæ, nisi quatenus chirurgi manum requirunt, iisdem remediis curantur.

SANGUINEA autem detractiones sanguinis, tam è brachio, quàm ex venis jugularibus, larga copia, sæpiùsque repetitas; pituitosa purgationes per al-

(1) *Aphor. Sect. II. Aphor. 42.*

(2) Vid. ipsius observationes anatomicas ex cadaveribus eorum, quos sustulit apoplexia. *Amstel. MDCCXXII.*

(3) *In libro de morbis capitis.*

vum magis desiderat. Permagnum quoque auxilium est in venarum occipitalium incisione, quam proposuit vir cum arte anatomica tum doctrinâ medicâ insignis, *Joan. Bapt. Morgagnius*; (1) quam & ipse quidem in maximè periclitantibus magnoperè juvasse non semel expertus sum. Etenim cum venæ istæ intra cranium cum laterali utroque sinu communicent; illis incisis, pars sanguinis, quem in hos convectoræ erant, avertitur, & reliqua copia nonnihil minuitur, motusque per eodem facilius peragitur. Idcirco cucurbitulæ sub ipso occipitio, & ad latera colli-admotæ, cute scalpello profundis satis vulnusculis concisâ, quo sanguis ubertim effluat, nunquam non ex usu sunt.

NEQUE aliâ ratione juvat, si quid juvare poterit, à nonnullis laudata, arteriarum in temporibus inciso; per hanc enim copia sanguinis in cranium derivandi minuitur. Et *Galenus* quidem tuto satis, & sine magno incommodo, arteriam etiam in ipso brachio in-

(1) *Adversar. anatom. VI. animad. 73. & 74.*

incisam se vidisse testatur. (1) At tantilla sanè est portio, quæ hâc viâ demitur, ut magnum aliquod commodum inde sperari nequeat. Satiùs itaque fuerit, ut in *cephalæa* præcipit *Aretæus*, *geminas pone aures arterias secare*; (2) ex his enim major, quàm ex eis in temporibus, profluat sanguinis in caput ruentis copia.

VESICATORIA etiam capiti, & membris omnibus, imponi debent. Cathartica verò, tam quæ per os assumi, quàm per alvum infundi solent (his enim semper opus est) acria, magnâque vi stimulandi ac pungendi intestina prædita, esse oportet; sensus enim fibrarum in nervis ferè deperditur.

Lethargus & *Carus* sunt leviores apoplexiæ species.

(1) *Method. Medend. Lib. V. cap. 7.*

(2) *De morb. dinturn. curat. Lib. 1. cap. 2.*





S E C T I O II.

P A R A L Y S I S.

DESINIT ut plurimum, nisi mors intercedat, apoplexia in nervorum resolutionem, quæ morbi est solutio. Hæc autem plerumque alterum tantum corporis latus occupat. Quod verò observavit idem ille *Morgagnius*, *in opposita semper cerebri parte se, seditis apoplecticorum cadaveribus, perspexisse morbi causam*; id ipse meminisse me olim in nosocomio non semel comperisse.

NULLUS jam sanguinis missionibus locus est, nec catharticis vehementioribus; calidis & modicè moventibus, quale est *tinctura sacra*, alvum interdum laxare fatis erit. Cùmque morbus jam longus sit, pro vesicatoriis, in locis idoneis, præsertim sub occipitio, & supra scapulas, vel ferramentis candentibus, vel medicamentis causticis, ulcera, quæ *fonticulos* vocant, excitare oportet. *Hippocrates* inunctiones minimùm

nimùm octo fieri præcepit, assignatis singulis suis loculis. (1)

REMEDIIIS aromaticis, quæ fibras roborent, adjuncto *chalybe*, res præcipuè agenda est. Quinetiam prodest torpentis aut resoluti membri summam cutem exasperare. Id optimè præstat *unguentum viride*, cui adjectus fuerit *spiritus vitrioli fortis* eâ proportionem, ut septima vel octava spiritûs pars sit; quod, ubi corpus rubere cœperit, removendum est, ejusque loco *unguentum sambucinum* illiniendum. Multùm juvat in ætate non nimis profectis frigida lavatio, calidæ verò immerfiones omnibus paralyticis nocent. Et ipse quidem novi nonnullos, qui, cum vanâ medicorum spe delusi ad thermas nostras Bathonienses profecti essent, ex aqua calida egressi, mox iterùm apoplexia correpti sunt, ac perierunt.

OBLATA igitur hâc occasione, super hisce aquis quædam mihi comperta in medium proferam. Virtus illarum præcipua in minerali quodam calore, quo ventriculum & intestina foveant, mihi consistere videtur; idcirco his maxime

D

opi-


(1) *De morbis, Lib. 11. sect. 12.*

opitulantur, qui vino, aut id genus liquoribus, cum appetitum ad cibos, tum facultatem illos concoquendi perdididerunt, undè quam plurima provenire mala novimus. Alienissimæ autem sunt omnibus, quibus partes internæ, cerebrum, pulmo, jecur, aut renes, ultra modum incalescunt. Et ob eandem causam, tametsi hæ vi suâ jucundâ stomacho laboranti opem præbeant: sæpiùs tamen, si diu in illarum usu persistatur, huic ipsi visceri damnum afferunt; calore illo, qui primum profuit, immodica perseverantia, ob nimiam fibrarum resolutionem, in detrimentum cedente. Id quod non rarò vidi iis præsertim contingere, qui morbis conflictabantur à vitio fluidi, quòd nervos irrigat, originem trahentibus.

MORBUS hic nunquam acutus, sæpè longus, in senibus ferè insanabilis est. Miseram autem vitam plerùmque trahit, qui illo afficitur: vis enim animi cum memoria deperditur; & luctuosum spectaculum, non jam homo, sed animal semimortuum, contremit & vacillat.

CHOREA SANCTI VITI.

MORBUM hunc , facie pariter ac nomine ridiculum , paralyticam affectionem esse , & frequenti lavatione frigida , medicamentisque ex *chalybe* paratis , dispelli jam olim monui. (1)



S E C T I O III.

EPILEPSIA ET VERTIGO.

DE utroque hoc morbo legi velim ea , quæ in alio libro tam ad recursus quàm ad remedia , spectantia fusiùs proposui. (2)

MONITUM autem unum & alterum ibi dictis hìc adjungere libet. Priùs est , sæpius ventriculi magis , quàm capitis , morbum esse vertiginem ; aut saltem utramque partem simul laborare , gravato nempe biliosâ & viscidâ colluvie intestino. Ubi id contingit , frustrà sunt remedia quæcunque , nisi priùs *vino ipecacoanhæ* , aut alio quodam vomitiones proritante medicamento , onere suo levatum fuerit viscus. Postea verò appetitum simul & ciborum

D 2

con-

(1) *De imperio solis ac lune* , edit. alter. pag. 36.

(2) *Ibidem* , pag. 34. & seqq. 31. & seqq.


concoctionem optimè juvabit *elixir vitrioli Mynsichti*, ex aqua fontana, horâ unâ vel alterâ ante & post prandium, assumptum.

ALTERUM, quod addi velim, hoc est, *corticem* scilicet *Peruvianum*, conjuncto remedio, morbo accommodato, sæpe multum prodesse, in primis si hoc modo assumatur : *℞. corticis Peruvian. ʒj. rad. valerian. sylv. pulv. ʒij. syr. è cort. aurant. q. f. f. electuarium.* Hujus, præmissis debitis exinanitionibus, devoret æger bolum pondō ʒj. mane & vesperi, tribus mensibus continuis; deindè repetat triduo, vel quatrduo, ante novam plenamque lunam.

T E T A N U S.

RARUS iste affectus est, musculorum scilicet universi corporis, præter naturam facta, validissima convulsio. Iis igitur cedit remediis, quæ in epilepsia proficiunt.





CAPUT III.

DE

INSANIA.

NULLUS morbus infania magis pertimescendus est. Quid enim miseriùs, quàm hominem ratione & intelligentiâ privari; in alios more ferarum sævire; compedibus, vinctulis, & plagis, ne vel sibi vel alteri noceat, coerceri: aut, mutatâ rerum facie, demisso animo moestum esse; vanis imaginibus assiduè terreri; spectra sibi adstantia fingere; & peractâ continuis anxietatibus hâc vitâ, pœnas æternas (quod interdum fit) post mortem secuturas horrere? Quibus omnibus illud accedit miserandum, quòd difficillimè curationem accipiat hæc calamitas. Cæterùm quo dilucidius intelli-

gantur ea, quæ de hoc morbo experientiâ doctus exponenda habeo, pauca quædam de illius natura præfari libet.

FREQUENTISSIMA hujus mali causa est nimia animi intentio, diuque una aliqua in re, etiam cum jucunda sit, defixa cogitatio. Hæc enim, cum sola est, mentem perturbare potest, ut in literarum studiosis videmus; ubi verò animi motus accefferint, ut spes, metus, ira, & alii id genus affectus, gravior multò fit morbus: & pro causæ natura, maximè verò prout ingenium ejus, qui laborat, ad has aut illas affectiones proclivius erit, dementia vel cum tristitia, vel cum furore, hominem occupat. Attamen nihil ita mentem pervertit, ut amor & religio: religionem dico falsam & inanem. In amore insunt spes, timor, suspiciones, & interdum ab his ira ac odium. Religio ista vanis terroribus, & suppliciorum perferendorum imaginibus, animum implet ac distrahit. Hinc evenit, ut amantes magis cum furore, religiosi cum mœrore, insaniant.

AT commutantur tamen, & variæ commiscentur, hæc affectiones. MA-

MAXIME autem infanit homo, ubi contrariis motionibus mens simul agitur; ut cùm ira & metus eodem tempore occupant, aut gaudio & tristitiâ perturbatur animus; diversè enim trahitur isto modo affectus, & miserè laceratus se dedit.

SCIMUS id omnes, ita comparatam esse fabricam nostram, ut, quaecunque rerum species, quæ prodesse aut nocere nobis possint, menti se offerunt, subitas affectiones, iisque motiones in corpore consentaneas, necessariò concitent. Ita lætitia, moeror, spes, metus, cupiditas, ira, etiam nobis invitis, sanguinem & humores agitando corpus commutant & impellunt. Eodem reddit, veræ an fictæ sint istæ imagines, modo mens in eas intenta & infixæ, iisdem diu fuerit addicta; quin & fortius percellere & irritare animum imaginaria, quàm vera mala, sæpiissimè comperimus. Ita quam falso sibi instantem quis fingit, illa, quæ reverâ affligit, adeò intolerabilior est paupertas, ut non rarò ad mortem sibi nefariè consciscendam meticulosos adducat. Usque adeò miseriis patet nostra omnis vita!

INSTRUMENTUM harum omnium motionum, tam mentis quàm corporis, est fluidum illud subtilissimum nervis infusum, quod *spiritus animales* vulgò appellant. De hujus autem natura nos jam olim conjecturam fecimus, (1) ostendimusque ipsum interdum mutationes suas subire; cujus quidem rei documentum insigne dat hic, de quo nunc agitur, morbus.

INSANIÆ duo genera describunt auctores, quorum utrumque est constans error mentis sine magna febre; alterum cum furore & audacia, alterum cum tristitia & metu; quorum illud *maniam*, hoc *melancholiam* appellant. Hæc autem gradu tantum, ut plurimum, differunt. Melancholia enim nunc citiùs, nunc tardiùs, in maniam sæpissimè transit; &, remittente furore, gravior ferè redit tristitia: hinc furibundi omnes sunt timidi & pusillanimes. Id quod in curationibus observasse permagni usûs est. Ipsos autem spiritus animales diversas, & à natura sua alienas, proprietates in omni dementia, ut dixi, acquirere facilè demon-

(1) Vid. *Introduction to the Essays on poisons*, edit. 3.

monstratur. Attamen illud maximè mirandum est in hac ægritudine, quòd non tantùm ea laborantes aliis morbis immunes sæpe conservat; sed & ubi quemquam occupat illis implicitum, ita quasi totum hominem sibi assumit & vindicat, ut eos non rarò depellat ac profliget. Neque id in levibus solum valetudinibus contingit; sed etiam in gravioribus, & quæ magnum alias periculum afferre possent: ut dicere hìc liceat.

Aliquisque malo fuit usus in illo.

Duo, quæ hanc rem confirmant, insignia exempla me vidisse memini. Virginem curabam annos natam circiter viginti, mente satis alacrem, corpore nimis imbecillam; quæ ex malo habitu diu protracto in hydropem abdominis inciderat, marcescentibus interim membris. Cùm, remediis quibuscunque frustra tentatis, spes nulla salutis affulgeret; supervenit repentè, nescio qua de causâ, insania cum maximis anxietatibus & vanissimis animi terroribus; se enim in judicium vocandam esse ob crimen læsæ majestatis, &

capite plectendam imaginabatur. Interea corpus vires acquirere, & ventris tumor subsidere cernebatur; ita ut brevi valentiorē medicinam, utrique morbo convenientem, ferre posse videretur. Idcirco vomitu, purgatione per alvum, & medicamentis, tum quæ urinam cient, tum quæ stomachum juvant, ita res agebatur, ut post aliquot menses mens sana sano cum corpore rediret.

ALTER, quem dixi, morbus à priorē quodam modo diversus, virginem etiam afflixit; quæ annum agens vice-simum & octavum sputo sanguinis, ex pulmone cum tussi perpetuo ferè prorumpentis, vexabatur. Itaque missus est è brachio copia satis larga sanguis, altero quoque die, ad quinque aut sex vices. Minuebatur hinc, non tamen cessabat malum; & transactis duobus mensibus, supervenit febris hectica, siti, calore, & nocturnis sudoribus commitata; cum summa macie, viscidæque ac tenacis materiæ frequenti excreatione, quæ ex faucium & pulmonis glandulis ferebatur, intermixtis hic illic puris flavi portiunculis. Instabat jam

ve-

vera phthisis, & mors præ foribus adesse videbatur. Ægra igitur de animæ salute sollicita esse cœpit. Præsto erant sacerdotes, qui cùm viam ad cœlum munire deberent, asperam contra & difficilem illam monstrabant, cum precibus, jejuniis, animique angoribus calcandam; quasi nimirum vitæ futuræ felicitas infelicitatibus & ærumnis præsentis vitæ tota esset redimenda. Quid tandem fit? Misellam, sacris terroribus victam, brevi invasit religiosa dementia; nocte dièque oculis obversabantur dæmonum species, flammæ sulphuræ, & poenarum apud inferos æternarum horrendæ imagines. Ab hoc autem tempore evanescere indies cœperunt, quæ morbus antecedens secum attulerat, incommoda; decrescere calor febrilis, sputum sisti, minui sudores, & habitus totus ita in meliorem verti, ut, quo minùs mens corpori regendo par erat, eo magis vires officiis vitæ sufficere viderentur. At paucos post dies prorsùs melancholica evasit. Morbus igitur exinanitionibus, prout vires ferre poterant, & idoneis remediis ita oppugnabatur, ut sanitatis

tis integræ spes aliqua ostenderetur. At, proh dolor ! Postquam tres menses ferè sunt elapsi, febre hecticâ cum pulmonis exulceratione reversâ, tabe confectâ periit meliori fato, ut visa est, digna puella.

TOTUS ergò in vi imaginandi consistit hic morbus. Lætificæ enim aut horrificæ species menti repræsentantur, quas more naturæ consueto motiones corporis, quæ cum illis conveniunt & quasi cohærent, necessitate quâdam consequuntur. Hinc bruta etiam animalia interdum insaniunt, quippè quæ (quicquid contra insani quidam dicant philosophi) ratione aliquâ naturæ suæ convenienti utuntur.

PERMAGNAM sanè esse hujus facultatis potentiam quotidie experimur. Quid enim mirabilius, quàm hominem in canem aut lupum converti, firmis adhuc viribus mortuum & cum mortuis versari, caput vitreum aut fictile gerere, se existimare ? Hæc tamen, & sexcenta similia, interdum evenire cernimus. Illud autem magis adhuc mirum, & penè incredibile, quod gravidis sæpe contingit. Notum est enim illas, cum fortè ma-

malacia tentantur, non rarò fructûs aut cibi alicujus, quem frustra appetiverant, notis corpus foetûs, quem in utero gestant, deformare, per omnem vitam aliquando duraturis. Mirifica quidem hæc sunt; at prodigii prorsûs simile est, quod ex narratione viri in mentis humanæ facultatibus investigandis perspicacissimi, *Malebranchii*, adjungam. (1) Erat in nosocomio Parisiensi incurabiliû dicto juvenis ab infantia mentis inops, cujus brachia & crura iis in locis disrupta videbantur, quibus in illa regione morte damnatis membra ista ferreo vehtë contundere mos est. Misellus iste per annos viginti vitam protraxit, concurrentibus ad eum visendum philosophis & medicis, qui manibus suis ossium, quæ dehiscebant, cava & hiatus contractabant. Non diu autem latuit infelicis hujus eventûs causa; mox enim compertum fuit matrem, dum puerum illum in utero ferret, terribili spectaculo interfuisse, cùm sons quidam eo, quod dixi, mortis genere plecteretur. Perterrefactam fuisse, facile est credere; quibus autem modis vis

(1) Vid. *Recherche de la verité. Tom. I. Liv. II. chap. 7*

vis ipsius imaginandi damnum tale foetui impertire posset, scire difficile. Ingeniose, ut solet, conjecturas suas super hac re persequitur Malebranchius. Sensum quendam internum esse dicit imaginandi facultatem, quæ omnis spirituum animalium ope peragitur; foetum verò corporis materni partem censeferi debere, ita ut, quicquid patitur pars aliqua matris, idem occultâ quâdam communicatione in partem foetus congruentem transeat. Percussa itaque horrendo viso prægnans dolorem, fortassis & fibrarum distractionem, iisdem in membris pertulit, quæ fracta spectavit in fonte; firmiora verò ipsius ossa resistere poterant illi injuriæ, cum eadem in tenerrimo infante vix dum formata facile difrumpebantur, nunquam denudò conjungenda. Attamen siue hæc, siue aliâ quâcunque viâ, res acciderit, imaginandi virtutem mirificè corpus afficere luculenter demonstrat.

HAUD immeritò quoque id mirum videatur, quod immodicum gaudium nimis diu protractum, pariter cum anxietate & mœrore, mentem pervertat. Hoc, ut videtur, eam ob causam fit, quòd

quòd jucundæ imagines , quæ menti perpetim obverfantur , ad alias res eam attendere non sinunt ; unde cum mille modis à speciebus , quæ necessariò assidue occurrunt , interpelletur & avocetur , turbæ oriuntur , quæ animum transfusum agunt & pessundant. His accedit sollicitudo & metus , ne felicem hunc rerum statum improvisa aliqua fortunæ adversæ clades evertat. Audivi olim *Haleum* , in nosocomio mente captorum Londinenfi medicum experientissimum , haud semel dicentem , anno MDCCXX civium nostrorum fortunis adeò infausto (quo societas ad commercium per Mare Australe promovendum instituta artibus dolosis ad lucrum faciendum viam invenit) se multò plures curæ suæ commissos tractasse ; quos ad immensas opes evexerat fortunæ favor , quàm quos iniqua fors ad miseriam & pauperiem redegerat. Usque adeò mentem corrumpit insatiabilis avaritia , & auri sacra fames !

ISTUD autem est adhuc mirabiliùs , quòd insani , in primis melancholici , magnoperè interdum sibi in animum inducunt , ut ea faciant , quæ maximum

do-

dolorem (quo nihil naturæ nostræ magis inimicum est) corpori adferunt. Cibus fame ferè enecti, perindè ac si venenum offerretur, averfantur, distentam etiam vesicam exonerare nolunt, summo cum cruciatu per integrum diem, vel diutiùs, urinam supprimentes. Istiusmodi in casibus mens à sensibus quodammodo avocari videtur, dum interim non potest non sentiri dolor; miser autem animum ad ea attendere, quæ intus in corpore geruntur, obstinatè renuit. Et verisimile est vanas quasdam imagines illum accepisse, quæ dolorem, quo cruciatur, perferre cogant: quales sunt, ni id faciat, se graviora passurum; hunc verò jussu divino in pœnam peccatorum sibi immitti, aut dæmonis inevitabili potentiâ, aut beneficio quodam effici; & id genus innumeræ. Nihil enim est tam incredibiliter ineptum, atque à ratione alienum, quin in læsam imaginationem cadere possit.

VERUMTAMEN, ut ad curam tanti hujusce mali tandem deveniam, illud ante omnia medicum considerare oportet, quas exinanitiones ferre possit æger: siquidem omnibus ferè modis de-
menda

menda est materia, modo vires id fiant; si illæ sint imbecilles, cibis idoneis & medicamentis primùm confirmandæ erunt, usque dum pati medicinam tuto possint. Nam haud rarò evenit, ut nimium exhaustis humoribus, furori succedat insanabilis animi dejectio & melancholia; quâ oppressus æger in perpetuis anxietatibus & mœstitia vitam trānsigit, heu! Nimis ut plurimum longam. Diutissimè enim magna ex parte vivunt insani. Modi autem præcipui, qui demendæ hujus morbi materiæ conveniunt, sunt sanguinis missio, vomitus, alvi purgationes, & urinæ fluxus. De hisce igitur singulis aliquid proponam.

SANGUIS commodissimè detrahitur aut ex brachio, aut ex vena jugulari, interdum etiam per cucurbitulas occipitio inciso admotas; nimirum si quando capitis dolor urgeat, aut ultra exhausti per venas sanguinem vires minimè patiantur.

VOMITUS optimè excitatur *vino ipecacanhæ* in infirmioribus; in robustioribus verò *tinctura veratri*, aut *vino antimoniali*.

ALVI dejectiones moliri commodissimum est *belleboro nigro*; aut *infuso senæ*, adjunctâ *tincturâ jalapii*: aut deniquè *aloë*, si fortè mensium in foeminis, vel hæmorrhoidum in viris, suppressio sanguinis per naturales hæc vias profusionem desideret. Has verò omnes exinanitiones, tum quæ per vomitum, tum quæ per dejectiones fiunt, ægrum, frequenter repetere oportet; ita ut per vices aliæ aliis interponantur. Neque illud addere alienum est, valentiora plerùmque medicamenta requirere hunc morbum, cùm nervi haud facilè hic irritentur.

MAJORIS autem momenti est, quàm vulgò existimatur, per renes depletio, præsertim cùm furor conjunctum habet febrilem ardorem. Melancholicis enim parùm prodest, quos ut plurimum nimis largum urinæ profluvium sollicitat. Diuretica autem hîc aptissima sunt *salia ex lixiviis herbarum crematarum* parata, & *sal diureticus* dictus; quorum alterutrum per vices exhibere licebit, idque portione satis largâ.

CUM illis, quæ morbum minuunt,
ad-

adnumeranda forsan videbuntur emplastra vesicatoria capiti admota; quæ tamen nimiâ irritatione nocere potius, quàm juvare, sæpè deprehendi. Magis conveniet veterum more caput ad cutem tondere; deinde *aceto*, in quo *rosar. flores*, aut *hederæ terrestris folia* infusa sint, frequenter fovere & madefacere; item *setaceum*, quod barbarâ voce chirurgi appellant, sub occipite apponere. Illud autem hoc modo efficitur: Funiculus ex filis sat multis sericeis acus foramini inditur; dein, factâ perforatione, subter cutem transversus conjicitur, sic ut spatium duorum ferè digitorum comprehendat; tum per aliud, cuspide acûs factum, vulnusculum educitur. Illinendus autem est unguento aliquo digestivo, & quotidie movendus, quo ex ulcere pus exeat. Nihilominus tamen in longo morbo vesicatoria interdum proficiunt.

INTEREA dum hisce modis expelluntur noxii humores, iis etiam remediis pugnandum est, quæ corpus immutant. Diæta tenuis esse debet, ex jussulis maximè *varinæ avenacæ*, aut

bordei ; & cibis ex media materia. Alendum enim corpus est , ne vires deficient , & detractionibus necessariis ferendis impares evadant.

MEDICAMENTA plurima apud auctores , cum veteres tum recentiores , commendantur ; quorum alia maniacis , alia melancholicis conveniunt ; utraque autem eo collineant , ut bilem corrigant ; quæ acris primum , deinde viscida , & picis instar atra fit. Quin & sanguinis ipsius habitus in hoc morbo crassus est , & tenax , nigroque colore ; undè incisa cadavera cerebrum ficcum , & tantum non friabile , sanguinisque canales atro ac lento cruore distentos ostendunt. Illud autem animadvertere ex usu erit , pleraque , quæ ad humorum vitium emendandum apta sunt , medicamina vi aliquâ exilissimos glandularum meatus aperiendi , & subtilissimos liquores è corpore propellendi pollere. Hujus generis sunt gummi graveolentia , in primis *asa fœtida* , *myrrha* , *castoreum Russicum* , & *camphora* ; quam vi etiam anodynâ polle-
re , & certius tutiusque , quàm ipsum *opium* , somnum arcessere , nonnulli
aucto-

auctores experti affirmant. Melancholicis etiam convenientissima sunt quæcunque è *ferro* parata. Plurimum denique juvat, in furoribus præsertim, ægrum balneo frigido frequenter immergere. *Capiti* enim, ut monet Celsus, *nihil æquè prodest, atque aqua frigida.* (1).

RESTAT adhuc, ut quomodo continendi sint infani proponam, quo nihil ad sanitatem plùs confert. Et aliâ quidem ratione in maniacis, alia in melancholicis, opus est. Illorum reprimenda audacia; horum spes excitanda est, & erigendus animus. Neque tamen illos, qui violentiùs se gerunt, asperioribus onerare coërcitionibus, & verberibus multare, necesse est, cùm satis sit vincere; meticulosi enim sunt, ut jam dixi, omnes, & cùm per tempus aliquod superatos se senserint; manus facilè dant in posterum, neque vel sibi vel aliis vim inferre audent.

DIFFICILIOR res est cum iis, qui aut cum nimia tristitia, aut nimia hilaritate desipiunt; quorum animis pro cuiusque natura medicum se accommodare

E 3 ne-

neceſſè eſt. Aliorum igitur riſus intempeſtivus objurgatione & minis prohibendus eſt ; aliorum triftes cogitationes diſcutiendæ , ad quod ſymphoniæ & ludi , quibus olim delectabantur , multùm ſæpe valent. Et muſica quidem quomodo corpus pariter ac animum afficiendo juvet , jam olim explicui. (1)

ILLUD autem perpetuò ſervandum eſt , ut imaginibus , quæ diu occuparunt , aliæ contrariæ menti adferantur , quo novis cogitationibus paulatim ſe affueſcat. Ut enim in corpore , morbo aut exercitiis fracto , imperanda eſt quies & laboris intermiſſio ; ſic animum à vanis , quas accepit , ſpeciebus omnibus modis abduci oportet. Id autem conſequemur , ſi ad ea , quæ diverſis motionibus exercent , convertamus. Idcirco in falſis timoribus , qui longum inhæſerunt , veris periculis terrefacere , & pavorem incutere , nonnunquam prodeſt. Hi autem veri terrores falſorum iſtorum naturâ diſſimiles eſſe debent , ut mentem diverſo modo exagitent.

(1) *Mechanical account of poiſons , Eſſays III.* Vid. etiam , quæ huc facientia dixit *Arctæus , De curat. acutor. Lib. I.*

tent. Mens enim quiescere nescit, curis verò & sollicitudine vacuâ esse potest, & mutatio idearum pro oblectamento & studiorum intermissione est habenda; pariter ac membrorum musculi, uno aliquo labore fatigati, ad alias actiones conversi refocillantur.

CORPORIS exercitationes nunquam negligendæ sunt. Ambulare; equo vehi; pila, globis, ludisve similibus uti; natâre; quin & terrâ marique peregrinari, multum juvat: hisce enim tum fabricæ universæ robur confirmatur, tum assiduâ rerum objectarum permutatione mens ad se rediens sapere discit.

UNICAM tantum animadversionem hætenus dictis adjiciam. Anodyna medicamenta ad somnum arcessendum rarissimè in hoc morbo juvant. Nihilominus autem in casibus nonnullis; ut in magnis animi terroribus, aut ubi per longam sollicitudinem, vel tristitiam, pervigilio fatigatus est æger; illa experiri non alienum est. Neque tamen diu in his persistendum; non rarò enim, etiam cum somnum inducant, expergiscitur laborans, terrificis imaginibus gravius quàm antea tentatus.

FINEM dicendi faciam , postquam monuero , nullo in morbo majorem de iterato in ægritudinem lapsu esse metum : quo circa , quæcunque proposuimus auxilia , sive ad medicinam , sive ad diætam , & vivendi morem pertinent ; ea omnia , etiam cùm jam convaluerit æger , ad satis longum tempus per intervalla in usum revocari debent.





CAPUT IV.

DE

ANGINA.

ANGINÆ varias species diligenter exposuerunt auctores medici; at tres tamen, quæ sunt omnium acutissimæ & maximè perniciosæ, non satis pro morbi natura dilucidè explanarunt. Harum primam *aquosam*, alteram *tonsillarum gangrænam*, tertiam *faucium strangulationem* appellare licet.

IN prima igitur oris, palati, & vicinarum partium glandulæ distenduntur & tumescunt. In altera tonsillas occupat inflammatio sine perfecta suppuratione; illæ tument, & indurescunt; illic fit gangræna, quæ nisi citissimè succurratur, est lethalis. In tertia, nervis omnibus convulsione distentis, ager

subitò concidit mortuus. Tertiam hanc speciem ipse semel vidi ; & licet bis sex horarum spatio detractus fuerat largissimè sanguis , nihil profuit tanta exinanitio. Incisæ autem post mortem fauces ne minimam quidem tumoris , vel inflammationis , in glandulis aut musculis notam ostendebant ; sanguine verò crassiori turgidæ arteriæ , venæque omnes , ubique prominebant. Morbum hunc , etsi rarus sit , descripsit *Hippocrates*. *Ex anginis , inquit , gravissimæ sunt , & celerrime interimunt , quæ neque in faucibus , neque in cervice , quidquam conspicuum faciunt ; plurimum verò doloris & orthopnææ inducunt.* (1) Præceptum autem in omnibus hisce malis est periculum , cui non uno modo occurrere oportet.

MEMINI , elapsis jam aliquot , annis , apud *Wallenses* , in locis præsertim mari vicinis , in febris popularis modum sævisse aquosam istam luem , multosque intra biduum aut triduum ea correptos periisse. Medico cuidam illic degenti rogatus consilium dedi , ut , misso quàm pri-

(1) In *Prognostic*.

primùm copiâ fatis largâ sanguino , & laxatè vel clystere , vel , si id fieri posset , leni potione alvo , emplastra vesicatoria sub mento & ad latera colli ad-moveret ; sin autem per hæc parùm proficeretur , ut in palato circa uvam , venasque sub lingua , plagis fatis altis vulnera infligeret , quibus morbus erumperet. Interim febris causa ter die quaterve assumendum suasi pulverem , ex *pulvere contrayervæ composito* , & *nitro purissimo* , pari portione confectum. Illa cura quàm plurimis salutis fuit.

IN tonsillarum gangræna , detracto primum sanguine , & lotionibus ducta alvo , unicum remedium est , glandulas hæcæ tribus quatuorve in locis , vulneribus fatis profundis scalpello incidere , quæ *melle rosaceo* , adjecta *mellis Ægyptiaci* aliquâ portione , sunt curanda : interim tamen os faucesque *hordei* & *ficuum decocto* colluere oportet. Hæc autem in principio morbi fieri convenit ; post biduum enim aut tri-duum ad gulam serpit malum , & exitiale est. Vidi nonnullos hæc medendi viâ salvos evasisse ; alios verò , in quibus

bus eâ neglectâ, aut serò tendata fuerat, periisse : cùm medici interim adstantes, quoniam calor febrilis imminutus videbatur, nihil periculi subesse, & rem in vado esse, existimarent; qui animadvertisse certè debuerant, pulsum ægri vacillantem, summam inquietudinem, & sudores frigidos se invicem excipientes, instantis fati prænuncios esse.

MORBUS iste pueros præcipuè infestat, cujus descriptionem accuratissimè, ut omnia, tradidit *Aretæus*; (1) quam commentario luculento illustravit doctissimus *Severinus*, παιδαγωγὸν λοιμώδην vocans, atque hanc ipsam, quam proposui, medicinam commendans: (2) quin & eandem olim executus est Latinus *Hippocrates*, *Celsus*. (3)

STRANGULATIO faucium, quam tertiam anginae perniciosæ speciem dixi, si prævideri possit, depletionibus omnis ge-


(1) *De causis & signis morborum acutorum*, Lib. 1. c. 9.

(2) *Diatriba. De pestilente ac præfocante pueros abscessu*, Operi. *De recondita abscessuum natura* adjuncta. *Frankfurti*, MDCXLIII.

(3) *Lib. VI. cap. 10.*

generis præcaveri debet ; sanguinis scilicet detractionibus , purgationibus , emplastris vesicatoriis , fonticulis , medicamentisque urinam moventibus. Neque etiam inutilis est abstinencia , moderatio nimirum in cibo & potu.





CAPUT V.

DE

MORBIS PECTORIS.

DE

ASTHMA TE.



DIFFICULTATEM spirandi plurimæ, eæque inter se multùm diversæ, causæ efficiunt. Quidquid enim facit, ut circumfusus aër solitò minùs promptè in pulmonis intima penetret, morbum hunc concitat. Ad respirationem autem in primis necessarium est, ut thorax dilatetur; quod septi transversi, musculorum intercostalium, & illorum, qui abdomini incumbunt, motionibus peragitur. Juxta illud, opes est aërem in asperam arteriam recipi; cum hujus igitur meatûs

tu-

tumore, vel humoribus viscidioribus, sunt interclusi, spiritus ægrè trahitur. Deinde ipsius spirabilis elementi ratio hinc habenda est; si enim gravius solito aut levius sit, visceris hujus vesiculas, in quas irruit, haud satis magnà vi distendit. Sensus etiam ipsius pulmonis non rarò hanc ægritudinem infert. Vidi nempe nonnullos, qui cùm sub crasso urbis æthere satis commodè agerent, rus petentes ab aëre sereno, qui plerisque hoc incommodo laborantibus levamen efficit, in gravissimam dyspnœam sunt delapsi. Respirationis denique impedimentis adnumerari debet sanguinis per pulmonem difficilis transitus. Id autem variis modis evenire posse manifestum est; tam scilicet ipsius cordis, quàm sanguinis vitio. Cordis vis debiliior sanguinem minùs propellit; hic verò, si fortè nimis crassus fuerit, ægrius movetur, & in canalibus suis quodammodo hærens aëris officium perturbat & moratur. Plures morbi hujusce causæ enumerari possint; sed istæ sunt præcipuæ, quarum aliæ aliis conjunctæ ineluctabile interdùm exitium procreant.

MULTIPLEX hoc malum multiplicem
po-

postulat medicinam ; in omni autem ejus genere auxilium est , nisi aliquid prohibet ; in sanguinis detractiōe. Neque id satis est : vomitus etiam , si pituita tenax pulmonem aut ventriculum gravat , apprimè utilis est ; & is quidem frequenter repetitus. Alvam laxam habere oportet , quæ catharticis tamen vehementioribus minimè sollicitanda est ; satis pierùmque ad hanc rem erit singulis noctibus pilulas dare , ex paribus portionibus *pilulæ Rufi* & *gummi ammoniaci* confectas. Ægro cibis & potionibus flatulentis quibuscvis omninò interdicare oportet. Exercitationibus ferè ad lassitudinem ; & fricationibus , præcipuè inferiorum partium , & per se ipsum , & per alios , usque ad sudorem ferè utendum est.

IN ipsis accessionibus , quantum potest , spiritûs angustiam levare oportet. Id faciunt , si humores viscosi sunt & tenaces , *oxymel scilliticum aquæ cinnamomi simplici* commistum ; *allium* , sive crudeum , sive conditum. Sin autem nervorum liquor in culpa est , gummi omnia graveolentia , in primis *lac ammoniaci* dictum conveniunt. At meminisse

nisse convenit, anodyna remedia, quæ in priore casu pestifera sunt, in hoc plurimum proficere, *salibus*, nempè, aut *spiritibus volatilibus* dictis, conjuncta; inter hujusmodi verò compositiones non alia præstantior est illa, quæ nomine *elixiris paregorici* prostat.

SED enim cùm nonnulli, vitio aliquo corporis aut humorum, levissimis quibusvis de causis in hunc morbum incidunt; quibus modis eum præcavere oporteat, dicendum est. Ratio igitur cum temperamenti ægrotantis, tum ipsius morbi naturæ, hic haberi debet. Illud, si calidum sit, refrigerantia & acida, mitiora tamen, postulat; inter quæ præstant *acetum* & *oxymelita* quæcunque. Sin corporis constitutio sit frigidior, calefacientia nonnulla usui erunt; qualia sunt, *radix enulæ campanæ*, *zedoariæ*, *sagapenum*, *myrrha*, & consimilia. Vomitus in utroque subinde ciere convenit; alvumque lenibus catharticis, quæ non nimis sollicitent, quale est *sal Glauberi* dictum, subducere. Aqua pro potu commodissima est, adjecto vini paululo.


QUONIAM autem in omni hoc morbo sanguis plus minùs effervesceat, huic excandescentiæ nobili illo remedio *cor-tice Peruviano*, iis præsertim temporibus assumpto, quibus recurrere soleat difficultas respirandi, occurrere optimum erit. Et novi quidem illum, commisto *cinnabari antimonii*, nonnunquam insigniter profuisse.

POSTREMO id minimè prætermitti debet, quod fonticuli, quos vocant, supra scapulas inusti suspiriosis quibuscunque sint auxilio. Et hos quidem non solum humores emittendo, sed & distensionem nervorum nimiam minuendo, tam in hoc, quàm in aliis quibusdam morbis prodesse, fas est credere.

CAUTE tamen in his omnibus agere oportet. A nimis frequentibus sanguinis detractionibus hydropis metus est. Senibus nocet nimia aquæ potio. Exercitationes vehementiores spiritum angustum faciunt. Magna deniquè acidorum copia fibrillas nervorum constringendo anhelitum difficilem reddit. Ita modus etiam in ipsa medicina servandus est.

DE hoc autem, simulque de aliis pectoris

toris morbis, consuli velim *Laurentium Bellini de morbis capitis, pectoris, &c.*



CAPUT VI.

DE

MORBIS CORDIS.

✱✱✱ OR, motuum omnium animalium instrumentum primum, vitæque nostræ ✱✱✱
 ✱✱✱ C ✱✱✱ quasi principium & fons, ✱✱✱
 ✱✱✱ cum musculus sit, vel potius plurium ✱✱✱
 musculorum, congeries; iisdem, quibus alii corporis muscoli, patet incommodis.

AFFECTIO autem, quâ frequentissimè laborat, est *palpitatio*, undè per exiguum temporis spatium motus ejus interrumpitur. Ex causis admodum variis hæc ortum habet. Nonnunquam enim resolutæ fibræ haud satis valido impetu sanguinem propellunt. Interdum polypus, in ventriculis aut auriculis hærens, vim ejus eludit. Aliàs evenit, ut spissior simul & copiosior

F. 2 san-

sanguis difficulter in canales suos feratur. Item aquâ in pericardio abundante (quod rarò tamen accidit) musculi hujus motus impediri potest. Concreta quoque lapidea illum turbant. Est etiam, ubi tendines in ductuum orificiis, in fenibus præsertim, ossileam duritiem acquisiverint; quo, amisâ vi elasticâ, motui protrudenti nimis resistitur. Nec præterire oportet, quòd sanguinis etiam inopia morbum hunc facere possit. Hinc enim fit, ut spiritus animales minus, quàm par est, in cerebro secernantur; undè prohibetur cordis contractio, pulsûsque fit intermissio.

NON est autem alienum hìc adnotare, affectionem hanc plerùmque esse convulsionem; quâ, cum cor sanguinem uno nisu non satis propellere potest, vim suam repetere debet: documento sanè insigni, sicut ante exposui, motus etiam istos, qui non voluntarii dicuntur, ab animo nostro regi & mutari. (1)

ILLUD deniquè præfagationis loco adjungendum videtur; quod violenter in-

(1) Vid. *Introductionem*.

infectans, & sæpiùs recurrens, hoc malum in *syncopen* tandem, seu fatalem virium defectum (quam alteram cordis affectionem censent auctores) plerùmque definit.

Tot variis casibus medelam etiam variam accommodare oportet. Illud autem in **universis** tenendum est, nisi vires sint admodùm imbecillæ, sanguinem detrahi posse; quo, cùm debilior sit ad propellendum vis cordis, minuatür liquoris propellendi pondus. Et quidem non rarò à plenitudine etiam oriri non tantùm cordis palpitatiõnem, sed & ipsam *syncopen*, animadvertimus; ita soliti cujuscvis fluxûs suppressioni, ut ex naribus aut hæmorrhoidibus, frequenter succedit præceps iste virium lapsus; undè ad præcavendum hoc malum utilissima certè erit sanguinis missio. Vix autem aliæ quævis exinanitiones ferri possunt. Resolutio fibrarum ea, quæ in capite *de paralyssi* sunt exposita, desiderat. Crassior sanguis, qui polypum generat, medicamentis attenuantibus, qualia sunt spiritus volatiles dicti, & gummi graveolentia, emendatur. Vesicato-

ria autem , in primis si sopor urgeat ,
deficiente animo , optimè stimulant &
languentem excitant.



C A P U T VII.

D E

MORBIS VENTRICULI

E T


I N T E S T I N O R U M .



N morbis ventriculi & intestinorum non minùs ea ,
quæ cavere , quàm quæ
facere oportet , propo-
nenda habeo. Et primo
quidem , quanquam pituitam viscidam ,
quæ stomachum gravat , vomitu inter-
dùm ejicere maximè necessarium sit ;
frequentibus tamen vomitionibus mo-
tum illum naturalem , quo alimenta
deorsùm pelluntur , invertere ciborum
concoctionem plurimùm perturbat &
impedit.

APPETITUM ad cibos acuunt herba-
rum amararum infusiones , & ipsam sæ-
pè

pè concoctionem adjuvant ; at metus est , ne longus illarum usus fibras musculares nimis calefaciat. Quocirca acidis quibusdam , præsertim *elixire vitrioli Mynsichti* , illas simul adstringere non rarò convenientiùs est ; eâ tamen adhibitâ cautione , ut , dum adhuc tenax est , quæ ventriculo inhæret pituita , illis abstinetur. Frequentissimum enim stomachi malum est , quo resolvitur ; idque certè fibrarum ejus constrictionem desiderat.



SECTION I.

ALVI FLUXUS.

VENTRIS fluxus non difficulter coërcetur. De illo loquor , qui sine febre est ; nam ubi hæc adest , num morbum solvere poterit , deliberare oportet. Cùm sola autem cita alvus exercet , satis plerùmque erit , assumpto semel aut bis *vino ipecacoanhæ* , ventrem *rhabarbaro* aliquoties purgare ; deinde aromaticis , adjunctâ *cretâ* , aut *bolo Gallicâ* , intestina roborare.

D Y S E N T E R I A.

DIFFICILIOR res est, ubi dyfenteria, aut torminibus, intestina excruciantur. Illa enim plerumque intus exulcerantur, & cruor manat; qui modo cum stercore aliquo semper liquido, modo cum quibusdam quasi mucosis excernitur, simulque carnosæ quædam descendunt; frequens quoque deijciendi est cupiditas, dolorque in ano; exiguum interim emittitur, eoque tormentum intenditur; & cum ab inflammatione oriatur hoc malum, nunquam non adest febricula.

SEMPER igitur, ut ad curationem veniam, primum sanguinem mittere expedit. Deinde vomitus utilissimus est; quem *vino ipecacœanæ*, non semel, sed ter quaterve, interposito biduo vel triduo, elicere optimum erit.

INTER has exinanitiones, & etiam postea, adhibenda sunt medicamenta, quæ fluxum cohibeant, & simul membranas exulceratas sanent. Neque ullum remedium mihi compertum est illo præstantius, quod ex *confectiōe cardiaca*, & *bolo Gallica* adjuncto extra-

ct.


cto Thebaico , componitur ; ita nimirum , ut illorum singulorum scrupulus unus , hujus granum unum , ter die adfumantur.

NEQUE inutiles sunt infusiones in alvum , maximè ex jusculis pinguibus , additâ *theriacâ Andromachi* ; aut saltem *electario è scordio* ; vel ex *decocto albo* , adjecto *amylo* ; vel loco illius *julepo è creta* , adjunctis , ubi opus fuerit , *extracti Thebaici* granis duobus aut tribus.

ILLUD deniquè animadvertere ex usu erit , malum interdùm corporis habitum efficere , ut hæc omnia parùm proficiant. Illis in casibus , non omittis cæteris , ea , quæ humores emendant , in usum vocare oportet ; & quidem *rhabbarbarum* , adjunctâ *mercurii sexies sublimati* exiguâ portione , iteratis vicibus dare convenientissimum erit.

PRÆTER hæc incommoda , *vomica* etiam interdùm , sive suppuratio interna , in ventriculo nascitur. Hoc quidem rarò fit , non semel tamen accidisse vidi ; cùm magnam profectò sanguinis simul & purulentæ materiæ copiam veomebatæger. Terret sanè iste casus ,

at plerùmque tamen non magnum periculum adfert; iisque adsumptis, quæ membranas exulceratas conglutinent, in primis *balsamo Locatelli*, redit sanitas.



S E C T I O II.

D E

I L E O.

ACUTISSIMUS morbus est is, quem ^{εὐλκὴν} dixerunt Græci, Celsus *tenuioris intestini morbum* vocavit. (1) Est autem vehemens intestini, inflammatio, quæ, nisi citò succurratur, brevi in gangrænam definit, & mors instat.

PROMPTISSIME igitur, & largâ copiâ, sanguinem detrahare oportet, non semel, sed iterùm, plerùmque etiam tertio. Inde venter laxandus est. Id autem difficillimè fit, quod acria nimis irritant, & vomitionibus rejiciuntur. Clysteribus itaque primùm res agenda est, interpositis catharticis; quorum illi stimulant, hæc lenia esse debent, ita ut mutuam sibi invicem

ope-

(1) *Lib. IV. cap. 13.*

operam præstent. Anodyna etiam necessaria sunt, sed cum purgantibus mixta. Commodissimum igitur erit dare *extracti cathartici* scrupulum unum, adjuncto *extracti Thebaici* grano uno; & post horas aliquot cochlearia duo *infusi senæ*, adjectâ *tincturæ senæ* quartâ parte, singulis vel alternis horis propinanda, usque dum dejectionum satis fuerit.

His si nihil proficiatur, *argentum vivum* bibendum præbere opportunum erit, quod quidem duplicem hic usum præstat; partim pondere suo inversum intestinorum motum restituendo, partimque lubricitate excrementa alvum opplentia emolliendo & deorsum propellendo. Idcirco copia satis magna id hauriendum est, libræ minimum pondus; quod repetere etiam plerumque opus est. Neque diu sanè tardare hoc experimentum oportet; quoniam metus est, ne, quod non rarò fit, inflammationi superveniat gangræna, quâ corruptis intestini tunicis, in abdomen effunditur ponderosum metallum.

NEQUE nihil deniquè juvant fomenta, in primis panni lanei calefacti, &
spi-

spiritu vini madidi ; aut etiam , ut præcepit Sydenhamus , *catulus vivens nudo ventri indefinenter accumbens*. (1) Longè autem balneo tepido corpus totum immergere. Et si nondùm discussus dolor sit , cucurbitulas circa umbilicum defigere convenit , cum levibus incisionibus.

EADEM viâ morbum illum atrocem , quem medici Galli *colicam Pictonum* ; nostrates in insulis Americanis , ubi frequentissimus est , *the dry belly ache* , appellant , curare oportet. Est enim dolor cum febre , & inflammatione , molestissimaque alvi astrictione conjunctus.



S E C T I O III.

D E

L U M B R I C I S.

NON rarò lumbrici occupant alvum. Et horum quidem tria sunt genera , *teretes* , & *ascarides* , qui pueros ; *latique* , omnium pessimi , qui adultos maximè infestant. De singulis eorum

(1) Vid. *Oper. p. 41. Lond. MDCCV.*

eorum plurimi scripserunt auctores. Latini autem descriptionem, additis etiam iconibus, omnium accuratissimè tradidit vir doctissimus, *Daniel Clericus*.

(1) Quam is igitur medicorum quorundam de hoc animalculo, quod singulari naturâ præditum videtur, errores redarguerit; quæ sequuntur, ex illo excerpere libuit. Et primò quidem, hunc non unicum esse vermem; sed plurium vermiculorum catenam, ex illo genere, quod *cucurbitinos* vocant, continuatâ ferie aliorum aliis adnexorum, manifestè apparet. Hi autem, digiti latitudinem habentes, interdum singuli ac separati in intestinis jacent, & per alvum excernuntur. Totus denique vermis conjunctus unum caput sortitur, idque satis acutum, rostro haud absimile; quo intestinis infixio, valdè pertinaciter illic hæret, ore pro nutrimento chylum fugens.

HISCE à Clerico observatis quædam à me usu comperta adjungam; vidi enim, & sanavi, non semel hunc morbum. Et id quidem mirum æquè & mo-

(1) *Historia naturalis & medica latorum lumbricorum. Genevæ, MDCCXV.*

molestum est, quod utcunque medicamentorum vi vermiculorum istorum aliquot foras sint ejecti; indies tamen renascuntur, reliquisque in corpore se adjungunt, usque dum aduncum illud caput exturbatum fuerit; & tum demum simul cum eo totum animal per anum exit, multorum saepe pedum longitudine. Neque mirum sanè est dolores inferre acutum illud rostrum; & hominem, cum monstroso & voracissimo hospiti alimentum assidue suppeditare debeat, macilentum fieri & contabescere.

OMNIBUS igitur modis extirpanda est hæc vermium perniciofa progenies. Idque, si teretes sint, aut ascarides, facili negotio peragitur. *Argentum vivum* quaecunque forma his exitiale est; *rhaborbaro* igitur, adjunctâ *mercurii dulcis sexies sublimati* exigua portione, alvum subinde purgare commodissimum erit. Diebus interjectis, *Æthiops mineralis* manè & vespèri assumptus relevet. Quin & ipsam aquam fontanam, si in aqua decoctum fuerit hoc metallum, potui dare ex usu erit. Prodest etiam aquam marinam bibere. Oleum

leum deniquè in alvum super dedisse juvat.

PROPRIAM autem curationem desiderat lumbricus latus. Ego jam à multis annis hujusmodi remedium efficacissimum esse usu comperi. *Stannum rasum*, cum æquali portione *coralli rubri*, in pulverem subtilissimum teritur; hujus drachma una, cum *conserva summitatum absinthii maritimi* in bolum redacta, bis die devoranda est.

POSTREMO, quibuscunque medicamentis expugnati fuerint hi intestini hostes; iisdem identidem repetitis, ne reviviscant, cavendum est.

NON alienum erit alium etiam vermem, his, quos descripsimus, multùm dissimilem, quippè qui non in intestinis, sed in membris, sedem occupat, miræque naturæ est, hic loci memorare. Illum dico, quem Arabes *venam Medinensem*, Græci *δρακόντιον*, Latini *dracunculum* nominarunt. Hunc primus descripsit Avicenna, adjectâ curatione. (1) Textum ejus Latinè vertit Georgius Hieronymus Velschius, & commentarii loco justum volumen,

va-

(1) *Lib. IV. Canon. sect. III. tract. II. cap. 21. & 22.*

variâ eruditione refertum, conscripfit. (1) Breviter autem summamque præcipua, quæ apud *Avicennam* occurrunt, exponam. Is igitur morbum hunc fieri dixit, *cùm in quibusdam corporis membris pustula exoritur, quæ intumescens deinde vesicam contrahit; mox eâ perforatâ, prodit rubri quidpiam ad nigredinem vergens, neque cessat continuò protendi; interdum motum habet vermicularem sub cute, ac si is animalis motus, & verè vermis esset.* *Galenus* autem hoc malum *ulcus* appellat, quod ad se nervum à propinqua parte delatum habet. (2)

SED reverâ vermis est iste morbus, in *Æthiopia*, *Africa* & *India* frequens. Est autem insectum aquaticum, quod acuto capite, & exili corpore, hominum membris, cruribus præsertim, inter lavandum se insinuat; & exiguum primò, membranas muscutorum humiditas depastum, majus fit & longius; mox rodendo cutim, inflammationem cum tumore excitat, quo suppurante, caput exerit animalculum, duos sæpè, aut

(1) *Augustæ Vindelicorum*, MDCLXXIV.

(2) *Definit. medic.*

aut tres, interdum & plures pedes longum.

CURANDI viam tum internis medicamentis, tum ope externâ, proponit *Avicenna*. Suadet autem, ut aloë tribus diebus consequentibus quotidie unius drachmæ pondere devoretur. Sin autem vermis hanc curam eludat, jamque prodiërit; tunc convenit ei præparare aliquid, cui adligetur, & supra quod blandè ac paulatim ita convolvatur, ut absque disruptione ad finem usque exeat. Optimum est plumbi frustum, supra quod convolvitur, idque justè ad trahendum ponderis fiat; tum extrahatur leniter, ne abrumpatur; & quæ sequuntur. Mihi olim in nosocomio hujusmodi casum intueri licuit, in nauta quodam ab Africa reverso.





CAPUT VIII.

DE

HYDROPE.

HYDROPS tres species nominant medici, cum antiqui tum recentiores : *leucophlegmatiam*, sive ἀνδρογάμα, hoc est, *inter cutem*; *tympanitem*; & *ascitem*. Communis omnium est humoris nimia abundantia, qui collectus tumorem facit; aut in toto corpore, ut in leucophlegmatia : aut in ventre, qui modo ita intenditur, ut creber intus ex spiritûs motu sonus fiat, sicut in tympanite; ubi etiam humoris aliquâ portio, ex vapore forsan condensato genita, plerùmque reperitur : modo ita repletur, ut motus aquæ, moto corpore aut pulsato manu abdomine, facilè sentiri possit, sicut in ascite.

SEDES leucophlegmatix est in membra-

brana ista, quam anatomici recentiores *adiposam*, vel potius *reticularem* seu *cellulosam*, vocant; quæ membranas corporis omnes & musculos interjacet.

TYMPANITES non est unius generis. Interdum vapor in cavo ventre conclusus abdomen prorsum pellit, quod pulsatum sonitum edit. Vapor autem is halitus est visceris alicujus corrupti vitio genitus & efflatus, ideòque emissus semper foetidissimus est. Istiusmodi casus rari sunt, vidi tamen in nosocomio Divi *Thomæ* insigne ejus exemplum. Senex erat, cui tanta cum duritie intumuit venter, ut percussus tympani in modum resonaret; nec fæces nec spiritus per alvum, propinatis licet valentissimis medicamentis catharticis, deorsum ferrebantur. Ex inciso post mortem abdomine prorupit cum sonitu halitus, qui tam gravi odore nares afficiebat, ut chirurgus se aura venenata percussum diceret. Mox foetoris hujus fons apparuit, intestinum nempe colon inflammatum, gangræna vitiatum, & ventriculo pariter corrupto adnatum. Nonnunquam autem sine putrefactione

G 2

ne

ne aura quædam elastica in abdomine genita, neque exitum inveniens, vi suâ membranas circumvestientes antroorsum pellit & tumefacit. Hæc non in cavo ventre, sed in ipsis intestinis concluditur; quæ ita distendit, ut vim suam refiliendi prorsus amittant, in immensum ferè auctâ illorum capacitate.

(1)

TERTIAM hydropis speciem ascitem esse dixi, quæ tribus modis progignitur. Nunc enim inter tendines musculorum abdominis, qui transversales dicuntur, & peritonæum aquâ effunditur, & illos ab hoc disjungens inflationem efficit; (2) nunc in medium tunicarum peritonæi (duplex enim est hæc membrana) illapsus humor harum distensione largum sibi receptaculum format; sæpissimè verò colluvies aquosa in amplo imi ventris spatio colligitur, & stagnat. Atque hanc sanè in mortuorum cadaveribus limpidissimam interdum vidi, funiculis multis pellucidis, qui ex tenuibus vesiculis quasi concatenatis constabant, innatantibus; quæ qui-

(1) Vid. *Memoires de l'Academie Royale*, MDCCXIII. pag. 235. & *Philosoph. Transactions*, Num. 414.

(2) Vid. *Cheselden's Anatomy*, Book III. chap. 4.

quidem disruptorum canalium, quibus lymphæ circumfertur, erant tunicae, quorum valvulae in partes eos disjunxerunt, & hydatides dictas formarunt.

NULLUS autem hydrops gravior est illo, qui in foeminis ovarum conceptacula occupat. Hæc enim primum indurescunt; mox inflammantur, & corrumpuntur; liquore etiam ex innumeris, qui partes hæc perreptant, lymphæ canaliculis erumpenti distenta, in magnam tandem molem excrescunt. Hinc rarissime cedit morbus remediis.

Et hisce præcipue modis aqua in ventre includitur, quorum omnium exempla non semel vidi; illud autem erat rarissimum, quod in nosocomio quondam sese obtulit. Vidua quædam duorum & quadraginta annorum, quæ nunquam peperat, per annum circiter de doloribus dorsi cum difficultate urinae conquesta sensit sibi intumescere abdomen, brevique manifesta hydrophis ascitis signaprehendebantur; quocirca per ventrem mittebatur aqua, non semel, sed ter; humore verò post singulas paracenteses citò iterum redundante, post duas vel tres hebdoma-

das ab ultima emissionē mortua est. Inciso cadavere, effluxit primum ex cavo, quod musculorum transversalium tendines à peritonæo sejuncti confecerant, magna aquæ copia, admistis multis hydatidibus largis & nondum disruptis. Dein, secto peritonæo, crassiusculi & visceridi humoris libræ septem aut octo sunteductæ, quibus glandulæ multæ corruptæ immiscebantur. Mirabamur jam nulla se in conspectum dare intestina, quæ frustra quæсивimus; donec crassa membrana corii instar dissecta, ventriculū & omnia intestina simul cum omento in angustum spatium coacta, & quasi occultata, tandem reperimus. Membrana hæc erat pars interior peritonæi, quod duplex esse jam diximus; cujus pars exterior, quum corium, ut notavi, propè referret, facile primâ facie ita nobis imposuit, ut totum esse peritonæum putaremus. Tres igitur, quas memoravi, hydropis ascitis species simul in hoc corpore, utili sanè accomodoque exemplo, oculis subiciebantur.

PRÆTER has omnes aquosas colluvies, alias etiam corporis sedes inundat

dat non rarò morbidus humor. Cerebrum & testiculi lymphâ nimia replentur. Nusquam autem periculosius, quàm in pectore, affligit aqua; quod illis plerùmque contingit, qui diurnâ spiritûs difficultate laborarunt; ea in primis, quæ à polypis in sanguinis canalibus hærentibus nascitur, dum tenuis liquor è sanguine expressus per pulmonum membranam transudat. Hunc non semel observavi ad libræ unius aut duarum mensuram, nunc in altero tantum, nunc in utroque thoracis latere, interdum etiam in ipso mediastino collectum. Etenim humor iste indies auctus, tandem pulmonum impediendo motum spiritum intercludit, & aeger improvisò moritur. Nonnunquam etiam in illis, qui diurnâ cordis palpitazione cum spirandi difficultate laborarunt, ipsum pericardium post mortem in immanem tumorem elatum, & magnâ aquæ copiâ distentum, repertum fuit.

SED ad curationes horum morborum veniendum est. In leucophlegmatia incisio in tibiæ parte interiore fieri debet, duobus super talum digitis, ita ut vulnus ad cellulosam membranam nec ul-

tra penetret, quo per dies aliquot frequens humor feratur; crus autem interea fovere oportet decocto herbarum emollientium & calidarum, adjecto *spiritu vinoso*, cui addita sit *camphora*. Hanc medicinam non tantum in hac morbi specie, sed & in ipso ascite multum profuisse, quin & interdum sanasse, multoties expertus sum; profluente per multos dies tantâ liquoris copiâ, ut fidem superet. Cavendum autem est, non in ea tantum incisione, sed & in omnibus, quæ in quacunque corporis parte aquæ educendæ causa fiunt, ne nimis inde exhauriantur vires; quas æquè prostermit humor ita emissus, ac si sanguinis ipsius tantundem efflueret. Ægrum igitur quovis modo sustinere oportet, ne curatio mortem acceleret; id quod mihi videre contigit, semel quidem mea ipsius non satis cautè ægroti robur æstimantis, atque iterum chirurgi temerarii culpâ. At mirum tamen est, quantam aquosi laticis sic effusi jacturam cum levamine ferant interdum hydropici. Cujus rei singulare testimonium proferre libet.

FOEMINA generosa, mihi cognata, annorum ferè quinquaginta, corpore firmo satis & robusto, hydropè intercute simul & ascite laborabat, ita in immensum tandem ventre distento, ut decumbens onus tam grave ferre nequiret. Cùm de vita ferè desperaretur, unicam spem salutis, eamque dubiam, in humoris è talo emissionè superesse dixi. Illa autem strenuè repugnabat, se itineris ex misera vita magnam partem jam emensam esse clamans, neque vellet regredi. At precibus demùm amicorum victa cessit; itaque ex vulnuscùlo in utroque crure eo modo, quem exposui, factò profluxit decem continuis diebus aqua, ad congii mensuram minimum quotidie. Interea fomentis calidis, & stomachi & virium causa, parti provisum est; hausitque bis die cyathum unum & alterum aquæ, in qua calefacta infusa essent herbarum folia amararum; quales sunt *absinthium Romanum*, *centaurium minus*, cum *radice gentianæ*, & *seminibus cardamomi minoris*, adjecto vino chalybeato. Singulis autem noctibus assumpsit potiunculam, mihi in frequenti usu,

ad ciendas hydropicorum urinas efficacem; quæ habet *oxymellis scillitic. 3j. fs. aq. cinnamom. simpl. 3j. sp. lavend. c. syr. e cort. aurant. singulorum 3j. M.* Convaluit fensim, & corpus ad pristinum statum rediit. Cùm autem vires id ferrent, idoneis medicamentis per alvum purgabatur. Et cathartica quidem paulò valentiora, eaque sæpiùs repetita, desiderat hic morbus; qualia sunt in primis *elaterium, mercurius sexies sublimatus, & jalapii radix.* Hæc igitur debitis intervallis interponebantur. Cætera autem, quæ dixi, ad longum tempus in usum assiduè adhibebantur; præsertim verò diureticus ille, quem descripsi, haustus per annum integrum nunquam intermittebatur. Ab his nulla unquam valetudine per quinque annos tentatâ, morbo acuto tandem correpta periit. Nullus autem dubito, quin totum illud aquarum diluvium, partim ex cellulosa membrana, partim ex sacco à tendinibus musculorum abdominis & peritonæo, aut duplicis membranæ peritonæi distensione, formato profluxerit.

ORDO prostat, ut de tympanite
jam

jam dicam. Is igitur, quem ex putrefactione visceris alicujus oriri significavi, prorsus insanabilis est. Qui autem ex aura in ipsis intestinis genita provenit, cathartorum non nimis irritantium assiduo usu, interpositis medicamentis, quæ flatus discutunt, curandus est; iis interim, quæ facillimè concoquuntur, in cibum assumptis. At corporis exercitatio non negligi debet. Neque inutile erit per alvum interdum infundere copiosam aquam calidam, atque illam recipere; simulque, quod præcepit *Celsus*, ferramentis candentibus ventrem pluribus locis exulcerare, & ulcera fervare diutiùs. (1) Sin autem hoc crudele videatur, vesicatoria abdomini imponere, & per intervalla repetere, in rem erit.

DIRUS semper morbus est hydrops ascites; five extra peritonæum ratione jam dictâ, five intra illud, five denique in ventris cavo aqua abundat. Cæterum quas exinanitiones ferre possit æger, in primis considerare hîc oportet. Ubi enim fractæ sunt vires, nocet vehemens per alvum purgatio; & quo plus hu-

(1) *Lib. III. cap. 21.*

humoris ex intestinis ejicitur, eò major ipsius copia brevi in ventrem refluit. Cùm id fieri animadvertit medicus, desistere debet, & per iter urinæ superabundantem aquam foras propellere. Incertæ autem virtutis sunt in hisce casibus medicamenta quæcunque, etiam illa, quæ præstantissima censentur diuretica; quæ in hoc enim respondent, in illo spem fallunt; aliud igitur atque aliud tentandum est. Ut plurimum vèrò ex *radice scillæ* parata omnium sunt efficacissima. Horum præcipua sunt, quam ex *oxymelle* proposui, potio: aut ipsius *radicis* recentis exigua portio, grana nimirum quinque aut sex; quæ cum *pulver. ari compos. ʒss. rad. zingib. gran. quinque* contundere, & cum *syrup. è cort. aurant.* in bolum cogere conveniet, singulis diebus manè devorandum: aut *acetum* deniquè *scilliticum*, quod stomacho minus ingratum erit, & ad propositum valentius, si hac viâ exhibeatur: *Succ. limon. ʒvj sal. absinth. ʒss.* miscentur; adjiciuntur *aq. cinnamom. simpl. ʒiss. syrup. è cortic. aurant. ʒj. aq. menth. piperit. spirituos. ʒss. acet. scillitici ʒj.* aut *ʒiss.* Haustus

stus ille bis die bibendus erit. Non inutiliter *cinerum genistæ* infusionem propter vim diureticam præcipiunt medici ; & est quidem sæpe commoda, modo potus consueti loco, admisto vini pauxillo, bibatur.

INSIGNIS autem est ad hanc rem, & memoratu dignissimus, nobilis foeminæ mihi notissimæ casus. Illa annos plus minus quinquaginta nata sensit in altero abdominis latere durum tumorem, qui sine dubio erat ipsum ovarium in immensam molem auctum ; hinc disruptis partem illam perreptantibus canaliculis, qui lympham vehunt, sensim fiebat hydrops ascites. Frustrà erant medicamenta quæcunque, sive purgantia, sive diuretica. Ter emissus est ferramento acuto ex ventre humor, qui brevi semper iterum in cavum influebat. Accidit tandem, ut eam inviseret anicula quædam rustica, quæ abdomen conspiciens non sine summo cruciatu distentum facile persuasit, ut singulis diebus, mane & vesperi, cochleare plenum *seminum sinapis* non contusorum devoraret, decoctique *summitatum viridum genistæ* semilibram insuper biberet. Postquam

quam triduum hoc modo amarum latitem perpotasset, maximum sensit levamen; quin & fitis, quæ molestissima fuerat, omninò sedata est. Alvum interdum duobus aut tribus continuis diebus movebat id medicamentum, & urina quotidie ad libras minimum quinque aut sex profluxit. Perstitit in hisce per annum, neque rediit morbus. Sapienter itaque medicos monuit *Hippocrates*, ut etiam à plebeiis sciscitarentur, si quid ad curationem utile esset. (I)

INUSITATUM fortassè videbitur, imò & periculofum, remedia, quæ ad somnum apta sunt, in hoc morbo adhibere. At illa tamen interdum eum usum præstant, ut etiam urinam moventibus accensenda sint. Ubi enim magnus dolor premit, profusionem ejus haud rarò incitant; non ob aliam, ut opinor, causam, quàm quòd fibras ductuum renalium relaxent, quas cruciatus semper constringit. Hujusce rei fidem faciet memorabilis, quam traditurus sum, narratio.

VIR quidam robustus, sobrius, & tem-

(I) Μὴ ὀκνεῖν παρὰ ἰδιωτῶν ἰσορίαν, ἢ τι δοκίμην ὑποφέρειν. *Lib. de præcept.*

temperantissimus, annorum circiter quadraginta, hydrope ascite simul & tympanite laborabat. Originem morbo dederat collisio, ab ictu violento ante sex ferè septimanas, in dextro hypochondrio facta. Indies ventris tumor augebatur, cum dolore gravissimo, siti intensâ, urina admodum pauca, eaque crassa & rubra. Adhibita sunt cum à me ipso, tum ab alio medico experientissimo, remedia quæcunque ad urinam movendam utilia; *sapo Venetus, salia lixiv.* *balsamum Gileadense, nitrum,* & similia; at incassum omnia. A catharticis valentioribus in pejus ruebat malum. Paracentesis imperata est, sed renitebantur amici. Cùm dolor jam esset intolerabilis, nec ulla spes de vita affulgeret; ut ~~ivtharactar~~ saltem consequeretur, de anodynis cogitare cœpi. Haustulum igitur cubitum ituro dabam bibendum, qui habebat *aq. menth. piperitid. ʒj. cinnam. simpl. ʒss. spirit. ʒij. tinct. Thebaic. gutt. xxx. lixiv. tartari ʒss. syr. ex alth. ʒj. M.* Ab illo insperatum levamen sensit; somnus, qui diu defecerat, obrepfit; profluente per vias eâ urinæ copiâ, ut illâ nocte libræ

mi-

minimum duæ redderentur. Hinc animus mirè confirmatus est. Cùmque æger, durante ἀναγληγορία, tum per veficam, tum per alvum, onus quod gravabat deponi; vi autem anodynæ finita, continuò redire, experiretur: juffus est eundem haufum octavâ quâque horâ repetere, donec brevi bis die fumpfiffe fatis effet. Quum autem ab affiduo hujus ufu minueretur appetitus, infufionis amaræ chalybeatæ cochlearia aliquot femel vel bis quotidie bibebat; nondùm neglecto, fi fortè dolor ingrueret, divini pharmaci foporiferi ufu. Hæc ita profecerunt, ut devoratis demùm bis die pilulis aliquot ex *pil. è ftyrac.* portione unâ, *corticis Peruviani* portionibus duabus, cum *terebint. Chia* confectis, perfectâ reftitueretur fanitas.

OPERÆ pretium erit hiftoriam quandam legere, quam narrat celeberrimus *Willifius*, huic noftræ planè fimilem. (1) Sed & expendi merentur, quæ ad hanc rem pertinentia protulit eruditiffimus *Sponius*. (2) Quem enim ille viginti venæ fectionibus fanatum hydro-

pem

(1) Vid. *Willif. Pharmaceut. ration. Part. I. feët. VII. cap. 1.*

(2) *Aphorism. Nov. Seët. V. aphor. 81.*

pem vidit, pariter ac iste, quem retulimus, ex nimio partium internarum ventris calore & inflammatione ortum habuisse, suspicari licet.

NON erit nunc à proposito alienum ab assumptione eorum, quæ juvare possunt, ad abstinentiam transire; eam dico, quâ quis ab omni potu per longum tempus se cohibet: hanc enim pro remedio etiam medici commendant. At difficillima sanè est ista medicina, cum fitis plerumque vehementer premit; quæ nisi sedetur, eam molestiam affert, ut vita non tanti videatur, ut homo illam tali cruciatu redimere velit. Novi tamen duos, qui, gravissimo hydropè ascite laborantes, longa istiusmodi patientia sibi ex toto temperando ad salutem perducti sunt. Illi autem bibendi cupiditatem os & fauces succo pomorum acidorum aut limoniorum eluendo, devorato subinde hujus aut illius aliquantillo, pertinaciter fallebant.

SIN autem neque per vulnus in talo, quemadmodum in leucophlegmatia proposui, neque per omnia dicta auxilia siccet venter, sed humor nihilo minus abundat; celeriori viâ succurrere

H

opor-

oportet, per ventrem ipsum emittendo. Hæc enim *ἐν χείρῳ* fervat interdum, raro jugulat, & tensionem abdominis minuendo semper dolorem potenter mitigat; quin &, quod maximi usûs est, medicinæ locum facit.

SCIO deterreri sæpè medicos ab hac medendi via, cujus rei causâ præcipua hæc est. Aqua, inquiunt, frustra emittitur, quæ vitiatis partibus internis renascatur; quin &, si temporis intervallis emittatur, in eundem locum citò refluat; sin omnis simul exeat, moritur statim æger. Et certissimum quidem est, corruptis jam visceribus rem esse desperatam, humorisque emissionem per intervalla factam nihil juvare, universi etiam effluxum plerùmque perniciosum esse. Cœpi igitur anno MDCCV illius rei causam investigare, ut tanto incommodo occurrere possem. Et illa quidem, ut opinor, hæc est. Longa abdominis à concluso humore distensione septum transversum nimis fursum pellitur, muscoli venteris extenduntur; sanguis per canales superiores, quàm per inferiores, expeditiùs fluit, aqua deniquè compressione suâ novam quandam partium

tium vicinarum dispositionem efficit; undè liquore omni simul semelque effuso, septi transversus motus, ut pro natura solet, deorsum illicò fertur, sanguis in canales inferiores impetu insolito ruit, & sublatà compressionis vi, fibræ eam quam priùs acquisiverant extensionem, & calorem quem dederat inclusus humor, derepentè amittunt; hinc oritur animi defectio, quæ sæpè graviùs recurrens, orto sudore frigido, mox occidit. Hoc igitur incommodum commodius præcaveri non posse videbatur, quàm abdomen à superioribus ad inferiora manibus fortiter comprimendo, dum aqua profunderet; & postquam omnis effluerat, fasciis illud satis vehementer adstringendo.

PLACUIT in nosocomio hoc primum tentare. Et cùm mulier quædam huic curationi satis idonea se mox offerret, simul ac ab inflicto vulnere prorumpere cœpit aqua, ipse sedula cura manibus meis supra umbilicum ab utroque latere positus ventrem deorsum compuli, mandans chirurgo, ut infra hanc partem simul isti rei operam daret; id autem interea animadverti, si vel per temporis

momentum manus amoverem, ægram actutum animo deficere. Postquam autem omnis humor effluxerat, fasciis laneis arctè constringebatur abdomen, panno laneo spiritu vinoso madefacto primum superimposito. Feliciter, & ex animi sententia, magno nostro gaudio successit experimentum. Urinam copiosè reddidit mulier, cupiditas edendi rediit, & redintegratis paulatim viribus, morbum recidivum nunquam passa convaluit. Tanti interest rerum causas cognovisse.

AB eo tempore istam medendi viam tenuerunt medici, non nostri tantum, sed & exteri; interdum etiam, ut in novis experimentis non rarò fieri solet, nimis audacter. Quibus enim jecur malè affectum est, quorum stomachus est corruptus, quive malo corporis habitu laborant; iis vix quidquam spei in hac medicina relinquitur. Cautiones igitur nonnullæ hic semper necessariae sunt; quarum præcipuas peritissimi chirurgi, *G. Cheselden*, (1) & *S. Sharp*, (2) clarè proposuerunt.

FA-

(1) *Anatomy of the human body, Boock III. chap. 10.*

(2) *A treatise on the operations of surgery, chap. 13.*

FATENDUM est autem quantâcunque prudentiâ officium suum exsequatur medicus, sæpè tamen hydropem reverti. Verùm illud non obstat, quo minùs hoc inventum magni æstimari debeat; cujus ope plurimis vitam, eamque facilè tolerandam, quin & nonnunquam jucundam, ad multos annos prorogatam fuisse novi. Quod quidem cum multis exemplis constet, unum solummodò omnium loco adduxisse satis erit.

ILLUSTRIS quædam vidua, anno ætatis suæ quinquagesimo primo, in hydropem ascitem delapsa est. Emissus est ex ventre humor, qui cùm reflueret semper, singulis mensibus per annum unum educebatur ad mensuram librarum quadraginta quatuor. Anno insequente, singulis etiam mensibus aqua emissa est eâ quantitate, ut per quamque hebdomadam colligi libras duodecim compertum esset. Anno tertio, minui coepit humoris quantitas, ita ut mense unoquoque libræ tantùm viginti quatuor effluerent. Quarto autem & quinto, sextique septem mensibus, aquâ tricies educâtâ, non ultra sedecim per singulas vices profluxerunt. Et post no-

vissimam emissionem languere cœpit, ac tabescere; difficultate etiam spiritûs, ut in hydrope pectoris observamus, assiduè ferè premebatur, & animo frequenter deficiebat; cùm antehac per totum morbi decursum, quoties intervalla essent emittendi humoris, alacris & vivida congressibus amicorum, exercitationibus, quin & choreis sese recrearet. Cœpit illam tandem vitæ & curæ tædium, placidâque tandem morte occubuit. Mirandum sanè est eo temporis spatio tantam humoris copiam ex corpore humano suppeditari potuisse, libras nimirum mille nongentas & viginti; quas in ipsis ovorum conceptaculis, quæ recentiores medici *ovaria* appellant, primum collectas fuisse opinor. At ipsa deniquè moriens testamento suo mandavit, ut ad futuram rei memoriam summa eorum, quæ memoravimus, Anglico sermone monumento suo inscriberetur. Verba ipsissima adjungere libet.



Here

*Here lies Dame MARY PAGE,
Relict of Sir GREGORY PAGE Baronet.
She departed this life March IV,*

MDCCXXVIII,

In the LVI year of her age.

In LXVII months she was tapped

LXVI times,

Had taken away CXL

gallons of water,

Without ever repining at her case,

Or ever fearing the operation.

Monumentum autem illud in campo,
dicto *Bunbil Feilds*, extra urbem vi-
situr.

ÆQUE memorabilem, at exitu feli-
ciorem, casum prebet illa, quam tradi-
turus sum, narratio. Virgo septende-
cim annorum sensit sibi intumescere
ventrem, parvâque copiâ urinam red-
di; à quibuscunque remediis pejus ha-
buit, & post annum haud aliter ac gra-
vidè distendebatur abdomen. Eo tem-
pore nupsit, spe propofita, maritum
fore pro medico. At longè secus res eve-
nit; per annos tres increvit sensim hy-
drops, ita ut tandem ventris disruptio
formidaretur. Cùm dolor jam intolera-
bilis premeret, à me petiit, ut aquam

manu chirurgi, quem in nosocomio eventu secundo hanc medicinam fecisse audiverat, quo saltem levaretur cruciatus, educi curarem. Ego, ne occidisse, quam servare non potui, viderer, in corpore macie jam pænè confecto, id sine maximo vitæ periculo tentari non posse edixi. Misera tamen instare, & precibus rogare, ne se desererem, assiduis tormentis & lentâ morte consumendam. Cessi precibus victus, & illa, quam dixi, viâ emissæ sunt simul & semel humoris limpidi, ac nullo modo foetidi, libræ sexaginta. Ex eo tempore indies auctæ sunt vires, morboque nunquam postea revertente, elapsis decem mensibus filium robustum peperit; plurium etiam exinde fecunda parens.

ILLUD deniquè subjungam, medicinæ hujus necessitatem inde liquere, quòd longè tutius sit, aptis servatis cautionibus, aquam emittere; quam dum illa, rupto sponte suâ ventre, prorumpat expectare. Hoc enim interdum accidit, nec sine summo vitæ discrimine. Semel tamen vidi mulierem, cui id contigerat, salvam evadere. Illa, abdomi-
ne

ne in immensum aquâ repleto, me accersivit; morbum insanabilem esse denunciavi, neque enim superesse vires. At me fefellit opinio. Nam post paucos dies, audito illam adhuc vivere, revisi, & rei novitate perculsus sum, conspicuens vasa duo humore plena, alterum duodecim ferè libras, alterum sex, continentia; quarum illæ rupto aqualiculo propè umbilicum uno die, hæ disruptione juxta eundem locum postridiè facta exierant: ita in biduum medicinam suam divisit natura. Cùm ægram jam languidam, & tantum non moribundam deprehenderem, non alia auxilia, quàm quæ cordi utilia essent, proposui; jussis etiam adstantibus *spiritu vinoso* abdomen fovere, simulque prædicens fore ut propediem moreretur. At mulieri, ne mortuæ quidem, vix credendum est. Iterum falsus sum; & post menses aliquot incolumem, morboque isto (in quem, quantum scire potui, nunquam denuò incidit) immunem aspexi; vulnera etiam sine ulla præter eam, quam dixi, medicatione spontè coierant.

FINIS longæ hujus chartæ erit narrati-

tiuncula, ex qua manifestum fiet, naturam quandoque modo etiam ab hoc, quem proximè descripsi, longè alio hujusmodi onere se levare. Mercatorem quendam ascite gravatum, unà cum alio medico experientissimo, curabam. Tentatis incassum usitatis remediis, ad paracentesin, tanquam ad sacram anchoram, confugimus. Emissæ itaque sunt humoris limpidi & tenuis libræ circiter viginti. Post aliquot hebdomadas de novo intumuit venter. Convenimus ideò manè chirurgum abdomen denuò exinanituri. Subridens autem æger nullâ se jam ampliùs egere curatione dixit; & nudato corpore, abdomen molle laxumque ostendit. Mirantibus & rogantibus, numquid eâ nocte per quascunque vias effusum fuisset, respondit, neque per alvum, neque per renes, neque per sudorem sibi plus solito profluxisse. Per glandulas itaque, & exiles meatus, in peritonæo, & membranis vicinis, absorptus fuit totus ille humor. Ipse autem postea medici cujusdam empirici curæ nimis imprudenter se commisit; & ad præcavendum morbum valentissimis catharticis usus, brevi post,

ex-

exhaustis viribus, consumptus est. Vix ullâ tamen humoris copiâ in aperto cadavere deprehensâ.

JAMDUDUM noverant anatomici humorem ex ventre in partes circumjacentes absorberi. Si enim aquæ tepidæ libra per syringem, facto exiguo vulnere, in vivi canis abdomen immittatur; illo post paucas horas inciso, ne guttula quidem ejusdem ibi reperietur. Ita *corpus universum tam foras, quàm intrò, perspirabile est*: id quod olim docuit *Hippocrates*. (1) Sed legenda omninò sunt, quæ ad hanc rem pertinentia scripsit medicus doctissimus, *Abrahamus Kaav*; qui per omnes corporis membranas, tam in sano, quàm in morbofo statu, recipi & transfudare humores ostendit. (2)

(1) "Εκπνοον καὶ ἑισπνοόν ἐστιν ὅλον τὸ σῶμα.
Epidem. vi.

(2) In libro, cui titulus, *Perspiratio dicta Hippocrati per universum corpus anatomicè illustrata*. Lugduni Batavorum, MDCCXXXVIII.





C A P U T IX.

D E

JECINORIS MORBIS.



PURIMIS morbis ideò patet jecur, quod bilis multis modis vitium facit, ex qua ferè oriuntur hujus visceris mala. Omnium autem frequentissimum est *icterus*; in cujus naturam, quoniam ea, quæ super illo tradiderunt auctores, mihi minùs satisfaciunt, paulò accuratius inquirere lubet.

S E C T I O I.

I C T E R U S.

BILIS est sapor quidam naturalis, hoc est, mistura ex oleo, aqua, & sale tam volatili quàm fixo composita, ad varios fabricæ animalis usus in hepate è sanguine separata. Nil mirum igitur, cùm sanguis ipse modis quàm plurimis corrumpi possit, humorem hunc interdum officiis suis ineptum reddi. Peccat

au-

autem non raro lentore, nonnunquam etiam nimîâ raritate. Illud ubi est, obstruuntur glandulæ huic fecernendæ aptæ, & exiguâ copiâ in canaliculos suos derivatus liquor in iis hæret; inde jecur durum evadit, nascunturque sub ejus tunica congeries albidæ, saponem crassiores referentes. At non tantum ab impedito bilis transitu propter visciditatem, sed etiam à raritate ejus provenit hic morbus. Sal enim volatilis, quem partim bilem componere diximus, nimis abundat; undè tenuis nimirum & calidus humor intestina plus satis irritat. In priore casu adstrictior est alvus, fæcesque crassæ, argillæ vel luto similes, ægrè dejiciuntur; in posteriore diarrhœa, cum febre & liquidis flavisque dejectionibus, assiduè sollicitat. Illi morbo obnoxios reddit vita desidiofa, sine debitis corporis exercitationibus acta; salis enim defectu pars bilis oleosa concrescit: hoc plurimum ii laborant, quibus facultates suæ inutiles sunt; & qui genio indulgentes vino meraciori corporis humoris accendunt.

SED & alia est icteri species, his quas descripsimus causam habens prorsus dif-

diffimilem, quæ à nervorum convulsio-
nibus originem trahit; nempè cùm hu-
mor ille subtilis & elasticus, quem ve-
hunt, acritudine & vi nimîâ præpol-
lens, bilis canales ultra modum con-
stringendo per hepar illam transire non
finit; undè in sanguine exuperans in
quascunque corporis partes diffunditur.
Tale quid cruciatibus colicis, quin &
ictibus viperarum, supervenire jam
olim ostendimus. (1)

NEQUE adjicere alienum erit, con-
strictionem non huic similem, sed ab
ipsa glandularum in abdomine indura-
tione factam, interdùm evenire, jeci-
nore & vesicâ ejus bile distentis, cùm
tamen nulla hujus portio in intestina de-
labi possit. Vidi olim in nosocomio in-
signe hujus rei exemplum. Vir quidam
operarius annorum quadraginta & duo-
rum, cùm ante quinque menses ab acu-
ta febre convalesceret, sensit in hypo-
chondrio sinistro inflammationem; quâ
repressâ, in icterum pertinacem inci-
dit, alvo fæcibus albis adstricta, brevi-
que periit. In aperto abdomine fluita-
bant sanguinis, ad sensum saltem, sin-

(1) *Mechanical account of poisons, Essay 1. edit. IV.*

ceri libræ quatuor. Mirantibus unde is effluxerat, se visui obtulerunt membranulæ quædam, quasi disrupti facculi fragmenta, putrido hic loci & corrupto omento. Pancreas autem non scirrhotantum, sed & cancro, occupatum fuit; ex illo enim inciso in chirurgi faciem lymphæ guttulæ aliquot acres adeò & corrodescentes prorumpebant, ut cutem non secùs, ac oleum vitrioli, læderent. Lien etiam scirrhotus erat. Vesica fellis maxima, & bile repleta; non flavâ, sed viscidiorè, & obscurè virefcente. Hepar nusquam induratum; & ubicunque inflingeretur vulnus, similem humorem profudit. Universas deniquè corporis partes, membranas, adipem, glandulas, imò ipsam costarum substantiam, colore flavo suffusas observavimus; fibris muscularibus solùm exceptis, quæ nusquam erant infectæ. Ex vesica autem digitis compressa nihil bilis in intestinum effluxit; ita enim, quasi injecto vinculo, contractus erat, quâ ductus hepaticus cum cystico in unum coit, hujus meatus, ut stylum non caperet. Hanc narratiunculam ideò memoravi, ut manifestum fieret, ex causis

fis

sis quam variis, iisque etiam interdum mortiferis, oriatur hic morbus.

MULTIPLEX adeò malum, multiplicem curationem desiderat. Ubi alvus cum facibus coloris cinerei vel albidus est adstrictior, medicamenta *saponacea* cum per se, tum *rhabarbaro* conjuncta, necessaria sunt. Cum fusior est, non tam comprimere, quam moderari illam oportet; in primis ope *rhabarbari*, admisso remedio anodyno. Nusquam autem magis conveniunt somno & dolori sedando apta, quam illis in casibus, quos à constrictione canaliculorum, qui bilem ferunt, nervorum convulsionibus orta, provenire diximus. In omnibus autem icteri generibus, si inflammatio adsit, sanguis detrahendus est; quinetiam vomitus plerumque eliciendus.

ISTA, quam dixi, inflammatio sæpè in suppurationem vertitur, & fit vomica; ex qua si fertur pus purum & album, salutis spes est, quia malum est in tunica. Sin autem totum jecur ab ea consumitur, lentâ febre & anxietate summâ diu luctatus moritur æger. Frequentissimus est, ut à viatoribus accepi, in India


dia Orientali dirus hic morbus, & emissio per medicamentum causticum humore, non rarò sanatur. Ulcus autem, ut in fonticulis mos est, diu apertum servare oportet. Memorat hunc affectum doctissimus *Bontius*, & curandi modum illi, quem proposuimus, non abfimilem disertè fatis explicat. (1) Quin & eandem medicis nonnullis olim in usu fuisse observat *Celsus*. (2)

Ex iis deniquè, quæ bilem ipsam emendant, nihil utiliùs est illâ potione, quæ habet *succi limoniorum* drachmas sex, *salis absinthii* drachmam semis, *aquæ cinnamomi simplicis* unciam unam, *sacchari albißimi* scrupulum unum; quæ etiam, ubi alvus nimis soluta est, auxilio erit, modo somniferis vis ejus irritans ritè coërceatur. Propter vires etiam consimiles *elixir vitrioli Mynsichti*, ex *aqua Bathoniensi* aut *Spadana* assumptum, multùm commodi adfert.

(1) Vid. *Histor. nat. & medic. Ind. orient. Lib. 11. cap. 8.*

(2) *Lib. IV. cap. 8.*





SECTION II. DIABETES.

NIMIAM urinæ saporis, odoris, & coloris mellei, profusionem, *diabeten* dictam, non renum esse, ut vulgus medicorum existimat, sed jecinoris morbum, indiciiis certissimis jam dudum demonstravi. (1) Nolo cramben bis coctam apponere; & ea, quæ satis, ut opinor, prolixè proposui, repetere. Unicum tantum illis, quæ de cura ibi dicta sunt, remedium adjungam, hoc est *serum aluminatum*, quod ex *lactis paululum cocti* libris quatuor, & *aluminis* drachmis tribus conficitur. Si hujus enim quarta libræ parster minimum die bibatur, ad profluvium illud sistendum plurimum valet.

Si quis autem quærat, undè tanta humoris copia in hoc morbo laborantibus suppeditari possit: Facili sanè experimento comperimus, corpora quædam interdum imbibere, & ad se trahere, ex aëre humidum; quo, cum moles, tum pondus, eorum augeatur. Ita *saitar-*

(1) *Mechanical account of poisons, Essay I. edit. 4.*

tartari udo aëri expositus in tantum crescit, ut libra una ritè calcinata ad libras decem exfurgat. Quidni igitur dicamus, ex sphæra vaporum nos ambiente nonnullos eorum corpus ad illos recipiendos aptum intrare, qui humori aqueo in renes derivando conjuncti copiam ejus accumulent? Quapropter, cum frigidus ac humidus aër hoc malo affectis minimè conveniat; calidum certè & ficcum, si liceat, eos petere oportet.


RATIONEM autem hic reddere lubet, qui factum fuerit, ut apud antiquos tam rarò occurreret hic morbus, ut illum bis tantum se vidisse referat *Galenus*. (1) Id igitur ex more vivendi, quo utebantur, nostro multum dissimili provenisse autumo. Illos enim hoc malum maximè corripere dixi, qui inertes ac desidiosi vitam agunt; & luxuria assidue diffuentes, postquam vino meraciori sanguinem & humores accenderint, frigidis potionibus intempestivè sitim restinguere solent. Veteres autem, licet plus satis vinosi, prudentiores tamen hac in re sibi cavebant; & inflati

I 2

ve-

(1) *De locis affectis, Lib. VI.*

venas merò paulatim ad temperantiam redibant, fenfim corpus refrigerantes, calidisque aut faltem egclidis liquoribus fitim compefcientes.



CAPUT X.

DE

MORBIS RENUM
ET VESICÆ.

RIUSQUAM ad morborum renum & veficæ medicinam accedam, nonnulla de morbis iftis præfari commodum erit; horum enim naturam non dilucidè fatis videntur explicuiſſe auctores, cùm tamen hanc noviffè non parùm ad eorum medelam conferat.

OBSERVASSE olim me memini (ſicut alias dixi) (1) in cadaveris ſeçãoe pueri quinquennis, quem ad mortem cruciaverant graves nephritidis dolores, varios gradus, quibus calculus in lapideam duritiem concreverat. Opple-
ti

(1) *De imperio ſolis & lunæ pag. 55.*

ti erant cùm renes tum ureteres materiâ calculosâ, quam cernere erat variâs hic illic concretionis formas induisse. Primum mali fundamentum erat aquosus & limpidus humor, quæ paulatim lactescens in tenues & ramosas cryсталlos abiit, quibus in unum coëuntibus, accessit tandem lapidis forma & durities.

TARTARUM quoddam hostili coagulatione in renibus genitum calculi esse materiam, non sine ratione, ut opinor, dixit in experimentis chemicis versatissimus *Helmontius*. (1) Quam quidem opinionem confirmare videtur analysis ejus facta per ignem, cum tartari ex vino Rhenano resolutione comparata. Hujus rei experimentum fecit vir ingeniosissimus, *Stephanus Hales*. (2) Et in tartaro quidem Rhenano comperit tertiam totius massæ portionem esse aërem elasticum; calculum verò parte plùs quàm dimidia ex aëre ejusmodi constare; quam aëris proportionem in nullis aliis corporibus potuit deprehendere.

ANNON igitur conjicere licet, causam hujus morbi proximam esse sales tartareos

I 3

reos

(1) Vid. *Supplementorum Paradoxum numero criticum*,

(2) *Statical Essays*, Vol. 1. pagg. 184. & 193.

reos ex sanguine in canaliculos renales delatos ? Salium enim istorum ea est natura , ut subtilissimæ illius materiæ , quam præter alias dotes cohæfionis corporum causam esse monstravit illustris *Newtonus* , magnam quantitatem inclusam teneant. (1) Est igitur calculus materia ex terra , maximamque partem ex aëre , in renum tubulis concreta ; quæ aut in iis hæret , aut in vesicam delabitur. Hæc ideò paulò latius exposui , ut , quibus modis medicinam hic facere oporteat , ostenderem.

ET primum quidem , ut venienti morbo occurratur , ne in cryсталlos abeant sales isti , *lixivialia* dicta *salia* optimè prohibitura videntur. Cryсталlorum autem in calculum concretioni oleosa corpora maximè obstabant. Et hoc sanè præceptum tam in victu , quàm in medicamentis , locum semper habere debet.

CUM autem eo res devenit , ut expellenda sit per ureteres moles concreta , summâ hic prudentiâ opus est. Peccatur sæpissimè in usu medicamentorum , quæ magnâ urinam movendi vi pollent ; quibus

(1) Vid. *The life of Mr. Boyle , prefixed to his works* , pag. 70.

bus scilicet arenulas simul propelli posse, spe plerumque vanâ, medici existimant. Tutius enim plerisque in casibus ea res laxantibus & lubricantibus peragitur; præsertim si, cum vehemens sit dolor, misso primum sanguine, remedia anodyna interponantur. Nunquam enim, dum in magno cruciatus æger est, foras pellitur calculus; qui, cessante cruciamento, cum fluxu urinæ sponte suâ ferè & inspirato interdum exit. Illud inde fit, quòd dolor partium fibrillas coarctat; quæ, ubi abest molestus sensus, officio suo ritè funguntur. Idcirco non sine magno levamine, & interdum commodo etiam majore *opii* grana tria quatuorve in *decocti communis* unciiis quinque aut sex soluta, per clysterem in alvum infundi possunt. Est autem, cum, sedato jam angore, diureticis etiam valentioribus pugnare liceat; eâ tamen circumspèctione, ut postquam effectum sortita fuerint, iis non diutius insistatur.

ALVUS interim semper laxior esse debet: itaque si adstrictior sit, infusâ lotionem ex *decocto communi*, adjecta *terebinthina* emollire convenit; inter-

dùm & *infuso senæ*, commista *manna*, purgare : nequè enim nimis sollicitanda est.

LUBRICANTIA, quæ dixi, mèdica-
menta præcipua sunt, *oleum amygdalarum dulcium*, *syrupus ex althæa*, *emulsiões ex amygdalis*, & consimilia ; quibus adjungendus erit balnei tepidi usus. Inter diuretica autem valentiora *terebinthina* & *sapo* præstant.

Et his quidem in ipso morbi accessu proficitur. Extra illum autem salutem conducunt corporis exercitatio; in primis equitatio assidua, sed citra fatigationem : cibus ex media materia, quique facilè concoquitur : pro potu, aut vinum tenue aquâ dilutum, aut cerevisia non lupulata, recens & minimè acris; quæ, si tempore fermentationis infusa sint *hederæ terrestris folia*, eo jucundior erit & salubrior. Mulsum etiam convenit; nullum enim diureticum melle præstantius est. Hujus cochleare ex cyatho uno aut altero infusionis *radicum althææ* renes, si assiduus ejus usus fuerit, optimè purgabit. Vina eligenda sunt, in quibus minimùm acoris inest. Aquæ levissimæ, purissimæ, & ex flu-
mi-

minibus cursu exercitis haustæ, potui sunt idoneæ. *Dannantur* enim, ut ait *Plinius*, in primis fontes, quorum aquæ decoctæ crassis obducunt vasa crustis. (1)

MAGNOPERE autem cavendum est ab assiduo illorum medicaminum usu, quæ magnâ vi urinam cient; præsertim ubi id agitur, ut nullæ fiant in renibus arenularum concretiones: illa enim, quantumvis de iis magna promittant rerum ignari, acrimonia sua & calore partes labefactant & lædunt. Neque temperare mihi possum, quin dicam in opprobrium nuper medicis nonnullis cefsisse, quod infano pretio redimendi anile remedium magnatibus auctores fuerunt; quo ipsos etiam in vesica calculos in ramenta comminui, & hinc foras per urinam pelli posse, vanâ spe delusi spondebant. Erat medicamentum hoc ex *sapone calcibusque testaceorum* non unius generis confectum, quod nemo non videt virtute summè causticâ polle-
re. Monstrabatur intereà coram populo in rei testimonium calculosa massa una & altera, ex vesica illorum, qui illud

(1) *Nat. Hist. Lib. xxxi. cap. 3.*

assumpferant, exsectâ, inæquali superficie & foraminibus hic illuc quasi erosa; quas cavernulas notas esse & indicia medicaminis, vim suam exerere jam incipientis, credi voluerunt. At scivisse debuerant, non rarò calculos in vesica nasci ita conformatos, ut ipseciem lapidis hic illic exesi præ se ferant; id quod ipse non semel vidi. Tanta est in lapidibus cujuscunque generis formandis varietas. Et legi quidem velim super omni hac re librum ab anatomico & medico insigni circa id tempus editum, utilibus documentis plenum; in quo tum noxæ, tum fallacia, hujus medicaminis disertè exponuntur. (1)

NIL mirum fanè est, legislatores nostros, cùm tanta de nova hac, ut dicebatur, medicina prædicarentur, quovis ferè præmio illius componendi modum comparare voluisse, ut reipublicæ causa in lucem ederetur. Et erat quidem id ipsis laudi, quod hortatoribus culpæ verti debet; quos nosse oportebat, res tam acri virtute præditas, ut calculos comminuant, non posse, illæsa vesica, in hanc partem illabi. In summa, valet ali-

(1) *Parsons' Description of the human urinary bladder, &c.*

aliquid ad arenulas foras per urinam pellendas ista confectio, at calculos duritiei lapideæ nunquam confringere poterit; quin & longus ejus usus magno periculo non vacabit, propter rationes jam expositas. Neque multò tutius erit, licèt forma commodiùs, *lixivium saponarium* ejus loco in potu datum, eandem scilicet ob causam.

VERUNTAMEN cùm in re tanti momenti nihil dissimulare, nihil celare oporteat; utilitatis publicæ causâ, quædam à doctissimo *Roberto Whytt*, medico Edinburgenfi, experimentis comperta memorare juvat. (1) Ille enim, cum incommodis, tum interdùm etiam noxis, celebris hujus antidoti perpenfis, omisso *sapone*, vires quas haberet *aqua calcis*, non calce vivâ, sed ritè calcinatis ostreorum aliarumve concharum testis parata, ita ut libræ septem vel octo aquæ testarum calcinatarum libræ uni affunderentur, experiri voluit. Res ipsi ex voto cecidit; & multo quidem potentius calculum solvere hunc liquorem, quàm vulgarem aquam calcis, fragmentorum calculorum immersionibus

(1) *Medical Essays, Edinburgh. Vol. V. Essay 69.*


bus in utraque factis, facile didicit. Modum deinde illam exhibendi ostendit; quatuorque libras adultos, pueros pro ratione ætatis minus, quotidie bibere jubet. Non uno autem exemplo felicem medicinæ hujus affectum comprobavit.

OPERÆ pretium certè erit ipsam ejus dissertationem perlegere. Ego interim eo libentius hæc aduxi, quod nuper, ut ex ipsius ore accepi, medicus quidam Londinensis, mihi amicissimus, hæc ipsâ medendi viâ mercatorem graviter laborantem morbo eripuit; plurima enim frustula, nunc crustularum, nunc exiguorum nucleorum instar, simul cum urina foras ejiciebantur. Minimè autem sperandum, sicut antea dixi, ut lapides ad filicem ferè duritie accedentes quovis medicamento comminuantur.

GRATULOR itaque civibus nostris de scientia & dexteritate chirurgorum nostrorum, qui novam viam tutius & expeditius calculos ex vesica exscindendi adinvenerunt. (1) Jam enim non pueri tantum & juvenes, sed & ætate proVectiores, sine magno periculo hanc *εγχειρησιν* ferre possunt; nec cum major fit

(1) Vid. Cheselden's *Anatomy*, edit. V. cap. VI.

fit calculus, quàm ut cervix vesicæ, nisi rupta sit, extrahi finat, illum findere necessè est : id quod reperisse dicitur medicus Græcus, *Ammonius*, ob id λιθοτόμος cognominatus. (1)



CAPUT XI.

DE

MORBIS OCULORUM.

ORBOS oculorum tanta cum diligentia tractarunt scriptores, ut supervacuum ferè habeam de illis quidquam dicere. Ex veteribus in primis *Celsus*, (2) ex recentioribus Vopiscus *Fortunatus Plempius*, (3) accuratissimè eos enumerarunt & distinxerunt. Et ille quidem Græcos auctores tam medicos quàm chirurgos habuit, quorum opera ad nos non pervenerunt, ex quibus maximo usus iudicio medicamenta quam plurima aptissima selegit; hic verò nova infu-

(1) *Celsus*, Lib. VII. cap. 26.

(2) *Lib. VI. cap. 6.*

(3) *Ophthalmogr. Lovanii MDCLIX.*

insuper inventa usibus medicis accommodavit. His tamen adjungi velim librum à duobus summis geometris, junctis operis, conscriptum; in quo ea, quæ ad visum pertinent, planè & dilucidè exponuntur. (1) Lectu etiam dignissima sunt, quæ de hac materia disseruit medicus Edinburgensis, jam alias à me laudatus, *Porterfieldus*. (2)

MIHI igitur sat erit de ingentibus quibusdam vitiis, quorum natura vulgò non satis perspecta fuit, quædam monuisse.

(1) *A complect System of opticks, by Robert Smith, LL. D. with an Essay upon distinct and indistinct vision, by James Jurin, M. D. Cambridge, MDCCXXXVIII.*

(2) *Vid. Medical Essays, published at Edinburgh, Vol. III. pag. 160. & Vol. IV. pag. 124.*





SECTIO I.

DE

GUTTA SERENA.

AFFECTUS gravissimus simul & difficillimus is est, quem ἀμυρίασις Græci, sequioris ævi medici Latini barbarâ voce *Guttam serenam* appellant. Hic ex variis causis nascitur, quarum communissima est arteriarum, quæ tunicam *retiformem* dictam perreptant, à sanguine viscidior per gradus facta obstructio. Ab ea enim evenit, ut lucis radii, qui rerum imagines in oculi fundo depingunt, in dilatatos hosce sanguinis canaliculos sine effectu incidant; unde visus pro ratione damni aut imminuitur, aut penitus perit. Hunc etiam morbum interdum facit nervorum, ex quibus contexta est hæc oculi tunica, resolutio; quippè quæ tollit quadantenus eorum sensum, unde lucis corpusculis non eâ vi impellantur, ut ad cerebrum res objectas transferre possint. Ipsius deniquè nervi optici, sive ab humore glutinoso effuso, sive duro tumore ibi nato, compressionem, antequam
is

is à *thalamis* suis dictis exiret in oculos, hujusmodi cæcitatem afferre observavi. Id autem spirituum animalium ad cerebrum meatum intercludendo efficitur.

Tot casibus etiam in uno morbo patient oculi, qui ad usum simul & dulcedinem vitæ plurimum conferunt. Quibus igitur modis hos tueri oporteat, jam dispiciendum est.

IN PRIMIS autem mala hæc internoscere, & quænam in singulis signa spem aut metum ostendant, scire expedit.

CANALICULORUM igitur sanguine viscido oppletorum indicium est gradatim superveniens pupillæ dilatatio. Hæc enim naturæ spontè fit, ut incommodum, quod multis lucidis radiis in arteriolas, loco nervosarum fibrillarum, impingentibus visus patitur, solito majore horum numero pensetur. Hinc nervorum resolutio, quæ derepentè sæpè fit, istam dilatationem vix ita patefacit. Effusus verò in ipsum nervum humor, aut sensim agnatus ibi tumor, amplior pupillam propter dictam rationem comitem habet.

Vix ulla igitur medicina hos periculo subtrahit, quibus naturalem suam angu-

gustiam tuetur pupilla. Idem quoque de iis dicendum est, quibus visum ademit morbus; qualis est intra cranium genitus humor, aut tumor, ipse insana- bilis. Qui enim levamen recipere poterit aut subita nervorum debilitas, aut humor, tumorve, propter locum, quem renet, indissolubilis? Sola igitur, quam primo loco posui, cæcitas hujusmodi medicabilis est. Nisi in illa, quam fecit tunicæ retiformis resolutio, spes aliqua salutis per ea forsitan effulgeat, quæ nervorum resolutioni conveniunt; quorum præcipua sunt aromatica, è *ferro* parata medicamina, & *gummi fætida*.

QUIBUS autem modis curationem aggre- di oporteat, jam proximè dicendum est.

ET viis quidem quibuscunque tollen- dam esse istam canalium oppletionem, & emendandum sanguinis lentorem, manifestum est. Sanguinem igitur pri- mo, tum è brachio, tum è vena jugu- lari, detrahare oportet, & vicibus qui- dem pro morbi ratione iteratis. Neque inutiles sunt cucurbitulæ sub ipso occi- pitio, factis profundis incisuris, collo- catæ; ut hâc viâ ex cerebri sinibus, qui

laterales dicuntur , cruor emittatur. Cathartica etiam dare , ex iis præcipuè , quæ crassos humores expurgant , necessarium est. Cùm autem nihil ad incidendos , & foras pellendos , tenaces & viscidos humores hydrargyro valentiùs reperiatur , *mercurium sexies sublimatum* aliis purgantibus adjungere ; vel potiùs , hoc per se assumpto , post paucas horas lenè aliquod catharticum propinare , commodissimum erit.

ET hæc quidem , incipiente jam & recenti malo , sæpè satis ad votum cedunt ; inveterascens autem morbus potentius auxilium desiderat , copiosam nimirum medicamenti hujus ope , parva copia & brevibus intervallis per os sumpti , factam salivæ irritationem. Singulare enim & eximium pondus , quo pollet metallicus hic liquor ; uti & natura ejus , quâ in minutissima corpuscula facilè separabilis est ; faciunt , ut intimos quosque corporis recessus subeat ac penetret , hærentesque in his fordes abstergat , & , quâcunque datur porta , foras ejiciat.

Hoc ego usus experimento , dum juvenis adhuc medicinam facerem , paupe-

pèribus primum in nosocomio, deinde & aliis, visum vitæque solamen reddidi; laudantibus medicis, qui ad id usque tempus malum hoc, cùm invaluerat, immedicabile esse putarant. Consilium autem rei hujus periculum faciendi ideò cepi, quod ex optices scientia didiceram corpuscula quædam in humore oculi, *aqueo* dicto, natantia morbi hujus causam esse (quæ vulgaris erat opinio) non posse; utpotè quæ ob nimiam viciniam imaginem sui in oculi fundo delineare nequeant. Alia igitur causa quærenda fuit; quam an veram repererim necne, penès rerum mathematicarum peritos judicium esto. Mihi profecto, quantum ad medicinam rectè faciendum conferat vera mathesis, hoc invento illustre documentum dari videtur.





S E C T I O II.

D E

S U F F U S I O N E S I V E
C A T A R A C T A.

NON parvum vitæ tædium affert visûs defectus, Græcis γλαύκωμα, Latinis veteribus *suffusio*, recentioribus *cataracta* dictus. Is est quædam humoris crystallini obscuritas, qui ex pellucido in glaucum colorem plerùmque mutatur; undè lucis radiis transitus ad fundum oculi prohibetur.

EXISTIMARANT omnis ævi medici cæcitatem hanc originem trahere à membrana quadam, præter naturam hic concrecente, quæ veli instar humori crystallino obtenderetur; visumque restitui, hâc membranulâ acu depressâ. At nostro demùm sæculo patuit error iste. Dissectis enim post mortem tam oculis illorum, qui hoc vitio effecti nunquam dictam curationem experti fuerant; quàm aliorum, quibus illa *χρυσή* benè cesserat: nullâ apparente membranulâ, compertum est, ariditatem, duritiem, & opacitatem pellucidi

di istius & globosi humoris morbum hunc genuisse. (1)

RETICENDUM autem non est, deprensam fuisse aliquando, sed rarissimè, manu chirurgi veram membranulam.

(2) Hoc nuper docuit peritissimi apud nos anatomici & medici, *Thomæ Lawrence*, solertia; qui tegumentum quoddam membranaceum pupillæ obductum ex infantis corpore, cerâ etiam liquidissimâ repletis arteriis id perrepantibus, mihi ostendit. Hinc itaque didici, etiamsi certissimum sit ipsum crystallinum humorem in longè plurimis hujusmodi casibus acu chirurgi loco suo dimoveri; posse tamen interdum fieri, ut membranula quædam deprimatur, quæ infortunio aliquo ariditatem fortè contraxerat.

SOLA igitur chirurgi expertissimi manus hic opus est. Suffusionis autem quædam maturitas expectanda est, rerumque circumstantium habenda ratio; ex quibus, an satis oportunus curationi sit oculus, dignosci queat.

K. 3

S E-

(1) Vid. *Antoine Maitre-Jan, Traité des maladies de l'œil, A Troyes, MDCCVII.*

(2) Vid. *Histoire & memoires de l'Academie Royale des sciences. A Paris, MDCCVIII.*



S E C T I O I I I .

D E

A L B I G I N E O C U L I .

HAUD leve malum quoque est oculi albugo , à qua plùs minùsve læditur visus , prout majorem minoremve tunicæ corneæ portionem eo loci , quo pellucida est , vitium hoc occupaverit. Interdùm enim in extima tantùm hujus membranæ facie sedem figit ; interdùm parti interiori , nunc altiùs , nunc minùs profundè inhæret.

ORITUR autem ut plurimùm ex inflammationibus , effuso inter tunicæ hujus membranas humore ; & maximè quidem in variolis , suppurantibus hic loci morbi pustulis.

DUOBUS ipse modis istud lucis impedimentum amovendum curavi , altero in exteriori , altero in interiori malo usus. In priori casu pulverem hujusmodi adhibui. *Vitrum commune* mortario impositum in pollinem tenuissimum terebatur , qui *sacchari canti albi* pari portione commistus multo labore super marmor lævigabatur. Pulvisculi hujus
ali-

aliquantulùm , in oculum calami ope indies immiffum , vi fuâ incidendi paulatim maculam abftergit & abradit. Alter , quem dixi , modus labeculam hanc tollendi is eft , ut folers & cautus chirurgus illam fcalpello gradatim & quotidiè excidat ; ex lamellis enim fibi fuperincumbentibus conficitur hæc tunica , craffa & firma fatis , quæ particulas aliquot abfcindi patiatur. Pulveris iftius ocularii ufu multos fanatos vidi ; corneæ verò refectionem fèmel tantùm , aut bis , felici cum eventu expertus fum. Sed fatiùs eft anceps remedium experi-ri , quàm nullum.

ODORUM VIRE S.

DE reliquis fenfibus vix quidquam magni momenti occurrit , quod proponam ; paucis quibufdam , quæ ad *olfactum* pertinent , exceptis. Cùm quotidiè enim magnam odorum vim tam ad lædendum , quàm juvandum , corpus noftrum experiamur ; de hisce quædam breviter faltem dicere non erit inutile.

ET primum quidem vis horum nociva in morbis , qui contagione ferpunt , inferendis fatis manifefto fe prodit. Hu-

morem enim subtilissimum, ex impuro & jam corrupto corpore prodeuntem, spiritu attractum sanum habitum inficere, minimè dubitari potest. Quin & sæpissimè hinc caput doloribus tentari, & stomacho, vitiatâ salivâ, nauseam concitari nemo non sentit. Contra autem vires nostras plurimis in casibus maximè reficere res odoríferas notissimum est. Idque fit, aut excitatis, quum oppressi erant, spiritibus animalibus; aut recreatis per res ejusmodi, quæ tenuem fumum naturæ gratum & amicum emittunt, naribus admotas. Sunt enim quasi spirituum animalium pabulum hujus generis corpuscula.

OMNIUM autem, quæ hætenùs innotuere, corporum odoriferorum valentissima sunt *spiritus* & *sales volatiles* dicti, vi ignis ex animalium partibus elicti; hisce proximæ animales illæ glandulæ, quæ *castoreum*, *moschus*, & *zibethum*, appellantur. At illud fortassis jure mirum videatur, quod non omnia omnibus æquè conveniunt hujusmodi corpora. Multos enim mirificè reficiunt *moschus* & *zibethum*: cum alios videmus, quos pessundat ferè, & ægri-

ægritudine cum animi deliquio turbat, horum fragrantia; quos tamen recreat *virosū castoreum*, & *asa fœtida*. Id discrimen, ut opinor, facit dissimilis inter eos fluidi liquoris, qui nervos irrigat, habitudo; natura ipsa, quænam singulis aut profutura essent, aut nocitura, monstrante. Neque ullus dubito, quin sensum harum rerum efficaciam nervorum humor menti impertiat. Ita nimirum sapienter simul & benignè fabricam nostram instruxit Supremus rerum Conditor; ut, quæ salutaria sunt ad vitam, aut ad sobolem propagandam necessaria, sint simul jucunda, & cum sensuum voluptatibus conjuncta. In hisce tamen omnibus modum semper servare oportet, ne voluptatis illecebræ in noxam & detrimentum tum animi tum corporis cedant.





CAPUT XII.

D E

PODAGRA.



PODAGRA illorum hominum, qui plus satis genio indulserunt, plerumque morbus est; in quo natura ex onusto corpore id, quod sibi inimicum est & noxium, in articulos protrudere nititur. Est itaque pro morbi liberatione potius, quam pro ipso morbo, habenda hæc affectio; unde magnoperè cavere ac providere oportet, ut effectum fortiatur iste conatus. Minimè igitur mitigandus est quibuscvis medicamentis externis dolor. Si hoc enim tentetur, in partes vitales puncto temporis transit humor morbidus, & de vita maximè periclitatur æger; documento fanè insigni ad subtilissimum quendam & actuosissimum liquo-

quorem, qualis est nervorum succus, turbidum hunc in corpore motum pertinere. Sin fortè ignea colluvies ista intempestivè retrocedat, totis viribus contendendum est, ut in partem, quam priùs occupaverat, revertatur. Id efficiunt sanguinis missio; cathartica calidiora, quæ non vehementer ventrem moveant; medicamenta cordi utilia; maximè verò vesicatoria membris imposita, habitâ semper loci affecti ratione. Nihil enim optabiliùs est, quàm ut partibus externis, quas jam tenuit, per dies benè multos salutare id malum infidat; quia difficulter ejicitur ex corporis interioribus novus hospes, ac semel admisus malè partam possessionem in gratiis tuetur: ut rectè fortassè dici possit, solam podagram podagræ mederi.

SEDES hujus morbi sunt ipsa articulorum vincula; & tendines musculorum, qui motibus eorum inserviunt; cum membranis, quæ ossa circumvestiunt. In has partes delapsus succus vitiosus acrimonia sua graviter pungit & vellit; hinc oritur inflammatio, & transudantibus ex minimis arteriarum & nervorum ramusculis liquoribus tenuissimis,

simis, fit tumor dolorem afferens. Dolo-
re enim pro instrumento utitur natu-
ra ; qui , quo acrior est , eo breviori
tempore & tutius munere suo fungitur.
Nonnunquam enim , quasi officium de-
trectans , lente id agit ; & pro vario cor-
poris habitu , perindè ac si medicinam
suam divideret , in plures dies crucia-
tum protrahit. Subsidente autem tumo-
re , effusi humoris pars , quæ per cutis
meatus exire non potuit (& exigua fa-
nè ejus portio hâc viâ exhalatur) in ve-
nas & lymphæ canales absorbetur :
dum id , quod crassissimum est , mem-
branis adhæret ; & singulis doloris cir-
cuitibus cumulatus , interdum in duri-
tiem quasi cretaceam concrefcit , fen-
simque articulos opplet & contundit.

Quod ad remedia spectat , alia esse
debent in ipsa accessione , alia extra il-
lam. Quietem corpori impetrat ipsa ad
motum impotentia. Victus , si febris ad-
sit , erit qualis in acutis ; sin minùs , ex
media materia concedi potest. Stoma-
cho enim , ut dixi , ac viribus prospici-
cere oportet. Et animadvertendum est
(quod in alio morbo vix contingere vi-
di) ubi hanc partem corripuit morbus ,
quasi

quasi torpore quodam & frigoris sensu mirum in modum affici ventriculum : ita ut vinum sit pro aqua ; & liquores calidissimos, quales sunt *spiritus*, quos vocant, ex vino elicit, is expetat & facile ferat. Rei igitur hujus ratio est habenda, & potui danda non solum vina meraciore satis magna copia ; sed & spiritus vinosi, *radicis serpentariæ*, *zingiberis*, vel etiam *alii nucleorum*, maceratione efficaciores facti. Quin &, his parum valentibus, ipsos *serpentariæ*, *zingiberis*, & *piperis longi* pulveres, *confectione cardiacâ* dicta commistos, devorare commodum erit.

DISQUIRUNT medici, an non, urgente in articulo intolerabili cruciatu, venam secare liceat. Meminisse autem oportet, dolorem hunc ad partem tumefaciendam summè necessarium esse, ideòque patienter perferendum. At nihilo minus tamen, cum certum sit separationibus ex sanguine, quæ salutis causâ spontè naturæ fiunt, nimium obstare calorem ; si febris sit vehemens, & præfertim si adsit delirium aut spiritus difficultas, sanguinis detractio non solum dolorem aliquantum leniet, sed & exitum

tum humoris feliciter promovebit. (1)
 Et illam fanè etiam repetere opus erit,
 ubi capitis sopore affecti notæ depre-
 henduntur. Sæpissimè enim animadver-
 ti medicos ab ista exinanitione nimis
 metuere, ne scilicet humoris propul-
 sioni in articulos officeret. In summa,
 sanguinis missio id plerùmque efficit, ut
 morbus locum, quem jam tenet, dese-
 rat & relinquat; quod quidem quanto
 cum commodo multis in casibus fiat,
 manifestum est. Anodynorum autem
 usus, nisi fortè vomitiones aut alvi, de-
 jectiones sollicitent, concedi non debet.
 Neque, ut id semel moneam, benè fe-
 runt cathartica podagrìci; nisi, finito
 jam paroxysmo, ad expellendas, quæ
 tumorem faciunt, morbi reliquias.

PLUS difficultatis & momenti habet
 quæstio de vitæ regimine, quo quis tor-
 mentum hoc avertat, & eo se prorsùs
 immunem præstet. Et primo quidem il-
 lud perpendere oportet; num tutò fatis,
 & cum bonis ægri rebus, id fieri possit.
 Quibus enim ætate jam provectoribus
 per multos annos reverti consuevit mor-
 bus; his, si non omninò invadat, pro
 ar-

(1) Vid. *Librum De variolis, cap. III.*

articulis præcordia infestantur, crurumque insuper robore destituti vitam sæpè in reliquum miseram transigunt : id quod illis non semel contigisse vidi, qui lacte & oleribus contenti cibis aliis omnibus se abstinerunt.

SIQUIS igitur hujusmodi quidquam tentare ac periclitari velit ; is juvenis esse debet, & qui nondùm morbum hunc, nisi fortè bis vel ter, perpeffus sit. Illi vino & cerevisiis omnibus præfractè interdicens est. Aqua pura sitim sedet. Lacte, & ex illo paratis eduliis, oleribusque vescatur; semel autem de die teneris carnibus, quales sunt pullorum, gallinarum, & cuniculorum, interdùm & piscibus fluviatilibus, famem compescere licebit. Corpus exercitationibus assiduis, sed non vehementibus, movendum erit. Nonnullos novi hoc vivendi more securitatem totius vitæ consecutos esse; & ne vel minimùm quidem podagra vexatos ad viridem senectutem, eamque etiam jucundam, perductos. Tantùm prodest secundùm naturam, id est, temperanter ætatem agere. Et hoc vitæ genus illi præcipuè experiri debent, ad quos vitio parentum, non suo,

fuo, jure quasi hereditario descensurus expectatur hic morbus; ne femina ejus, sanguini & nervorum liquori inhærentia, fructum injucundum tempori ferant.

CONCLUDET hoc caput unicum illud monitum, quod licet verissimè modo dixerim, *pro morbi liberatione potius, quàm pro morbo, habendam esse hanc affectionem*: interdum tamen, præsertim in senectute, gravissimum est malum; cum, fractis jam viribus, debilitatisque membris, corporis motiones perduntur, & magna vitæ jucunditas perit. At verò, ut aliæ quæcunque ærumnæ, ita & hæc patientia levior fit. Et in mediis cruciatibus illud forsan, quod Sydenhamo fuit, solatio esse poterit; *ita vixisse, atque ita tandem mortem obiisse, magnos Reges, dynastas, exercituum classiumque duces, philosophos, aliosque his similes haud paucos.* (I)

(I) *Tract. De Podagra.*





CAPUT XIII.

DE

DOLORIBUS
ARTICULORUM.

PODAGRÆ affines sunt illi dolores, qui cum inflammatione & tumore articulos invadunt. His, sanguinis missione, vesicatoriis partibus affectis admotis, &, nisi febris urgeat, purgationibus mederi oportet. Si nulla, vel levis tantum, febris adsit, *gummi guajacum cum cinnabari antimonii* conjunctum, ita ut utriusque pares sint portiones, cum ad ventrem laxandum, tum ad humorum acrimoniam retundendam, utilissimum erit; eo modo datum, ut bis die saltem alvus deiciat.

HORUM omnium sævissimus est dolor, quem Græci *ισχιάδα* appellant, quod

L

coxas

coxasprehendit; eoque difficilior est, quod ferè post longos morbos, vi pestiferâ huc se inclinante, hanc partem corripit. Malum hoc, ubi inveteraverit, femur cum crure debilitat, & æger claudicat; interdum etiam femoris caput extra coxam elabitur, & femur ipsum protinùs contabescit.

Non multum hic juvant cucurbitulæ, aut vesicatoria parti imposita; altius enim membranis os circumcingentibus infixus hæret molestus humor, quam ut his extrahi possit. Efficaciùs est *epithema volatile* dictum, aut emplastrum ex *pice Burgundica*, addita *euphorbii* octavâ circiter parte, cum *terebinthina Veneta*, quantum satis erit, compositum.

Nihil autem tantum levamen adfert, in pertinaci præsertim morbo, ac *setaceum*, (1) sub locum affectum, ut materia inutilis evocetur, immissum. Sin autem vulnus ejusmodi minus necessarium videatur, aut nimis acerbum; *fonticulum* saltem in femoris dolentis parte internâ supra genu medicamento caustico inurere maximè ex usu erit; ita-

(1) Vid. supra, Cap. De insania, p. 85.

tamen, ut ulcus id non fanetur, sed diu trahatur, donec id vitium, cui per hoc opitulamur, conquiescat. *Celsus*, (1) *Hippocratis* exemplum secutus, (2) candentibus ferramentis, tribus aut quatuor locis super coxam, cutem exulcerare præcepit. Quâ quidem medicinâ nulla foret efficacior; utcunque enim terreret ignis aspectus, breviori cum dolore, quàm infert medicamentum causticum, peragi posset.

FRICATIONE quoque utendum est, & eodem die sæpiùs, quo faciliùs ea; quæ coëundo nocuerunt, digerantur; ipsisque præcipuè coxis, si fieri possit, adhibenda est. Aqua autem calida partem affectam fovere plerùmque nocet; fibris enim illa relaxatis, augetur dolor.

SED ad interna auxilia transeundum est. Horum præcipuum, detractò primum sanguine, est purgatio, per alvum. Catharticum potentissimum est, aut *mercurius dulcis sexies sublimatus*, aut *electarium è scammonio*; quod pro viribus sæpè repetere convenit. Diebus autem, quibus non exinanitur corpus,

L 2 *per*

(1) *Lib. IV. cap. 22.*

(2) *Aphor. VI. 60.*

per ea, quæ simul urinam cient, & alvum movent, morbi vis minuenda est. Ex his *tincturam guajacinam volatilem*, vel *balsamum guajacinum*, omnibus præpono.



CAPUT XIV.

DE

MORBIS CUTIS.

NIHIL jam dicam de *exanthematibus*, quæ per febres prorumpunt; uti nec de *pustulis* & *maculis*, quæ in fœdo corporis habitu cutem inficiunt. Hæc omnia, suis quæque locis, sunt exposita. (1) Morborum autem omnium, qui summum corpus occupant, fœdissimus est *lepra*. Ea duplicis est generis; alterum Græcorum, alterum Arabum nominant. De utroque, tum quæ ad naturam, tum quæ ad curam mali spectant, quantum ad rem satis est, alio in libro differui. (2)

Huic vitio fœditate proximum, at ori-

(1) Cap. De febribus, & De scorbuto.

(2) Vid. Medica sacra, Cap. II.

origine planè diverſum, dicitur *ſcabies*. Eſt autem aſpinitudo cutis rubicondior, undè puſtulæ oriuntur, ex quibus exit ſanies; fitque ex hiſ continuata exulceratio pruriens, quæ cito contagione ſerpit. Animatus reverâ dici poteſt hic morbus, utpotè qui animalculis ortum ſuum debeat. Etenim infecta quædam adeò exigua, ut aciem oculorum, niſi microſcopio adjuvetur, omninò fugiant, in cuticulæ fulcis latentibus, & ferè inviſibilibus, tanquam in nidis, ova ſua deponunt; tum calore loci fœtus brevi excluduntur, qui juſtam magnitudinem naçti, ipſamque cutem roſtris aculeatis penetrantes, fibrillas vellicant roduntque. Morſus iſte pruritus intolerabilem facit, undè ſcalpendi eſt neceſſitas; hinc ſcalptura pars lacerata humorem tenuem effundit, qui ipſe in cruſtulas duriores mox concreſcit. Animalcula autem ſubter cutem aſſiduè repentia de loco in locum, morbum propagant, dum ovis contagium longius effertur.

MANIFESTUM hinc fit, cur linteis, veſtibus, chirothecis, ſimilibuſque, quibus uſi fuerint contaminati, hoc ma-

lum in corpora sana transferatur. Ovula enim rebus hujusmodi ex molli materia confectis adhærentia cuti affricantur, & exclusa sordidam prolem edunt.

Id verò majoris est momenti, quod causæ cognitio morbi medicinam monstrat. Nihil enim hîc proficiunt purgantia, aut quæ ad sanguinem emendandum dantur medicamenta. Externis adjuventis res agenda est; delenda scilicet impura progenies, quod facili negotio perficitur. Tepido igitur in balneo corpore primum lavato, inungendæ sunt quotidie sub tempus lectum petendi partes affectæ, aut *unguento è sulphure*, aut quod odore minùs ingratum, *è mercurio præcipitato* conficitur; nisi quis malit linimentum componere longè gratissimum, parique efficaciam, ex *floribus aurantiorum*, vel *rosarum rubrarum*, adjecto *mercurio corrosivo rubro*, cum *axungia* contusis.

HÆC, quæ dixi, omnia in *Actis Regalis* nostræ *Societatis* habentur. (1) Edidit enim anno MDCLXXXVII medicus ingeniosus, *Johannes Cosimus Bonomo*, *Epistolam* Italico fermone scriptam

(1) Vid. *Philosophical Transactions*, Numb. 283.

tam ad celeberrimum *Franciscum Redi*, Florentinum, *de vermibus corporis humani*; in qua totam hanc rem, adjunctis etiam animalculorum cum ovulis suis figuris, dilucidè exponit. Hujus ego, cùm decem circiter post id tempus annis per Italiam iter facerem, exemplar nactus epitomen linguâ nostrâ composui, quam in patriam redux *Actis* memoratis inferendam curavi.









CAPUT XV.

DE

STRUMIS.



D


 IFFICILIS morbus est is, quem Latini *strumas*, Græci *χορδαίαι* appellant, glandularum scilicet duri tumores. Eæ fatigare medicos solent, quoniam & febres interdum movent, nec unquam facile maturescunt; & sive ferro sive medicamentis curentur, plerumque juxta cicatrices refurgunt, & longo spatio detinent. In cervice maximè nascuntur, item in alis, inguinibusque; præsertim in pueris. Interdum verò in pectus, & in mammas foeminarum, perveniunt. Deniquè in pulmonem haud rarò confluit humor, eoque vitiato, supervenit phthisis. Et profectò, si verum dicere liceat, in nostris saltem aliis-
 que

que borealibus regionibus à strumis ut plurimum oritur illa pernicies. Eo autem terribilius est hoc malum, quod à parentibus in prolem sæpè transit, & hereditate, quam cepit, haud faciliè se privari finit.

PERTINACI itaque & periculoso huic morbo omnibus modis occurrendum est; sanguinis missionibus, purgationibus, & eis, quæ ad viscidos, salios, atque acres humores emendandos sunt apta. Catharticorum optimum est *mercurius dulcis sexies sublimatus*, quem in puerorum usum cum *rhabarbaro* conjungere convenit; adultioribus verò per se dari potest, potione leni purgante post aliquot horas exhibita. Huic viribus proxima est *radix jalapii*. Aquæ etiam nostræ purgantes, quoniam glandulas simul emundant, ventremque solvunt, accommodæ sunt. Neque deniquè inutilis est tam in hoc morbo, quàm aliis, qui à viscidis humoribus nascuntur, pilula singulis noctibus assumpta, quæ ex *mercurii sexies sublimati*, & *sulphuris antimonii præcipitati*, singulorum grano uno, & *aloës Socotorinæ* granis tribus vel quatuor,

tuor, adjecto *syrupo balsamico*, conficitur.

QUÆ autem pravitatem hanc sanguinis & humorum corrigunt, pleraque sunt ex eo genere medicamentorum, quæ urinam movent; qualia sunt, *spongia ad nigredinem usta*, *sal diureticus*, & *tartarum vitriolatum*; quæ eo sunt commodiora, quod alvum simul aliquo modo laxant. Neque inutilis est *aqua calcis minus composita*. Ego fanè pulverem ex *spongiæ ustæ* scrupulo uno, *nitri purissimi*, *coralliæ*, & *sacchari albi*, singulorum scrupulo semis, bis die sumptum, cum dictæ *aquæ* cyathis tribus quatuorve, ex usu esse sæpissimè comperi. Sin autem corpus macilentum sit, *aquæ isti* par *lactis* mensura commisceri poterit. Propter vim etiam diureticam aliquid ad sanitatem conferunt *millepedæ*; vivarum potissimum succus, cum *nucis Moschatæ* aliquantulo contusarum, commisto *vino tenui*, expressus, *melleque* aut *saccharo* gratior factus.

DIÆTA neglectui esse non debet. Carnibus ex media materia, & piscibus fluviatilibus, conchis maximè, vescatur

tur infirmus. Salfamentis & condimentis omnibus abſtineat. Aquam bibat fluvialem, etiam coctam; putealem, aut ſtagnantem nunquam; minimè omnium nivofam. Loca enim montana, Alpes præcipuè, incolentibus gutturis glandulas natura tumefieri videmus. *L'onticulis* etiam peccantem materiam exhaurire prodeſt. Cœlum quoque mutare sæpè in ſalutem cedit, in primis ſi morbi in pulmonem ruituri ſit metus; ita tamen ut regionem nec calidam nimis, nec frigidam, nec tempeſtatum variationibus inſalubrem, petat æger.

ILLUD deniquè in hoc morbo quantumvis pertinaci notabile eſt, quod nonnunquam per ætatis & habitus corporis mutationes, in juvenibus præſertim, ita ſponte ſuâ definit, ut integra ſanitas reſtituatur. Ea res, ut opinor, *taſtum ſanantem regium*, quem vocant, in morem primum induxit. Cùm enim iſtam mali huiusce naturam deprehenderent homines aſtuti, facilè exiſtimarunt rem gratam ſe regibus facturos, ſi illis perſuaderent, ut ritu ſolenni, adjunctis ſacerdotum precibus, virtutis ſuæ hoc ederent experimentum; quo
ſci-

scilicet populi reverentiam sibi conciliare, & jure divino, si diis placet, datum sibi imperium evincere possent. Nil mirum igitur si fides dictis haberetur, & putarent interdum ipsi reges coelitus sibi concessam istiusmodi potentiam; cum

*Nil est, quod credere de se
Non possit, cum laudatur, dis æqua
potestas. (1)*

Mundus quoque vult decipi; & res interdum ex voto cadebat, cui vis imaginandi, quæ permagna est in morbis sanandis haud parum tribuit. Hinc reges nostri (nisi forsan cum princeps aliquis sapientior sceptrum teneret) in credulum vulgus beneficium hoc jam diu humaniter contulerunt. Reges autem Galliæ ante nostros se donum istud eximium divinitus habuisse jactant.

(1) *Juvenal. Sat. IV. v. 70.*





CAPUT XVI.

DE

SCORBUTO.

S CORBUTI nomen apud auctores medicos morbum designat adeò multiplicem, & facie diversum; ut non idem, sed alius aque alius esse videatur. Nullo non tempore in septentrionalibus regionibus popularis fuit, eo sævior, quo illæ oceano proprius adjacent: idcirco Danos, Norvegos, & maris Baltici accolæ maximè infestat; neque eo immunes sunt Germani, Belgæ, nostrique homines. (1)

INCIPIT autem hoc malum à foedis in ore cruribusque ulceribus; undè *Plinio stomacace & sceletyrbe* dicitur, (2) qui sceleribus aquarum imputat, & auxilio

(1) Vid. *Eugalenum De scorbuto*; sed in primis *Sennertum, Lib. III. Part. V.*

(2) *Nat. Hist. L. XXV. sect. VI.*

xilio repertam fuisse *herbam Britannicam* (quæ nobis *hydrolapathum nigrum* appellatur) memoriæ prodidit. Sed & ipsi *Hippocr.* jam olim innotuit, à quo *σπλῆν μέγας*, *lien magnus*, vocatur; & pariter à frigidis, crudis, turbidisque aquis epotis oriri dicitur. (1)

MEMINI me vidisse in nosocomio hujusmodi casum in viro rustico mediæ ætatis, qui in insula *Toliapis Ptolemæo* dicta, nunc *Sheppey*, vitam egerat. Is locus tam cœlo turbido & humido, quàm aquis insalubribus, infamis est. Et quidem conjectari licet Romanos milites, postquam, duce *Claudio Cæsare*, in Britanniam transmissi erant, atque hanc insulam cum locis vicinis occupaverant, morbo hoc correptos, monstrantibus incolis, *herbam Britannicam*, quam auxilio repertam fuisse dicit *Plinius*, comperisse, & à regione id nomen dedisse. Scimus enim Imperatorem illum à Gessoriacò, quod in Gallia oppidum est, nunc *Boulogne* dictum, ex adverso Cantii nostri, hanc in terram milites exposuisse. (2) Huic parem histo-

(1) Vid. *De internis affection. Sect. XXXIV.* & *De aëribus, locis, & aquis, Sect. X.*

(2) Vid. *Sueton. vit. Claudii Cæs. cap. XVII.*

istoriam narrat, Strabo de Romano exercitu apud Album Pagum, quem, duce *Ælio Gallo*, *Agustus Cæsar* in Arabiam misit. Dicit enim illum oris & crurum vitiis, morbis nimirum regionis istius indigenis, qui *stomacace* & *scele-tyrbe* vocantur, suntque resolutio quædam ab aquis & herbis proveniens, tactum fuisse. (1) Minimè autem dubito, quin aër infalubris marinus, cibus pravus, cum aquis noxiis, cælum illud hisce vitiis obnoxium reddiderint; ex *Ptolemæi* enim *Geographia* liquet Album Pagum ad finum Arabicum situm fuisse. Sed hæc obiter. Rusticus ille, quem dixi, malo corporis habitu cum febre intermittente abnormi laborabat; accedebant crurum ulcera mala, in utraque nimirum tibia. Ab assumptis medicamentis, quæ scorbuto conveniunt, amaris scilicet & urinam moventibus, convalescere videbatur: ulcerum enim alterum ope chirurgi jam impletum erat; alterum verò, dum sanef-

ce-

(1) Στομακάκη τὸ καὶ σκελογίρη πειρασμοῦ-
νης τῆς στρατιᾶς ἐπιχωρίοις πάθεισι, τῶν μὲν περὶ
τὸ σῶμα, τῶν δὲ περὶ τὰ σκέλη παράλυτις τινὰς
δηλύντων, ἔκ τε τῶν ὑδρείων, καὶ τῶν βοτάνων α
Geograph. Lib. XVI. pag. 781. ed. Paris. 1620.

cebat, ex improvifo tenuit gangræna, & concifa carne, ne latius ferperet malum, æger subito mortuus eft. Diffectò abdomine, mox oculos rapuit ingens lienis moles formâ naturali, folâ magnitudine auctâ; neque color mutatus erat, nec mollitiem tumor aut fcirrhus vitia- rat. Pendebat autem libras quinque cum quarta libræ parte, cùm hepar quatuor tantùm libras totidemque uncias ponde- re æquaret. Subftantia deniquè, quæ visceris hujus natura eft, laxis fibris fuf- fufum nigrum cruorem vifui obtulit.

Ab ulceribus iftis fupra memoratis os ipfeque fpiritus malè olet; gingivæ vi- tiantur, fublividæ & nonnunquam fub- atræ redduntur, ac digito vel leviter preffæ atrum cruorem emittunt; eæ- demque fic laxæ funt, ut à dentibus dif- cedant, quos facilè omnes interdùm eximere liceat. Intereà maculæ lividæ, tanquam veftigia fuggillationum, variis corporis locis efflorefcunt; in brachiis fcilicet, in coxis, in cruribus, fæpèque per univerfi corporis cutem, adeò ut hæc quafi ictero fœdata videatur. Tor- mina quoque ventrem difcruciant. Et ne levia quidem prætermittam, ab in-
testi-

testinorum doloribus nomen suum ,
tum Latinum tum Anglicum , traxisse
videtur iste affectus , à voce nimirum
Saxonica *schorbock* vel *schorbuck* ,
quæ illa lingua ventris lacerationes de-
notat.

PRÆTER infalubres aquas cibos
etiam in partem nocuenti trahunt au-
ctores , falsamenta nimirum & legumi-
na ; quæ , cum sint difficilis concoctio-
nis , crassum minùsque commodum nu-
trimentum corpori suppeditant. At cau-
sam tamen magis universalem adhuc
non videntur satis attigisse. Illa autem
aër est usibus vitæ minùs idoneus , qui
in pulmones receptus plurimùm noxæ
adfert. Id in longis navigationibus ma-
ximè manifestum est , in quibus nautas
sævissimè corripit hæc lues. Cujus rei
illustre exemplum præbuit *Historia* nu-
per edita itineris marini magni nostri
Ducis *Ansoni* , qui totum terrarum or-
bem circumnavigavit ; in quo tertia fe-
rè pars nautarum hâc calamitate con-
sumptâ periit , maloque adeò evecto ,
ut etiam in fractis ossibus calli , qui diu
induruerant , quasi compage jam recen-
ter rupta , mirandum dictu ! Dissolve-

rentur. (1) Est profectò in hisce casibus summa humorum omnium corruptio, & quædam putrefactio; sanguinis mistura eo usque vitiata, ut quâcunque parte emissus nihil purpurei coloris habeat, sed atram & coenofam colluviem referat. Quibus autem modis ita corrumpant & putrefaciant humores dictæ jam causæ, non difficulter cognoscet, qui proprietates legesque motûs in fabrica animali perspectas habuerit. De illis enim ut pluribus hic agam, eo minùs necessarium videtur, quod in libello nuperrimè edito eas fusiùs exposui; ubi commoditates & usum *machinæ Suttonianæ* ad extrahendum è navibus aëra inquinatum, allatis etiam documentis, ostendi. (2)

Quod ad curam attinet, faciliùs multo est morbo huic venienti occurrere, quam illum depellere; cùm enim corpori semel infederit, difficillimè medicinam sentit. Optimum autem medicamentum est aër salubris opportunè inspiratus, cum apta diæta. Cùm primum
igi-

(1) Vid. *Anson's Voyage round the world*, London, MDCCXLVIII.

(2) *An Historical account of à new method for extracting the foul air out of ships*, London, MDCCXLIX.

igitur quis ægrotare cœperit, si fortè sit in mari, quàm citissimè fieri poterit, mutandum est cœlum, & pro marino terrenus aër hauriendus; sin in terra sit, rus amœnius petere, & aëre aperto ac sereno frui debet. Uterque verò aut carnibus recentibus vescatur, & ex materia tenerrima: aut potissimùm herbis, tam iis, quæ sale volatili gaudent, quales sunt *cochlearia*, *nasturtium*, *beccabunga*, & his consimiles; quam illis, quæ succum frigidiorē præbent, cujusmodi sunt, *acetosa*, *endivia*, *lactuca*, *portulaca*, & id genus aliæ. Et has quidem omnes utriusque generis alias aliis miscere, & temperare inter se, sæpè erit utile. Maximè autem juvabit fructus subacidos, *mala citrea*, *aurea*, *punicaque* frequenter comedendo stomachum pariter, ac corporis humores, refrigerare & astringere.

At operæ pretium erit ipsam *Narrationem* itineris modo dicti pervolvere; quæ multa sanè medicis scitu utilia, omnibus lectu jucunda, variosque casus ac rerum discrimina justo ordine, styloque eleganti descripta complectitur. Neque laboris fortassis illum pœni-

tebit, si quis velit ea pervolvere, quæ cum *machinæ Suttonianæ* utilitates exponerem, ipse de hoc morbo conscripsi. Leget ibi historiam maximè memorabilem de nauta quodam Batavo; qui cum in nave ad Groenlandiam appulsa hoc malo jam ferè consumptus esset, herba tamen *cochlearia* pecudum more pastus, restitutâ sanitate, in patriam firmis viribus rediit.

HIS, quæ fusiùs fortassè diximus, illud deniquè adjungere non inutile erit: quod sanguinem, si ex quavis parte profluat, id quod non rarò fit, *elixir vitrioli Mynsichti*, *aquâ fontanâ frigidâ* commistum, ac subindè haustum; vel interdùm etiam *tincturâ stypticâ*, eodem modo assumptâ, commodissimè supprimet.





CAPUT XVII.

DE

MALO HYPOCHONDRIACO.

NON unam aliquam sedem habet malum, quod *hypochondriacum* dicitur, sed totius corporis est morbus. Maxime autem vitiantur imi ventris viscera, ventriculus nimirum cum intestinis, hepatis, lienis, pancreas, & mesenterium; quorum singula pro natura sua & usibus vitæ, quibus accommodata sunt, afficiuntur. Ventriculum crebri ructus & inflationes, cruditatis signa, infestant. Bilis crassior & tenax in canaliculis suis hærens hos opplet, & jecur tumefacit. Cum affectus est lienis; cujus officium id esse videtur, ut per arterias suas sanguinem fluidissimum, partim in cellulas proprias, in venam splenicam, ad

hepatis usus immittat; liquor is crassior factus vitium facit, undè in vena ista ferè stagnat, & molle viscus tumore distenditur. Pancreas ubi malè habet, glandulæ ejus, quæ salivam deferunt, aliquo modo indurata humorem suum parciùs profundunt; hinc bilis, quæ in intestino illi admiscetur, non satis diluitur; & chylus nimis viscidus per canales *lacteos* dictos difficulter fertur, atque in viis suis quodammodò hæret. Omentum, pinguetudinis officina, si quando ab hoc morbo aliquid mali patitur, oleum illud tenue & subtile, quod in sacculis hic colligitur ad hepar usque deferendum, & sanguini illuc à liene adducto affundendum, copia solitò minori elabitur; quo fit, ut sanguis in vena portarum neque pro more solutus, neque lymphæ attenuata satis refertus evadat. Mesenterii deniquè vitium, quod affert iste affectus, id facit, ut glandulis membranæ hujus obstructis, lymphæ in ductus chylicos instillandæ penuria chylus nimis spissus, & nutritioni minùs idoneus, sanguini assiduè suppeditetur. Isthæc omnia morbi hujusce naturam patefaciunt; in quo scilicet

licet sanguis & humores crassescunt, & motionibus suis vitæque usibus inhabiles redduntur.

CAUSÆ autem multiplicis hujus mali in promptu sunt, quarum præcipuas, ut verbo dicam, corporis quietem, animique motiones, meritò quis statuat: illa enim efficit, ut tardius moveantur humores; ab his nunc consistit fere sanguis, nunc vehementius incitatur; in utroque verò casu incommodum capit sanitas.

HACTENUS exposita ad curationem ducunt, in qua tum expurgare, tum emendare humores convenit. Neque tamen violentiora cathartica hic opus sunt; mitioribus res tutius agitur, illis præsertim, quæ incidant humores, alvumque simul & urinam moveant. Hujus generis sunt *pilulæ ecphrasticæ*, *aloëtica saponaceis* conjuncta, *rhabbarbarum*, *sal Glauberi*, & his confimilia.

HUMORUM vitium, lentor nimirum & crassitudo, medicamentis ex *chalybe*, amaris & aromaticis adjunctis, tincturæ præsertim modo, commodissime tollitur. Aquæ verò, quæ per venas

hujus metalli fluxerunt, medicamentorum omnium chalybeiorum sunt efficacissimæ.

OMNIA deniquè corporis exercitationum genera necessaria sunt : sphaeris ligneis vel pila ludere ; brachia, compressis utrâque manu ponderibus plumbeis, frequenter agitare, est utilissimum ; nihil autem assiduâ equitatione salubriùs.

DICTIS finem inponet narratiuncula, quæ risum simul moveat, & inconstantis hujus morbi indolem patefaciat. Vir quidam academicus ex nimia ignavia hâc ægritudine tam graviter laborabat, ut tandem decumberet : ingravescente indies morbo, mortem sibi instantem denunciat ; jubet igitur, ut moris est, campanam funebrem in templo ædibus suis vicino pulsari, quasi nimiam suam ante supremam vitæ horam audire volens. Fuerat autem ipse juvenis exercitii causâ modulatè campanas pulsare solitus. Quid jam sequitur ? Campanarum pulsator illi malè rem agere videtur ; statim itaque iratus è lecto surgit, manibus suis modum rectiùs pulsandi monstraturus ; quod cum fecerat, totus

tus sudoribus diffluens ad lectum iterum se confert, mox expiraturus. Vitam autem reddidit iste labor, & convaluit. Ita, quod observavit olim *Hippocrates*, (I) *contraria contrariorum sunt medicamina.*

(I) Τὰ ἐναντία τῶν ἐναντίων ἐστὶν ἰήματα, de flatibus, §. III.






CAPUT XVIII.

DE

ANIMI AFFECTIBUS.


AFFECTUS animi, quos *passiones* vulgò appellant, vehementes nimirum & immoderati, pro morbis haberi debent; nam corpori etiam varias ægritudines afferunt. Id autem quibus modis eveniat, nisi cognitâ animi naturâ, legeque perspectâ, quâ is cum corpore in unum coëat animal, intelligi nequit; quam scientiam in hac vita nunquam, ut opinor, assequemur. Vitæ enim ac naturæ nostræ ratio ita comparata est, ut facultates animi viresque corporis mirâ quâdam promptitudine exeramus; modum verò ipsarumque actionum omnium principium prorsus ignoremus, cujus cognitio ad benè beatèque vivendum minimè necessaria esse videtur.

EFFECTA tamen motionum animi in
 ma-

machinam nostram deprehendere facile possumus; nec mutationes, quas in sanguine & humoribus secum ferunt, dignoscere est admodum difficile. Quædam enim sanguinei laticis motum reprimunt, aliæ incitant, nonnullæ alternatim sistunt & propellunt. Sic mœror & metus cohibent; iracundia, indignatio, & intemperata libido stimulant; conjunctæ hujusmodi perturbationes motus tardioris, aut celerioris, vicissitudines subitaneas, se festinanter excipientes, procreant. Neque illud observare alienum est, quod immodici affectus, ubi diu infederint, pro natura sua in longos sæpè morbos vertuntur. Ita sollicitudo, desperatio, mœror, melancholiam faciunt; iracundia longo tempore perseverans in furorem & insaniam definit. Attamen pro varietate temperamentorum cum animi, tum corporis, plùs minùsve nos movent affectus. Quin & in eodem homine non omni tempore pariter perturbant. Usque adeò incomprehensibilis est fabricæ nostræ constructio.

CÆTERUM id longè adhuc mirabiliùs est, quod inter auctores medicos à solo
faga-

fragacissimo *Aretæo* anidmadversum reperio. (1) Etenim non modò, ut is notat, animi affectus morbos faciunt; sed & vicissim ipsi morbi efficiunt *παθν*, eaque interdum, quæ naturæ illorum contraria videantur. Exemplo apud ipsum est *hydrops*, qui licet morbus sit perniciosissimus, ægrotantibus tamen tolerantiam & patientiam affert; non ex alacritate, ac bona spe, velut iis accidit, qui bonis rebus utuntur, sed ex ipsa morbi natura. Cujus rei causa, inquit, exponi non potest, sed mirari tantum id licet.

VERUM ista omnia spirituum animalium ministerio peraguntur; hi enim cor, motus sanguinis instrumentum, minori aut majori vi contrahunt. Idcirco pulsus arteriarum has permutationes etiam in ipso illarum ortu commonstrant.

PRIUSQUAM autem ad medicinam harum animi ægritudinum deveniam, monere convenit, non frustrà, sed optimo Supremi rerum Conditoris consilio, infitas nobis esse naturales istas animi commotiones; quo scilicet ad mala fugien-

(1) *De causis & signis diuturnarum morborum, Lib. II. cap. I.*

gienda, & bona arripienda, cum impetu quodam feramur. Minimè igitur noxia sunt *πάθη*, nisi ubi immoderata rectæ rationis imperio non reguntur, & limites aptos transcendunt.

TUMIDOS autem hos animi fluctus componere philosophiæ munus est. Verùm, proh dolor ! Ad irritum hic plerùmque cadunt Stoïcorum præcepta ; quippè qui & ipsi sæpenumero magna loquuntur, non vivunt :

Naturam expellas furca licet, usque recurret.

Tentandum est tamen, & quo difficilius sit pugna, eo gloriosior erit victoria. Sed hæc philosophorum disputationibus relinquenda esse forsitan quis dicet, cùm nostrum sit corporis medicinam promittere. At liceat mihi in re tanti momenti pauca quædam virtutis incitamenta, quæ ex scholis eorum didici, hisce medicis nostris immiscere.

IN PRIMIS itaque ipsa natura trahimur omnes ad voluptates ; quarum aliæ corporis, aliæ sunt animi. Ad illas autem maxima pars hominum proclivior est ; harum illecebris pauci, *quos æquus amavit Jupiter*, capi volunt. Rei autem
tem

tem istius hæc ratio esse videtur, quod vix unquam istis recti animi conscientia frui licuit, & gaudium illud percipere, quod ex libidinum suarum moderatione viro bono enascitur; cupiditatum verò lenociniis dediti virtutis blandimenta nondum experti sunt, undè ignoti nulla cupido. Paulatim igitur assuescere oportet, nec oleum camino unquam est addendum, si quis tantam hanc exoptat felicitatem.

PERTINET ad hanc rem id, quod est apud *Ciceronem*, à *Catone* dictum; acceptum verò ab *Archyta Tarentino*, magno in primis & præclaro viro: *Nullam capitaliorem pestem, quàm corporis voluptatem, esse hominibus à natura datam; cujus voluptatis avidæ libidines temerè & effrenatè ad potiundum incitarentur.* (1) Et ea sanè, quæ summus ille vir huc facientia persequitur, prudens quispiam magnâ animi jucunditate perlegere poterit. Rectissimè igitur apud *Silium Italicum* exclamat virtus :

(1) *Cato Major, Cap. XII.*

*Quippè nec ira Deum tantum, nec
tela, nec hostes;*

*Quantum sola noces animis illapsa
voluptas. (1)*

VERUM enimverò, ficut moderatio cupiditatum mentem confirmat; ita temperantia in viétu corpus turbidis his motibus minùs obnoxium reddit. Neque id tantùm in iis, quibus excandescit fanguis; sed etiam in illis, qui reprimunt, locum habet; quandoquidem tranquillum rerum statum conservat.

ET hâc quidem viâ venientibus his malis occurritur, aut saltem leviora fiunt. Ubi autem jam corpus occuparent, singula sibi convenientia postulant remedia. In iis commotionibus, quæ vitalium humorum cursum coërcent, stimuli requiruntur; frena verò, si effervescent. Stimulant commodissimè *gummi graveolentia, castoreum, sales & spiritus volatiles ex animalibus vi ignis elicit*, & similia. Impetum autem & furorem sanguinis refrenant, sanguinis missio, alvus paulò fusior, *nitrum*, & quæcunque refrigerantia. Optimum autem est consuetudine & con-

confiliis uti fortium & sapientium viro-
rum ; permultum enim in vita omni va-
lent exempla , quibus rationi obtempe-
rare sensim discimus , affectusque rege-
re , qui , nisi parent , imperant.

QUI autem prorsus *ἀπαρθεῖ* nos esse vo-
lunt , omnesque animi affectus quasi no-
cuos suppressere ; ii certè rerum Con-
ditoris ter Optimi Maximi sapientiam
& bonitatem impugnant , qui in opti-
mos usus fabricæ nostræ illos inseruit &
quasi intexuit ; idque non ut singulis
tantum salutare , sicut jam dixi , sed
etiam ad societates conjunctionesque
hominum servandas prorsus necessarios.





C A P U T XIX.

D E

MORBIS MULIERUM.

SUPER mulierum morbis multa dicere eo minùs necessarium esse videtur, quod in his describendis & sanandis tantùm operæ posuerint plurimi auctores. Pauca tamen, ne neglectui habitus videatur sexus amabilis, breviter attingam; illis, qui virgines infestant, primum tribuens locum, quibus cœlebs sua vita multa affert incommoda. Ex his autem frequentissimum est.

S E C T I O I.

MENSTRUORUM SUPPRESSIO.

MENSTRUORUM fluxum plerùmque impedit sanguinis lentor, quò fit, ut is canaliculos ad hunc effluxum naturâ comparatos, & sphincteribus suis instructos, vi suâ aperire non
N pos-

194 MENSTRUORUM SUPPRESSIO.


possit. Neque enim, ut vulgaris fert opinio, arterias uteri singulis mensibus dirumpit sanguis; sed per ductus sibi proprios, naturæ legibus turgescens, foras exit. Ab ista humoris vitalis crassitudine evenit, ut vultus color vividus in viridem mutatus amittatur & pereat.

Huic malo illa remedia conveniunt, quæ sanguinis circuitum promovendi, viscidosque humores incidendi & attenuandi, vi pollent: qualia sunt amara omnia, aromaticis conjuncta; ut etiam multa eorum, quæ *ferrum* suppeditat. Hæc autem antecedere debet sanguinis detractio; & cathartica, adjuncto *mercurio sexies sublimato*. Præstantissima est etiam *tinctura sacra*.

Ex omnibus autem, quæ menses movent maximè, singularem virtutem habere deprehendi *belleborum nigrum*; ita ut illum vix unquam spem fefellisse meminerim. Idcirco *tincturæ melampodii* cochleare minimum ex aquæ tepesactæ haustulo bis die assumi jubeo. Et illud quidem notabile observavi; quod quotiescunque aut propter malam partium conformationem, aut alia quacunque de causa, sine effectû datum es-

fet

set hoc medicamentum , sanguis per alias vias propulsus fuerit : undè clarissimè constat , quantâ vi sanguinem propellendi polleat ista medicina.



SECTION II.

IMMODICUS MENSIIUM
FLUXUS.

SED & non rarò nimis magnâ copiâ fluunt menses. Ubi hoc accidit , cohibendum est profluvium. Id autem , misso primùm sanguine , efficiunt , cum ea , quæ sanguinem cogunt & inspissant ; tum , quæ fervorem ejus minuunt. Ex illis præcipua sunt , quæ *vitriolum* aut *alumen* participant ; in primis *tinctura rosarum* ; aut *pulvis ex aluminis rupei* portionibus tribus , & *sanguinis draconis* parte unâ , simul liquatis , confectus. Calorem verò sanguinis , & fluxum hinc proveniente , quibuscunque aliis remediis potentiùs lenit *cortex Peruvianus*.





S E C T I O III.

FLUORES ALBI MULIERUM.


F OEDUS morbus est tetra ista colluvies, quæ colore albo ex foeminarum naturalibus interdum profluit. Hunc autem humorem modo profundunt canales uterini; modo ex glandulis, quibus confita vagina est, erumpit. In illo casu, fluentibus mensibus supprimitur profluvium; in hoc, etiam cum in menstruâ est mulier, perstat adhuc, & vel uterum gerentem excruciat.

IN utraque mali specie corporis habitus præcipuè habenda est ratio; ab illius enim vitio tam hic, quam iste morbus originem trahit; ubi autem in ipsa vagina sedem fixit, externa etiam opus sunt.

VOMITUM igitur plerumque primò cieri oportet, *vino* præsertim *ipeca-*
coanbe. Purgantia brevibus intervallis data conveniunt, in primis *rhabarbarum*: quod vel per se, adjectis quibusdam aromaticis, additoque interdum, ubi res postulat, *mercurii sexies sublimati* aliquanto; vel, quod nomine *tin-*
ctu-

curæ rhabarbari vinosæ proſtat, frequenter aſſumi poterit. Quinetiam laxiores corporis fibrillæ adſtringentia deſiderant, ea in primis, quibus *ferrum* ineſt.

QUOD ad externa autem, quæ in vaginæ vitio neceſſaria fore dixi; ea minimè adhibere oportet, quæ nimiâ vi peccantem humorem reprimunt ac repellunt; illa tantùm ſunt ex uſu, quæ membranæ hujus ulcuſcula detergent ſimul & ſanant. Ipſe eventu ſæpè feliciffimo ſceminam laborantem, aut *aquam aluminofam Bateanam*, aut *aquam vitriolicam camphorata* (adjecto alterutri *mellis Ægyptiaci* aliquantulò) per ſyringem hujusmodi uſibus aptam, parvâ quantitate, at repetitis vicibus, infundere juſſi. Neque nihil ad ſanationem confert vaginam ſubindè ſuffumigare; ſuperinjecto nimirum prunis pulvere ex *thure*, *maſtiche*, *succino*, & *cinnabari antimonii* ita commiſtis, ut ſingulorum æqualis ſit portio.





S E C T I O IV.

D E

MORBO HYSTERICO.

NULLUS morbus æquè foëminas vexat, atque *affectio hysterica*. Hæc puellarum; nuptarum, viduarumque communis est; & si non magnum periculum, terrorem tamen non levem sæpissimè affert; interdùm etiam ita examinat, ut tanquam comitialis morbus prosterнат.

UBI incidit in eam mulier, si satis virium est, sanguis missus adjuvat; si parùm est, cucurbitulæ tamen defigendæ sunt inguinibus aut coxis. Sin autem diutiùs jacet, extinctum ex lucerna linamentum, aut aliud quiddam foëtidi odoris, naribus admovere oportet, quo excitetur. Aquæ frigidæ perfusio idem efficit. Inter hæc coxas & poplites perfricare convenit.

DEINDE, ubi ad se rediit ægra, ne casus idem revertatur, providendum est. Menstrua, si solito minus fluxerint, proritanda sunt. *Gummi graveolentia* multùm profunt, item parata ex *ferro*
me-

medicamenta. Corporis etiam exercitationes conveniunt. At facienda plerumque est animi commotionibus medicina.

SAPIENTISSIME deniquè *Hippocrates* pro medico maritum esse voluit. Ille enim, postquam *castoreum*, aliaque plurima juvantia, proposuerat; optimum esse, ut mulier in utero gestet, & virgo cum viro simul habitet, decernit. (1)

(1) " Ἀριστον δὲ ἐν γαστρὶ ἔχειν τὴν διὰ παρθένον πύθαι ἑρπυσίαν ἀνδρῶν. *De morbis mulierum, Lib. II. sect. 19.*





S E C T I O V.

D E

PARTU DIFFICILI.

HUMANITAS nos admonet, ut mulieribus difficulter parientibus, si quid auxilii præter manus operam præstari possit, succuratur. Quanquam enim humani generis propagationi ita consulerit provida natura, ut, licèt magno cum dolore, sine multo certè periculo ex utero exeat foetus; fit tamen interdùm, ut gravi cum labore in lucem protrahatur infans. Id multas ob causas evenit, quibus obviam ire norunt obstetrices. At unico in casu quid faciendum sit, sæpè nesciunt; is est, cum irritis conatibus, colicorum torminum æmulis, diu parturit foemina. Hoc ubi fit, *opii* granum unum aut alterum assumere convenit; cujus ope dolores isti, qui partum impediunt magis quàm promovent, conquiescunt, & sublevata rem suam strenuè agit natura. Est etiam illud hic alicujus momenti, quod medicamenti anodynæ vis, ut alias omnes partes constrictas, ita etiam uterinas laxat aperitque.

C A7



CAPUT XX.

D E

MORBIS VENEREIS.

LUES venerea, magnum illud scortatorum flagellum, opprobrium foret medicorum, ni feliciter illi remedium inventum fuisset *argentum vivum*.

MORBI naturam, historiam, & progressus ita disertè exposuit doctissimus *Astrucci*, (1) ut nihil ampliùs ad ejus cognitionem requiri possit. Modum autem, quo vires suas in corpore exerit ponderosus hic liquor, ipse olim satis, ut opinor, adjunctis etiam cautionibus aliquot necessariis, dilucidè explicui. (2) Illud igitur solùm restat, ut super incommodo uno & altero, quæ morbo

N 5 huic,

(1) *De morbis venereis. Lutetiæ Parisiorum*, MDCCXLⁱ

(2) *Essays en poisons*, MDCCXLXVII. *Essay* IV,

huic, partim ex ipsius natura, partim ex mala curatione superveniunt, monita quædam suggeram.

ET primo quidem infestus casus est jugis ista, quæ gonorrhœam interdum excipit, humoris mucosi destillatio. Pertinax id profluvium tam ex vesiculis feminalibus, quàm ex glandulis, *prostatitis* dictis, provenit, corrosis vi morbi canaliculorum oribus; illosque maximè fatigat, qui ad expellendum virus conceptum fortioribus catharticeis nimis diu corpus debilitarunt.

BALSAMICIS partes laxatas confirmare nituntur medici, at frustra plerumque sunt. Mihi multis jam annis in usu fuit hujusmodi tinctura: *Rhabarbari* drachmæ tres, *gummi guajaci* sesquidrachma, *laccæ* drachma una, *cantbaridum contusarum* drachmæ duæ, *coccinellæ* femidrachma, in spiritus vini rectificati sesquilibra infunduntur, & fit colatura. Hanc efficacissimam esse semper expertus sum, & medicis chirurgisque quamplurimis commendavi. Gutte autem triginta, ad quinquaginta usque (quantum scilicet sine urinæ difficultatis metu ferri poterit) manè, & ho-

horâ decubitûs, ex aquæ tepesactæ haustulo assumuntur.

Non rarò autem, morbo per longum salivæ fluxum depulso, febris hectica corpus debilitatum occupat. Ubi id accidit, decoctum ex *lignis guajaci & sassafras, radicibusque Chinæ & sarsaparillæ*, adjuncto *glycyrrhizæ, seminumque coriandri* aliquantulò, copiosè bibendum est, lacte commisto. In decocti autem hujus usu, usquequo resectæ fuerint vires, persistere oportet.

DENIQUE non alienum erit monuisse, tempus proritandæ salivæ, quo noxii humores expellantur, maximè opportunum id esse, cùm aut pustulæ per corpus, aut ulcuscula in ore præsertim & faucibus, jam aliquamdiu proruperint; neque tamen ossa, quibus proximè instat caries, corrumpi cœperint. Metus enim est, ne lamellæ osseæ, putredinî jam obnoxie, ponderosâ globulorum metallicorum vi diffringantur. Idcirco usu medicamenti parciori hanc curam longiùs protrahere, quàm festinare, satiùs est.



C A P U T XXI.

D E

MORBIS, QUI ALIIS
SUPERVENIUNT,
AUT IN ALIOS
MUTANTUR.

PURIMUM confert cum ad medendi rationem, tum ad medici honorem, quinam morbi aliis ultrò superveniant, aut in alios mutantur, cognoscere. Horum igitur præcipuos quosdam breviter commemorabo.

DISPUTANT autem inter se auctores, quarumnam causarum vi istiusmodi mutationes eveniant. Eæ autem causæ pro morborum natura sunt diversæ. Nonnunquam enim partium affectarum consortio, & quâdam cognatione cum aliis, ex læsa in sanam illabitur malum. Sæpius

piùs partium vicinia damnum latius trahit. Sæpiissimè verò ipse morbus est ejus conditionis, ut vel per modum solutionis, vel corporis corruptionem, in alium definat. Exempla nonnulla ex multis, quæ in promptu sunt, producam.

CAPITIS & ventriculi consensus facit, ut hoc pituitâ gravato, illud vertigine laboret; & contrà, ut, repleto aut læso cerebro, ventriculus ægritudine corripiatur. Pari cognatione jecinoris & intestinorum fit, ut, colicis doloribus hæc torquentibus, icterus in illo mox oriatur; cùm ex adverso icterus interdùm bilem flavam in alvum effundit, & tormina excitat. Uteri quoque cum multis partibus est consortium, adeò ut *Hippocrates hunc esse omnium in mulieribus morborum causam* (I) dixerit. Hæ autem partes præsertim sunt caput, pulmo, & stomachus; *συμπαρείλας* verò instrumenta sunt spiritus animales, qui animi maximè affectionibus commoti, vel à vulva malè affecta corpus afficiunt, vel noxas corporis cum illa communicant.

PAR-

(I) *De morbis mulierum Lib. II.*

PARTIUM autem vicinia, quam alteram causam morborum successione proposui, in inflammationibus præcipuè locum habet, humore in partem adjacentem translato. Ita pleuritis in peripneumoniam transit; difficultati urinæ, quam *σπραγγησία* Græci vocant, ileus supervenit; renum malæ affectiones lumbos in conjunctionem trahunt, lumborumque dolores cum renibus communicantur.

MORBORUM deniquè, qui aliis superveniunt, aut in alios mutantur, tertiam causam naturæ ipsorum tribui; quæ, cum sit multiplex, multis etiam modis effectum sortitur. Arthritis interdum in dolorem colicum transit, dolorque colicus in arthritidem. Varices doloribus articulorum supervenientes liberationem morbi promittunt. Apoplexiæ succedit paralyfis; & nervorum, nunc in toto corpore, nunc in aliqua tantum parte, resolutio morbum solvit. Sin autem à membris jam resolutis ad caput revertatur malum, mors plerumque pro medico est. Difficultas spirandi, quæ diu molesta fuit, hydropem in pectore pariter ac abdomine progignit.






nit. Hydrops inter cutem ne in ascitem definat, magnoperè timendum est. Melancholiæ etiam, quæ longo tempore duravit, non rarò supervenit morbus comitialis, salutisque spem omnem adimit.

MULTA, quæ huc faciunt, collegit *Hippocrates*; & ex illis divinam artem bonum aut malum eventum præfagienti sapienter monstravit. Ut finem igitur faciam, non ab re erit monere, etsi causæ, quas dixi; singulæ virtutem suam haud rarò exerant; ut multæ tamen simul, junctis viribus, morborum cùm successiones tum mutationes efficiant, plerùmque evenire.





CONCLUSIO. DE VITÆ REGIMINE.

 PROPOSITO, ut opinor, ne-
 **A**  quaquam alienum erit, si il-
 lis, quæ ægris facienda pro-
 pofui, nonnulla etiam, quæ
 fanis per omnes ætates conveniunt, con-
 clusionis loco breviter adjungam. Etsi
 hunc fanè laborem sapientissimi *Celsi*
 præcepta supervacuum ferè reddidisse
 videantur: (1) quæ, discriminis, quod
 cœlum diversum, diversaque hodiè ac
 olim vitæ consuetudo facit, habitâ ra-
 tione, quisquis servaverit; is profectò,
 ut verbis ipsius utar, *in secunda vale-
 tudine adversæ præsidia non consu-
 met.*

Ita enim comparatum est corpus no-
 strum, ut mutationes aliquas & aberrat-
 tiones sine magna injuria faciliè ferre
 pos-

(1) *Lib. 1. cap. 1, 2, & 3.*

possit; quod ni ita esset, detrimentum perpetuo ferè levibus de causis fabrica nostra caperet. Id commodum præstant miræ istæ interiorum partium communicationes, quibus uni malè affectæ altera confestim opem fert. Ita repleto ultra modum corpore, per has aut illas vias spontè naturæ fiunt interdum exinanitiones. Et ob hanc causam morbi ab inanitione, quam à repletionem, orti periculosiores esse solent; quoniam demere, quàm addere, materiam expeditius possumus. Idcirco etiam, quamvis temperantia omnibus sit utilis; medici tamen antiqui auctores fuerunt, ut qui benè valeret, & suæ spontis esset, genio nonnunquam indulgens tam cibum, quàm potum, solito abundantius assumeret. Tutior autem est in potione, quàm in esca, intemperantia. Cæterum qui expletus est, facilius concoquet, si, quidquid assumpsit, potione aquæ frigidaë includat; cui etiam, præsertim si condimenta cum cibis devorata fuerint, *succum limoniorum*, vel *elixir vitrioli Mynsichti*, adjungere proderit. Tum paulisper invigilet, deinde dormiat. Si quibus verò de causis futu-

ra est inedia, labor omnis vitari debet. Neque ex facietate fames, neque ex fame satietas idonea est. At neque ex nimio labore subitum otium, neque ex otio nimio labor subitus, sine gravi erit noxa. Sensim igitur quæcunque mutationes faciendæ sunt.

VARIUM etiam habere oportet vitæ genus; modo ruri esse, modo in urbe, navigare, venari, quiescere interdum, sed frequentius se exercere; siquidem ignavia corpus hebetat, labor firmat. At modus in his omnibus servandus est, neque multum fatigari convenit: frangit enim vires, & corpus solvit, crebra & vehemens exercitatio; moderata vero semper cibum antecedere debet. Ex omnibus autem exercitationis generibus commodissima est equitatio; aut, si imbecillitas id non finit, vectio in curru, vel saltem in lectica: deinde arma, pila, cursus, ambulatio. Verum id incommodi fert senectus, ut corpori exercendo viris vix sufficiant, cum tamen sanitas id maximè requirit. Frictiones igitur in hac ætate suis manibus, si id fieri potest; sin minus, opera fervorum necessariae sunt; quæ verriculis

ex fetis confectis optimè peraguntur.

DULCE curarum levamen, & virium restitutio, somnus est; qui, quod in vigilia laboribus disperditur, quiete reparat reficitque. At neque is immodicus juvat; sensus enim hebetat, & vitæ officii minus idoneos reddit. Tempus autem somno opportunum nox est, in qua tenebræ & silentia illum invitant & conciliant; diurnus minus recreat. Quod si plebem servare convenit; multò magis viros literarum studiosos tenere oportet, quorum mens, æquè ac corpus, injuriis plus patet.

PUERIS alimentum mollius & lenius, juvenibus valentius congruit. Senes de cibo demere, & potione addere debent. Aliquid tamen consuetudini dandum est, in frigidioribus præsertim regionibus, qualis est nostra; nam in his ut acrior ciborum appetantia, ita facilior est concoctio.

CONCUBITUM, cùm jam ætas & robur stimulant, neque nimis concupiscendum, neque nimis pertimescendum esse, consentiunt medici. Senem sua monet frigiditas, ne pro voluptate ingratum laborem trahat, & fata sua

abrumpat. Turpissimum autem est, & maximè noxium, vi imaginandi quemquam se ad venerem ficta persona incendere. Illud deniquè omnes semper cogitare oportet, quod tum hanc, tum alias quascunque,

Voluptates commendat rarior usus.

IPSE deniquè, re benè perpensâ, sæpenumero mecum ad hunc modum reputare soleo. Utcunque voluptates, opes, potentia, cæteraque, quæ fortunæ dicuntur bona, nimis inæqualiter hominibus distributa esse videantur; si tamen in universis rem spectemus, illorum, quæ felicitatem faciunt, major deprehendetur æqualitas, quàm vulgo existimatur. Communibus vitæ utilitatibus commodiùs ut plurimùm fruuntur humilis ordinis homines, quàm illustres, & qui primum locum obtinent. Victum salubrem suppeditat labor modicus, qui & cibi appetentiam & concoctionem juvat; hinc jucundus somnus fessâ membra recreat, neque curæ edaces abrumpunt; læta proles domum replet, succrescentibus paterno labori robustis filiis. Quantùm autem hisce cedunt cum ærumnis conjunctæ plerorum-

rumque opulentorum inanes deliciae ! Indiget illorum stomachus, ut vesci possint, ciborum condimentis, quæ sanguinem calefaciunt & corrumpunt, corpusque morbis opportunum reddunt; diurna crapula nocturnam quietem interturbat; in poenam vitiorum nati, grande familiarum decus & columen, culpa parentum morbos in utero materno contrahunt, quibuscum per totam vitam conflictati vix ad languidam senectutem perducuntur; anxietatibus quoque de honoribus & splendidis titulis consequendis sæpe discruciantur, ita ut oblectationem, quam ex præsentibus bonis percipere possent, vana spe plura adipiscendi non rarò amittant. Horum igitur

Quis non optaret pauperrimus esse bonorum ?

Quin & omnibus hisce incommodis illud accedit, quod lautitiis onustum corpus animum quoque prægravat, & ad libidines incendit; cum ex adverso tenuis humiliorum victus neque corporis vires opprimat, neque vitiiis alimenta suppeditet. Quare, nisi opes comitetur prudentia,

Vi-

Vivitur exiguo melius.

Neque injusta noverca, sed omninò utilitatum provida & benefica mater, censenda est natura.

IN summa igitur, sapientis est in omni vita

*Servare modum, finemque tenere,
Naturamque sequi. (1)*

Quisquis autem de natura humana rectè judicium tulerit, eam ita constitutam esse inveniet; ut quemadmodum alii aliis ratione & ingenio longè præstamus, & tamen omnibus, quod dolendum prævum quidpiam est ingenitum; sic & corpora sanissima vitio aliquo insigni rarò non laborent: quod ut futuri interitûs seminium nos brevis ævi memores faciat, monstretque appositè ad hanc rem olim dixisse *Lucretium*,

Vitaque mancipio nulli datur, omnibus usu; (2)

neque ἀπροσδιόνυσον fuisse effatum illud *Hippocratis*, "Ολος ἀνδραπος ἐκ γενετῆς νόσος ἐστίν. (3)

(1) *Lucan. Lib. II. v. 381.*

(2) *Lib. III. v. 984.*

(3) *Epist. ad Damaget.*

C A P U T U M

A R G U M E N T A.

INTRODUCTIO. *De corpore humano* 1

I. <i>De febribus</i>	12
SECT. I. De febribus generatim	12
SECT. II. De febris solutionibus	13
SECT. III. De febribus continuis	15
SECT. IV. De febris cum exanthematibus conjuncta	17
Febris miliaris	17
SECT. V. Febris petechialis	22
SECT. VI. Erysipelas	23
SECT. VII. De febribus singularibus Pleuritis	27
SECT. VIII. De febribus intermittentibus	28
SECT. IX. De febribus vulgaribus, sive pu- blice grassantibus	33
SECT. X. De febribus lentis, sive hecticis	36
II. <i>De morbis capitis</i>	44
SECT. I. Apoplexia	44
SECT. II. Paralysis Chorea Sancti Viti	51
SECT. III. Epilepsia & Vertigo Tetanus	52
III. <i>De insania</i>	53
IV. <i>De angina</i>	73
V. <i>De morbis pectoris</i> De asthma	78
VI. <i>De morbis cordis</i>	83
VII. <i>De morbis ventriculi & intestinorum</i>	86
SECT. I. Alvi fluxus Dysenteria	88
SECT. II. De ileo	90
	SECT.

CAPITUM ARGUMENTA.

SECT. III. De lumbricis	92
VIII. <i>De hydropē</i>	98
IX. <i>De jecinoris morbis</i>	124
SECT. I. Icterus	124
SECT. II. Diabetes	130
X. <i>De morbis renum & vesicæ</i>	132
XI. <i>De morbis oculorum</i>	141
SECT. I. De gutta serena	143
SECT. II. De suffusione sive cataracta	148
SECT. III. De albugine oculi	150
Odorum vires	151
XII. <i>De podagra</i>	154
XIII. <i>De doloribus articulorum</i>	161
XIV. <i>De morbis cutis</i>	164
XV. <i>De strumis</i>	168
XVI. <i>De scorbuto</i>	173
XVII. <i>De malo hypochondriaco</i>	181
XVII. <i>De animi affectibus</i>	186
XIX. <i>De morbis mulierum</i>	193
SECT. I. Menstruorum suppressio	193
SECT. II. Immodicus mensium fluxus	195
SECT. III. Fluores albi mulierum	196
SECT. IV. De morbo hysterico	198
SECT. V. De partu difficili	200
XX. <i>De morbis venereis</i>	201
XXI. <i>De morbis, qui aliis superveniunt, aut in alios mutantur</i>	204
CONCLUSIO. <i>De vitæ regimine</i>	208





